

تحقيقات نوح الألفي

الكتاب: تحقيقات نوح الألفي

رواية

ميرنا المهدي

الطبعة الأولى 2018

تدقيق لغوي- تنسيق داخلي:

www.sekoon.com سُكُونُ

رقم الإيداع: 2018/23229

التقييم الدولي: 1-1-71-6667-977-978

الناشر: السعيد للنشر والتوزيع

المدير العام: لمياء السعيد

36 شارع عبد الحميد الديب بجوار شركة
القاهرة للأدوية شبرا مصر برج الهادي.



0222017260

01550096215



elsaidpublisher@gmail.com



جميع الحقوق محفوظة للناشر



للنشر والتوزيع

ميرنا المهدي

تحقيقات نوم الألفي

رواية



المحتويات

11.....	القضية الأولى (الفتيل)
97.....	القضية الثانية (كريم كراميل)
159.....	القضية الثالثة (ست الحسن)

إهداء

إلى أُمي التي أمسكت يدي وعبرت بي الطريق..

وإلى ما يا شقيقة روعي ورفيقة دربي..

ولكل من ساندني، وكل من علّمني حرفاً، وكل من أحبّطني يوماً..

لیس کل ما هو حقیقی، منطقیًا . .

ولیس کل ما هو منطقی، حقیقیًا . .

القضية الأولى

(الفتيل)

(1)

سأخبرك ثلاث حقائق عن نفسي..
أولهن أنني أدعى نوح.
ثانين: أنني أصبحت ضابطاً بالمباحث الجنائية تائراً بالحقق كونان.
أما عن الحقيقة الثالثة، حسناً.. سأعملك بها في الوقت المناسب.

بحلول الساعة الخامسة صباحاً، بدأت أتائب وأفرك عيني في محاولة
يائسة لصرف شبح النوم الذي خيم على حتى دخل قطز المكتب بقامته
الطويلة وشعره الكثيف وأنفه البارز وقميصه الأبيض الذي لا يعرف له
الغبار طريقاً.

اقترب من مكتبي بضجته المعهودة، متلهفاً للانقضاض على الفطور
الساخن الذي فاحت رائحته من الحقيبة البلاستيكية المتخمة بالفول
والطعمية والمخللات المتكومة في أوراق مشبعة بزيت لا يعلم مصدره
سوى الخالق.

نحيتُ الملفات والدفاتر جانباً ثم نشرتُ صفحة من جريدة الأمس

على المكتب لتكن عازلاً بين البقع التي ستخلفها مجزرتنا الصباحية وبين
الخشب الداكن.

- سنة عشان تجيب الفطار يا قطز؟

فكّ الأكياس وبدأ رصها بعناية وأجابني دون أن يرفع عينيه عن
الطعمية:

- الرائد زفت عطلني.

- صلاح؟

- هو فيه غيره، برزالة أهله دي!

انكبَّ على الطعام وطارت أصابعه بين الأطباق كالصقر ملتقطاً
قطعة من هنا وهناك بينما ركزتُ على الفول بالكمون والليمون حتى مر
الفراش المُسن بالطريقة فناده قطز بحماس:

- عم حمدي، الكاكاو بتاعي والنبني.

- عيوني، يا باشا.

أكمل الفراش طريقه محيياً باقي الضباط المتوافدين على القسم
والمتهجين لمكاتبهم بينما قلتُ:

- كفاية كاكاو بقى.

- بقولك إيه، مش إنت وأبويا علياً. كلكم باصين لي في كوباية

الكاكاو.

دخل الفراش واضعاً الكاكاو والماء فالتقط قطز الكوب قائلاً:

- الله ينور، ما تيجي باسم الله.

- بالهنا والشفعا، يا بشاوات، أي خدمة؟

- شكراً يا عم حمدي.

رحل الفراش مع دخول الرائد صلاح الشبكي برائحة عطره الرخيص
وقميصه الفاقع وسرواله القماشي الذي ورثه عن أجداده وشاربه الذي
انتهت صيحته بانتهاء الثورة العربية.

وقف عند الباب قائلاً بصوته الذي نبحه المعسل المغشوش:

- البشوات مترفلطين في الفول والطعمية وسايين الناس تدبح في
الشارع.

أكملت طعامي ولم ألتفت له، ولكن قطز أجابه معترضاً

- ناس مين؟ إحنا مرزوعين طول الليل وماجلناش بلاغ واحد.

- أو مال إيه البت اللي اتقتلت في ميدان طلعت حرب دي؟

التفتُ إليه وسألته برودٍ: بت مين؟

- اتفضلوا قُدّامي واحنا نعرف بت مين.

أكمل قطز طعامه قائلاً: روح أنت، إحنا نبطشيتنا خلصت.

رَبِّع ذراعيه القصيرين وقال بإيقاع سريع:

- المادة 41 من القانون 109 بتنص على إنه يجوز تكليف الضابط
بالعمل في غير أوقات العمل الرسمية علاوة على الأوقات الرسمية إذا
اقتضت مصلحة العمل ذلك.. طبعاً، ما سيادتك ابن اللوا وداخلها

كوسة لا ذاكرت ولا مققت عينيك في الكتب، جاي تاكل طعمية
وتشرب كاكاو.

أخذ قطر نفساً عميقاً محاولاً أن يتمالك أعصابه ثم همس لي قائلاً:
- هضر به في شنبه.

نفضتُ يدي قائلاً: إتك ع الصبر.

يمكن أن تعرف الكثير عن القاتل من الطريقة التي اختارها لقتل
ضحيته.

فمثلاً: مَنْ يستخدم الرصاص هو صاحب شخصية درامية ومغرورة
وغالباً ضحيته ابتزته أو استفزته ومن يستخدم الخنق هو شخصٌ يحمل
الكثير من الضغينة والاستياء المتراكم صوب ضحيته وفي الأغلب دافعه
هو الانتقام وفي معظم الأحيان يندم لاحقاً على فعلته، بينما من يختار السم
فهو شخص جبان، ولكنه ذكي ولا يقوى على مواجهة ضحيته.

أما أسوأ نوع من المجرمين، هو الذي يختار الذبح، أشعر بالإهانة
الشديدة عند رؤية شخصاً منحوراً كالمواشي كجثة هذه الشابة الجالسة
في المقعد الأمامي لسيارتها خلف المقود وقد تجلطت الدماء حول عنقها
الرفيع ومالت رأسها لليمين وارتخت يداها بجوارها وعيناها الخضراوان
مفتوحتان خلف نظارة نظرها الكبيرة وشعرها البني معقوص لأعلى
وعلى وجهها الميت ملامح الصدمة، لقد باغتها القاتل وذبحها من المقعد
الخلفي، ولكن يبدو أنه كان متعجلاً.

لقد خرج وترك بابه مفتوحًا، كما أنه لم يكمل الذبح لآخره، فالجرح ينتهي عند ما بعد منتصف العنق بقليل، ولكنه كان كفيلاً لإنهاء حياتها. وفتتُ أتفحص منظر الجثة بالسيارة الحمراء مداعبًا تلك الليمونة التي أبقيتها بجيبي وأتلقفها بين أصابعي متخيلاً مشهد الجريمة، بينما انشغل قطز بتأمل البنايات الأثرية المحيطة بميدان طلعت حرب، خاصة عمارة جروبي، أما صلاح فقد بصق على الأرض كالحيوان ثم دعك أذنه بظفر إصبعه الصغير الذي يُطيله ثم تكلم مع عسكري المرور بتعالٍ:

- ها يا ابني.. مين اللي شاف القتيلة؟

- أنا، لا مؤاخذة، استلمت النبطشية الساعة خمسة ولاقيت باب عربية القتيلة لا مؤاخذة مفتوح، وفضل يجي ساعة على ديك الحال ولما قربت عشان أشوفه، لا مؤاخذة، مفتوح ليه لاقيت البت مدبوحة جُوه العربية.

صاح صلاح بلا داع: وانت أزاى ماخذتش بالك إن البت مقتولة من الأول، يا ابني؟

- ما إزاز العربية، لا مؤاخذة، مفيم أشوف إزاى؟

- هتتفلك بروح أمك؟ ما تشوفوا شغلکم بقى.

أعلم أن العسكري قد لعن أجداد صلاح في سرّه، ولكنه وقف جانبًا بصمتٍ بينما لم ينزل قطز عينيه عن عمارة جروبي واضعًا يديه عند خصره فقلتُ له:

- فيه حاجة لفتت نظرك في العمارة؟

- تعرف إن العمارة دي، اتبنت سنة 1924 .

نظرتُ للبناية الكلاسيكية ذات اللون الرملي والنوافذ الخشبية الخضراء والشرف الواسعة وأعمدة الإضاءة الباريسية المحيطة بها ومقهى جروبي المغلق بواجهته ذات الفسيفساء الزرقاء.

ظَلَّ ”قطز“ ينظر للبناية بتعظيم وهيبة وأكمل مشيراً للمقهى:

- تعرف بقى إن في تمانينات القرن التسعتاشر جاكومو جروبي جه مصر مع ابنه وفتحوا الكافيه ده على الطراز الفرنساوي عشان...

- سؤال بس.. إيه دخل تاريخ العمارة بالبنت المدبوحة في العربية؟

التفت إليَّ قائلاً: ما صلاح بيعصر العسكري أسئلة وانت عمّال تلف حوالين العربية زي النحلة قُلت أبص على العماير العريقة اللي الزحمة بتلهينا عنها.

قطز واحد من الكثيرين الذين أجبروهم أهاليهم على اختيار وظيفة تخالف طموحاتهم، فهو ابن اللواء أنور المحمدي وميس نجوي علوي مُدرسة التاريخ بمدرسة بورسعيد الدولية التي

تخرج كليتنا منها وبينما كنتُ أطمح أن أصير ضابطاً مثل والدي الذي استشهد وأنا في العاشرة من عمري، قرر قطز أن يصير زاهي حواس الثاني بعد أن أسقته أمه عشقها للتاريخ الذي تجلّى في اختيارها لاسمه ”قطز“، وقد أعجب سيادة اللواء بهذا الاسم المنتقى فتخيّل ابنه قائداً وفارساً وزعيماً كسيف الدين قطز الذي حرّر مصر من التتار فعاش قطز بين سخرية وتهكم الطلاب، ولكنه كان يقول إن كل العظماء لديهم أسماء

تدعو للسخرية وهكذا ظل يحلم باليوم الذي يكتشف به مقبرة عظيمة
كإنديانا جونز في أفلامه وإذ ينتهي به الأمر طالباً بأكاديمية الشرطة
منصاعاً لتسلط أبيه الذي حرّمه من طموحه، ولكنه لم ينزع عشق
التاريخ من قلبه.

على الرغم من أن قطز أصبح ضابطاً بالإكراه، إلا أنه تفوّق بالأكاديمية.
فهكذا هو، يجيد أي مجال يدخله ويتقن عمله ويؤديه على أكمل وجه حتى
وإن لم يحبه، فهو شخصية لن تجد الإهمال أو الاستسلام في قاموسها.
- وحياة أبوك، يا قطز. ركز عشان نخلص من صلاح.

التفت إلينا صلاح قائلاً بنبرة تهكمية:

- ها يا عسل منك ليه، تفتكروا مين اللي عملها؟

أعلم جيداً أن صلاح لم يجلبنا معه حتى نشهد على الجريمة ونتعلم من
عبقريته وعقليته اللامعة. لقد أحضرنا لنقوم بعمله ونعطيه استنتاجاتنا
وأفكارنا، فقد اعتاد التسلق على أكتاف من هم أقل منه رتبة فيكفيك أن
تعاشر ذلك الوغد أياماً لتعرف أن مبدأه في الحياة ”إن جالك الطوفان حُط
ابنك تحت رجلك“، ولكنني أذكى من أن أحل واجبات غيري بعكس
”قطز“ الساذج الذي أجابه مندفعاً:

- معظم اللي بيختاروا طريقة الدبح بيكونوا جرّاحين أو جزارين أو
قتلة مأجورين. وأنا برجّح إن حد غني دفع فلوس لمجرم عشان يخلص
من حد مضايقه، فما أظنّس إن اللي دبّح المسكينة دي جرّاح؛ لأن ما فيش
جراح متعلم يعمل جريمة زي دي في العلن وسط ميدان طلده...

قاطعہ بضحکة ساخرة تجعلني أتمنى لكمه كي أسقط أسنانه الصفراء:
- بالعكس، ده مكان مناسب جدًا. الدنيا ضلمة وهُس هُس
والعسكري متلقح نايم وعربية مفيمة، دخل دبح وماحدث خد باله..
السؤال هنا يا مبتدئ منك له، هو ليه الهانم المحترمة كانت في عربيتها
المفيمة في نص اليل تحت بيت مش بيتها؟ البواب بيقول إن دي أول مرة
يشوفها وإنما جت على المغرب وطلعت العمارة وهو دخل ينام على نُص
الليل وكانت عربيتها لسه راكنة. إيه اللي خلى الهانم تنزل بعد نُص الليل؟
وجهتُ له الحديث لأول مرة قائلاً برود:

- تفتكر إنت إيه؟

ثبّت نظارة الشمس المضروبة على أرنبه أنفه قائلاً بفخرٍ لا يليق بهيئته.
- رأيي إنكم هواة. لو خدت بالك يا مبتدئ هتلاقي إن العمارة فيها
بنسيون في الدور الثالث، أكيد الهانم طلعت لعشيقها وقضت معاه ليلة
ظريفة ماخصلتتش غير بعد نُص الليل جه بقي عيّل مرقع من بتوع سرقة
العربيات وثبتها عشان يسرق العربية الغالية الحلوة دي فرفضت أو
صرخت. دبحها وجري.. أنا هلم كل العيال المسجلين وأنفخ أمهم لحد
ما يعترفوا.

لم أرَ تحليلاً أفضل من هذا.

ذاك الأحمق الذي يظننا هواة لم ينتبه لحقبة الظهر الملقاة بالمقعد
الجانبى ويخرج منها مسطرة هندسية كبيرة ولا يحتاج الأمر أن تكون
شرلوك هولمز عصرك لتستنتج أن القتيلة طالبة بكلية هندسة وقد أتت

إلى منزل صديقتها وذاكرتا معًا طوال الليل ثم حدث أمرٌ ما جعلها ترحل، لا أعلم ما هو ولا يهمني معرفته، ولكن مما لا شك فيه أن من قتلها لم يكن غرضه السرقة؛ لأنه اختار المقعد الخلفي، وراء قائد السيارة مباشرة، مما يعني أنه يقصد الفتاة ولو كان يود الحصول على السيارة تحت التهديد لاختار المقعد الأمامي بجوارها أو لقتلها خارجها ليسهل عملية التخلص من جثتها ويقود السيارة فرائًا، خاصة أن المفتاح بالكونتاكت وأن الضحية ضعيفة البنية ومن السهل تهديدها أو ضربها أو التخلص منها بأي طريقة لا تتضمن ذبحها.

المجرم لم يرغب في فعل أي شيء سوى قتلها.

أنا أؤيد فكرة قطز، إن الفاعل قاتل مأجور، ولكن ما الذي يجعل طالبة جامعية ترتدي ”كروكس“ أحمر وكنزة مرسوم عليها ”ميكي ماوس“، مصدر خطرٍ لأحدهم حتى يدفع لقاتل مأجور كي ينهي حياتها بهذه الطريقة الشنيعة؟!

قاطع قطز أفكاره قائلًا بحماس:

- ما أظن إن الغرض هو السرقة، اللي قتلها كان راصدها من ساعة ما طلعت العمارة وأول ما نزلت هو وروب، ذبحها. أقولك.. ممكن تبقى مثلاً مرتبطة بواحد غني أوي وأهله حاين يجوزوه لو احدة غنية أو لبنت عمه بس هو رافض عشان بيحب القتيلة وتمسك بيها فالعيلة قالت تخلص منها عشان...

صاح فيه صلاح قائلًا:

- إيه يا ابني فيلم رد قلبي ده؟!

صمت قطر الذي يميل دائماً لتفسير جرائم القتل بطريقة درامية تليق بشخصيته الرومانسية النابعة من أفلام الستينيات التي يحفظها عن ظهر قلب، وبالرغم من اتفاقي الجزئي مع نظرية القاتل المأجور إلا أنني لا أؤيد فكرة أنها قُتِلت لأنها فقيرة؛ فالسيارة التي تقودها باهظة الثمن.

لم أتوقف عن تدقيق النظر بأركان السيارة مداعباً الليمونة التي تساعدني على التفكير بصفاء ذهنٍ وهي عادةً اكتسبتها منذ كنت بالثامنة.

- سيادة النقيب لمونة.. إنت يا ابني!

التفتُ لصلاح السمج وقلتُ بجدية:

- إنت عندك كام سنة يا صلاح؟

تعجب من السؤال فقال:

- جايب لي عروسة ولا إيه؟ - ثم ضحك كالكلب العاوي وأكمل

بسخافته المعهودة- 34 سنة يا ابني.

- وأنا عندي 26 سنة، أبقى ابنك إزاي؟ خلفتني وانت عندك تمن

سنين؟

- اتضايقت عشان بقولك يا ابني؟ صاح منادياً شخصاً غير موجود:

هات يا ض بوكيه ورد ودبدوب أحمر نصالح بيه سيادة النقيب لمونة
عشان اتقمص ثم عاد للضحك بسخرية.

تمتمتُ ضاغطاً على ضروسي: عيِّل مِمَشش.

همس قطز: هيجي يوم أظرفه بوكس يوقّع شنبه ده.
قلتُ بفتور: طب، يا صلاح باشا حضرتك مسيطر وحاطط إيدك
على خيوط القضية كلها ومش محتاج اتنين هواة زينا. نتكل الله إحنا بقى
وصباحك مربي.

- اتكلوا، إنتوا مافيش منكم رجا.
ظهر لنا بواب خمسيني بجلبابٍ رماديّ يركض مذعورًا صوب سيارة
الشرطة الزرقاء صارخًا:

- يا باشا، يا باشا. إلحقنا، يا باشا.
صاح فيه صلاح بعصية:
- إيه يا ابني إنت؟ بتصرخ زي البقرة كده ليه؟
- مصيبة.. مصيبة يا باشا.

أشار لنا صلاح بعجرفة قائلاً: شوفوا الزفت ده عايز إيه.
قال قطز: نشوف إيه؟ إحنا خلاص ماشيين، ابعت معاه الأمين.
قال صلاح بحزم: مش سيادتكم عايزين تترقوا وتبقوا بشاوات؟
اتفضلوا شوفوا شغلكم.

قال قطز: بس إحنا...
قاطععه صلاح تاليًا ما يحفظه من قانون هيئة الشرطة كالبيغاء الأجرى:
- يلتزم ضابط الشرطة بتنفيذ ما يصدر إليه من أوامر بدقة وأمانة.
زفر قطز متمتًا: الله يجرقك إنت وقوانينك.

التفتُ للبواب السمين المدعور وسألته بفتور:

- موضوعك إيه إنت على الصبح؟

- أستاذ طه عبد اللطيف.. ربنا نزل عليه لعنته.

قال قطز وقد نفذ صبره:

- ما تخلص، طه زفت ماله؟

- اتبخر، يا باشا.

(2)

لقد خانه التعبير، طه عبد اللطيف لم يتبخر بل هو.. حسناً، أنا عاجزٌ عن وصفِ ما أراه بعيني؛ فلو حكاه لي أحدهم لسخرت منه، ولو رأيته في فيلم لو صفته بالخيال العلمي الرخيص.

صعدنا مع البوّاب إلى عمارة جروبي التي ظلّ قفز يتأمل سلامها وأبواب شققها متحدثاً عن فن الـ”آرت ديكو“ المعماري والجيران ينزلون لأشغالهم والطلاب لمدارسهم، بينما البواب يقص علينا ما اكتشفه لاهثاً:
- الأستاذ بيصحي كل يوم الساعة ستة يسحب الجرنال وينزل يفطر، بس النهارده الساعة جت سبعة والجرنال لسه على عتبة الباب، خبطت عليه مافتحش خفت لتكون جات له غيبوبة السكر تاني ففتحت الباب و...

سألته: فتحت الباب إزاي؟

- بالمفتاح، يا باشا. أصل من ساعة ما جت له غيبوبة سُكَّر وهو إداني مفتاح شقته وقالي عشان يعني لو حصل له حاجة أدخل الحقه، أصل المرة اللي فاتت هو...

قاطعہ قطر: هو عایش لوحدہ؟

- طليقتہ عایشہ فی فرنسا مع ابنہ بقالہا یجی ثلاثین سنۃ وعمرہا ما زارتہ.

وصلنا شقتہ بالدور الثاني بأخر الطرقة لنجد الجرنال ملقى عند عتبة الباب فوق السجادة الخشنة الصغيرة ودخلنا الصالة الواسعة التي تعج بالأنتيكات بطريقة غير منظمة، لو رأيت جدتي ذاك المنظر لاستشاطت غضبًا من هذا الإهمال، ولكن فور أن دخلت غرفة النوم بأخر الممر الطويل نسيت كل الأنتيكات والتحف المبعثرة، فما رأيتہ قادرٌ على أن ينسيك اسمك.

فاحت رائحةٌ مميتة من هذه الغرفة التي يغلب عليها اللون الأبيض. نوافذها الكبيرة مغلقةٌ وستائرُها الحريرية مسدلة.

يفترش الأرضية سجادٌ إيراني دقيق الصُّنع فوقه سرير أبيض الغطاء، أمامه كرسيٌّ مُحترقٌ.

على يد ذلك الكرسي كفتُ متفحِّمٌ بأحد أصابعه خاتمٌ ذهبيٌّ مُميّز وعلى مقعدته المبطنة رماد منشور من أعلى إلى أسفل، وعلى طرف ظهر الكرسي رأس رجل مقطوعة أكل اللهب تفاصيلها. تستند هذه الرأس المدومة الملامح على حائطٍ كُتبَ عليه بدهان أحمر وبخط اليد "الله أكبر".

أتى فريق البحث الجنائي وقد صُدموا مثلنا.

كيف يمكن لأحدهم أن يحترق إلى درجة أن يتحول إلى رمادٍ - عدا كفه ورأسه - ولا يُمس شيء

بشقتة سوى كرسيه الذي طالته بضعة حروق سطحية.

ليس هذا فحسب، بل لا توجد أية آثار لاقتحام المنزل، فالنوافذ كلها مغلقة والباب لم يصبه خدشٌ، والبواب دخل بالمفتاح؛ أي أن من ارتكب هذه الجريمة يملك مفتاحًا ولكن السؤال الذي شغلني أكثر من ارتكب الجريمة هو: كيف ارتكبها؟!

- ده غضب ربنا.

هكذا أجاب جاره المسن بالشقة المقابلة للمجني عليه طه عبد اللطيف، فقلتُ له:

- يعني إيه؟

- يعني واحد ملحد عمال ينتطط على القهاوي والصالونات الثقافية ومخصص الجرنال بتاعه عشان يدعو الناس للكفر، قال إيه؟ ما فيش حاجة اسمها ربنا والكون ماشي بالفيزيا والكيميا مش بقدرة الخالق، تقدرؤا بقى يا بشوات تفهموني بالفيزيا والكيميا الراجل ده اتحرق واتحول لرماد إزاي؟ الجسم محتاج حرارة ما تقلش عن 1500 درجة مئوية عشان يوصل للحالة دي، أنا كنت مدرس كيميا وبقولك درجة حرارة زي دي كانت فجّرت العمارة كلها مش يبقى جسمه بس اللي

متفحم والأوضة كلها مافيهاش خدش.. دي قُدرة القادر، أنا ياما نصحته بس هو ما اتعطش.

لم تختلف أقوال المسن عن غيره، جميعهم أكدوا أن طه عبد اللطيف صاحب جريدة المعارف من الدعاة إلى الإلحاد علناً، وأنه اعتاد نشر أفكاره الملحده في لقاءاته بالقنوات التلفزيونية بل إنه أَلَفَ كتاباً ينفي وجود الله، ويؤكد أن ما الأديان سوى كذبة اخترعها الأَوَّلون لحكم الأمم وتغيب الشعوب وأقسم الجميع من البواب حتى أستاذ الجامعة المقيم بالبنية أن ما حدث لظه ما هو سوى انتقام الله العزيز الجبار.

انتهى كلانا من استجواب كل الجيران وقد تطابقت الأقوال فقال
قطر:

- الكل بيأكد إن ماحدث سمع صريخ ولا شم ريحة شيايط ولا شاف دخان ويحلفوا مية يمين إن ده غضب ربنا عليه.

وضعتُ يدي عند خصري ناظرًا لتلك الغرفة وقد أخذوا الكرسي بما عليه من رمادٍ ورأسٍ محروقة وكفٍّ متفحمٍ، وما زال رجال البحث الجنائي يللمون آيةً أدلة حتى أتى حسني - أمهر رجال البحث الجنائي - قائلاً بتوتر:

- مافيش أي حاجة تسبب الحريق، لا تسريب غاز ولا ماس كهربائي ولا بنزين مدلوق ولا عقب سجارة ولا شمعة ولا حتى مركبات فسفور في الحيطان أو الدهان تسبب الحريق المنيل ده.

- طب والبصمات؟

- لِسَّه بنرفعها، بس.. حكّ رأسه الكبير ثم قال: الموضوع فيزيائياً
مستحيل. درجة حرارة الأوضة عادية جداً، الإزاز ما عليهوش بخار،
مافيش أي أثر لهباب الحريق على أي حاجة.
من الحاجات البيضيا اللي في الأوضة، الأوضة مليانة حاجات معدنية
كانت المفروض تسيح.

الراجل ده اتعرض لنار ماتقلش حرارتها عن 1500 درجة عشان
يتحول لرماد كده، وبعدين المفروض حرارة زي ده تخلي حجمته تتمدد
أو تنفجر لكن حجمته سليمة، الملامح اتحرقت لكن الجلد ما وقعش
حتى الخاتم الذهب اللي في صباعه ما انصهرش.. إزاي يتحول لرماد وما
يتبقاش منه غير كف وراس.. شكل كده...
قاطعته: أوعي تقولي إنت كمان غضب ربنا.

- ليه لأ؟ ماسمعتش عن البنت اللي حرقت القرآن فربنا لعنها
واتحولت لمعزة؟ ولا الواد...

- هو إنت من النوع اللي بيدخل يعمل لايكات لبوستات مكتوب
عليها تحداني يهودي أن أجمع مليون لايك ولن تصدق منظر قطة تؤذّن
وديك يؤم بالمصلين والجوده؟

- إنت بتتريق؟ هو ربنا مش قادر يولع في حد أهانه؟ إنت مش مؤمن
بقوة ربنا؟

- إنت هتكفّرنا، يا عم؟ أنا مؤمن بقدره ربنا وعقابه بس ربنا بيعاقبنا
في الآخرة.

- وفي الدنيا كمان عشان نبقي عبرة لغيرنا.
قاطعته قطز: لا مؤاخذة يعني، ما أوروبا كلها ملحدين. إشمعنى طه
بالذات اللي يبقى عبرة؟
توقف حسني قليلاً ثم كاد أن يجيب ولكني قاطعته:
- هو ربنا يوم ما يعاقب حد هيكتب على الحيطه الله أكبر؟ الموضوع
فيه لعبة.

- طب اتفضل يا سيادة النقيب، قولي إيه اللعبة؟
نظرتُ حولي ثم سألتُ قطز:
- البواب لِسَّه بَرَّه؟
- قاعد في الصالة والعسكري عينه عليه.
خرجنا من الغرفة فهمستُ لقطز مستعجبًا:
- لما أذكى واحد في فريق البحث الجنائي يفكر كده، أومال الناس
اللي على قدها هتقول إيه؟

- إحنا لبسنا قضية حلزونية.. منك الله يا صلاح.
ذهبنا للبواب الذي توتر في مقعده، وفور أن رأنا وقف ولكني
جلستُ أمامه عاقداً أصابعي، قائلاً بنبرة أمره: مين اللي عمل كده؟
- ربنا يا باشا، ده عقاب...

- ماشي ماشي، عقاب ربنا.. مين بقى اللي طبَّق عقاب ربنا على طه؟
- والله ما أعرف يا باشا. الناس كلها شايفين إن أستاذ طه كافر ولازم

يتطبق عليه الحد. لو كان مات مدبوح ولا مقتول كنت هقولك تلاقيه أي
عيل عايز ينصر دين الله، لكن الموتة دي مش من فعل بشر، فرد كفيه في
وجهي: والعشرة دول، دي قدرة الله وحده.

زفرتُ ثم دعكت عيني قائلاً:

- طه ده بيعمل إيه في يومه؟ بيروح فين؟

- بيصحى الساعة ستة، ياخذ الجرنان وينزل يفطر في جروبي، بس
لما جروبي قفل بقى بيروح المطعم القديم ده اللي كله إزاز اللي في الشارع
هنا و...

قاطعه قطز: قصدك على ريش؟

- أيوه يا باشا. بيفطر ويروح مكتبه في شارع التحرير بعدها يتغدى
ويرجع ينام من الساعة ستة للساعة ثمانية وعلى تسعة كده بيقعد على
القهوة اللي ورا مطعم ريش أو يروح صالون المثقفين وما يرجعش قبل
الساعة اتناشر أو حداشر بالليل ينام على طول.

- كان في حد متعود يزوره؟

- عمري ما سُفت له قريب ولا بعيد. ماكانش فيه غير أخوه وده
مات من يحي عشر سنين، وقبلها طلق الست الفرنسية وسافرت
وخذت العيل معاها بس عمرهم ما زاروه.

سأله قطز متتاءباً: طب في حاجة غريبة حصلت إمبراح؟

- أبداً يا باشا. أنا قمت من مكاني الساعة اتناشر والأستاذ كان وصل
على حداشر وكان شكله مبسوط أوي حتى كان ماشي يغنيي للست.

- في حد ثاني معاه مفتاح الشقة دي غيرك؟

- الله أعلم، بس... اضطرب ثم قال: هو انت شاكك فيه. يا باشا
عشان معايا المفتاح؟ طلاق ثلاثة ما عملت حاجة.. بدأ يبكي كالرضيع:
وربنا المعبود أنا في العمارة دي بقالي خمسة وأربعين سنة ما حد شاف مني
حاجة وحشة، وحتى الأستاذ نفسه بالرغم من كفره كنت حاطه فوق
راسي، أنا بعامل الناس كلها واحد و...
- ما خلاص، يا عم. سدّ بقلك ده.

نهضتُ برفقة قطز قائلاً: تعالى نبص على الأماكن اللي بيروحها أكيد
هنطلع بحاجة.

بدأنا كما اعتاد طه أن يبدأ، فاتجهنا إلى مطعم ريش سيراً على الأقدام.
كان مطعمًا عتيقاً يشبه صندوقاً زجاجياً كبيراً موضوعاً في إطارٍ خشبيّ
عملاقٍ تنسدل على جوانبه ستائر بيضاء. وفور أن تدخل ستلفت نظرك
تلك الملصقات القديمة وعبارة ”اللي اختشوا ماتوا“ المكتوبة بالأحمر
بجوار مجموعة كبيرة من الإعلانات عن ندوات وجلسات ثقافية.

وقف قطز عند الباب متأملاً السلم النحاسي الجانبي وتمتم صوبي
قائلاً:

- تعرف إن أيام ثورة 1919 كانوا عاملين مطبعة هنا بتطبع
المنشورات اللي...

قاطعته بنفاد صبرٍ: تعرف تسكت!

استقبلنا عند الباب نادل داكن البشرة، يرتدي قميصًا أبيض وصدريًا
أسود و ”بابيون“ أنيق.

اقترب منا قائلاً بملامح متحفظة:

- صباح الخير.

قلتُ مهدوءٍ: صباح النور، أنا النقيب نوح الألفي من المباحث الجنائية.

ارتبك قائلاً: خير، يا فندم؟

- أنا بسأل عن الأستاذ طه عبد اللطيف و...

- هو لسه ماجاش بس...

قاطعته قطز: هو مش هيجي عشان اتقتل.

انقبضت ملامح النادل الكهل وجحظت عيناه بين هذا الكم المهول

من التجاعيد حولها قائلاً:

- يا حول الله، الله يرح... ولأ بلاش.

- ما تجوزش عليه الرحمة ولا إيه؟

- آديه قابل ربنا اللي كان بينكره.. مين اللي عمل فيه العملة دي؟

- هنعرف.. قولي، هو جَه هنا إمبارح؟

- أيوه، اتعود يجي كل يوم يفطر مع ضيوفه.

- مين ضيوفه، بالظبط؟

- ناس معروفين من اللي بيطلعوا في التلفزيون وبيزعموا في البرامج.

- يعني بيجوا يفطروا سوا وبس؟ ما بيتكلموش في حاجة؟

- مش بيتكلموا كثير، بيسلمهم وييستلم منهم جوابات وبعدها يفطروا ويمشوا.

سأله قطز: جوابات إيه؟

- مش عارف، كان يديهم ظرف ويدّوا له ظرف. أكيد حاجات تُحْص الجرنال بتاعه، هو صاحب جرنال كبير ورثه عن أبوه. أنا كنت تملي أقراه بس بعد ما بقى بيخوض في دين الله بطلت أجيبه. حاكم أنا أعرف الأستاذ من أيام ما كان بيحي مع أبوه، كان راجل يتحط على الجرح يطيب والعيبة ما تطلعش منه لكن يخلق من ضهر العالم فاسد.

قال قطز: إنت شايفه وحش أوي كده؟

- الأستاذ طه كان كويس لحد ما سافر فرنسا وحاله اتغير ورجع يقول حاجات غريبة اتعلمها من بلاد برّه ومشي في خط الكفر لحد ما غاص في الوحل.

- طب تفتكر مين ممكن يقتله؟

- اللي بيغيروا على دينهم كتار. ده كل ليلة يدب خناقة على القهوة اللي ورانا بسبب الحكاية دي.

- اتخاّنق إمبراح مع حد معين؟

- ما عرفش، أنا ما بقعدش على قهاوي.

- طب إمبراح كان معاه حد على الفطار؟

- آه، الراجل اللي اتخاّنق معاه ده في التلفزيون.

- راجل مين؟

- راجل الأعمال المشهور ده، منصور الباز. اتخانق معاه في برنامج. أستاذ طه كان طالع أستغفر الله العظيم يبدافع عن حقوق الشواذ وقال إيه من حقهم يتجوزوا رسمي زي ما أمريكا بتعمل. جه الأستاذ المحترم منصور الباز اتصل بيه على الهوا ومسح بكرامته الأرض وقال له إنت بتبوظ الشباب، مش كفاية بتدعوا للإلحاد كمان للشذوذ، ساعتها أنا اتبسّطت أوي منه بس لما لقيتهم تاني يوم سمن على عسل ييفطروا مع بعض ويضحكوا، عرفت أنها تمثيلية ولعنتهم هم الاتنين.

- كانوا بيتكلموا عن إيه؟

- مش عارف، أنا سمعي على أدّي. بس في الأول كانوا شادين في الكلام والأستاذ منصور بيكلمه من تحت ضرسه، بعدها اتصالحوا تقريباً وهزروا واتعازموا كمان على مين اللي هيدفع.

حككتُ ذقني قائلاً: وطه سلّمه أو استلم منه أي ظرف؟

- لأ، فطروا ومشوا.

قررنا أن نتقسم.

ذهب قطز لمكتب طه ليتحقق من أمر الأظرف التي اعتاد طه أن يسلمها ويستلمها بينما ذهبتُ إلى المقهى الذي كان يوماً ما حديقة شاء القادر أن تتحول لشارع ضيق مبلط تراص عليه الكراسي والطاويلات البلاستيكية الزرقاء التي توضع عليها المشروبات.

سألتُ الصبي عن طه فلم يقل ما هو عكس كلام النادل بمطعم ريش، ولكنه وضع إضافة مهمة:

- إمبراح الأستاذ حسين اتعصب عليّ و...

- حسين مين؟

- شاب ملتزم بتاع ربنا ساكن في العمارة دي. أشار للعمارة القابعة بآخر الممر: شد إمبراح مع الأستاذ عشان هو زودها أوي. حسين جادله بالتي هي أحسن بس هو ردّ عليه ببرود وفضل يستفزه؛ فكان هيمدّ إيداه عليه وفضل يقوله هتحل عليك لعنة الله بس إحنا طبعًا فرّقنا بينهم يعني والموضوع خلص.

- حسين ده اتخانق مع حد قبل كده؟

- لا، يا باشا ده في حاله. دي حتى أول مرة أشوفه متعصب كده. بس يا بيه ما تدقش، أستاذ طه كل ليلة يدب خناقة مع حد، بيقعد معاه خمس ست عيال أستغفر الله العظيم زيه كده، والباقي مش راضين عن كلامه، أنا قلت لصاحب القهوة ديك النهار ما يخلش الأستاذ يجي يقعد هنا تاني عشان المشاكل اللي بيعملها وحتى عشان بركة المكان ما تقولش بس هو قالي يا واد يا كنكة، مدام بيدفع الحساب يبقى كل واحد حُر.

صمّت ناظرًا صوب البناية التي أشار لها قائلاً إن حسين يقطن بها فعلق الصبي:

- بتفكر إنت في حسين، يا باشا صح؟ لم أعلق ولكنه أكمل: استحالة يكون هو اللي وراها، مش بس عشان هو شاب عاقل ووحيد أبوه وأمه،

بس عشان إمبراح قبل حتى ما الأستاذ طه يمشي حسين رجله اتكسرت .
وقع على الرصيف وإحنا نقلناه على المستشفى، ويمكن تسأل أي حد من
اللي كانوا موجودين، لو مش مصدقني .

لم يكن يكذب، لقد كُسرت ساق حسين بالفعل .
استقبلتني والدته ظانة أنني زميلُ أتى ليطمئن عليه، ولم أكن زائره
الوحيد؛ فهذه الشقة الواسعة التي امتلأت حوائطها بالآيات القرآنية
والمساح العملاقة وتوسطت طاولة الطعام مبخرة أنيقة تفوح منها
رائحة بخور مخنقة، وجدتُ ثلاثة شباب آخرين في بداية العشرينيات
على وشك المغادرة بعد أن اطمأنوا على صديقهم السمين الراقد في
سريره وبجواره منضدة عليها مصحف ومسبحة إلكترونية ومساك،
وقد قدّمتني والدته له على أنني صديقه بالرغم من أنني لم أقل ذلك
ولكنه رحب بي بابتسامة قائلاً:

- أهلاً وسهلاً، شَرَفت .. تشرب إيه؟

- ولا أي حاجة، شكرًا.

- لا، إزاي؟ لازم تشرب حاجة لحد ما والدتي تحضّر الغدا.

- ألف شكر. انتظرت حتى غادرت والدته ثم أكملت: في الحقيقة أنا

جَي أسألك سؤالين وأمشي على طول.

- سؤالين إيه يا أخ.. اعذرني وجهك مش مألوف، حضرتك معانا

في الجامعة؟

- لأ. أنا النقيب نوح الألفي.

تغيرت ملامحه واضطربت قائلاً: خير؟ في إيه؟

- أنا جاي أسألك عن اللي حصل مع طه عبد اللطيف.

- قصدك على الخناقة؟ أنا ما مدّتش إيدي عليه، مسكت نفسي على آخر لحظة وقُلت والكاظمين الغيظ وده برضو من سن أبوك وما يصحش بس الراجل ده قادر على بث الفتنة زي ما الحية بتبخ سمها، أنا مش معترض على إنه ملحد بس معترض على إنه بيدعو الجميع للإلحاد علناً، هي العقول ناقصة ضياع وتشتت أكثر من اللي هي فيه؟!

- وبالنسبة لك ده دافع كافي لقتله.

انتفض قائلاً: قتله؟! هو مات؟

- طه مات محروق في شقته و...

- وعشان أنا بقى متدين وملتحي سيادتك جَي تلبس لي التهمة.

- أنا مش جاي ألبسك حاجة. إنت اللي اتخانقت معاه وهددته علني

والكل يشهد بده.

- والكل برضو يشهد إن رجلي اتكسرت واتنقلت للمستشفى قبل

ما الأستاذ يروّح.

- ممكن إنت تروح المستشفى بس تحرض غيرك إنه ينفذ و...

قاطعني بنبرة ساخرة قائلاً: بقولك إيه، يا باشا.. روح شوف ملتحي

غيري ولبسها له.

سحب مصحفه وفتحته قائلاً: حسبي الله ونعم الوكيل.

(3)

لم أعد قادرًا على البقاء مستيقظًا أكثر من هذا.
حلَّ العصر على كِلينا فجلسنا بسيارتي ”النوبيرا“ الحمراء كثيرة
الأعطال، أجمع كل ما توصلتُ إليه أنا وقطز من معلومات نافئين دخان
سجائنا.

- كل اللي شغالين في الجرنال بتاعه عاملين زيه كده، بيؤمنوا بنفس
المبادئ والأفكار وشايفين إننا عايشين في مجتمع جاهل ومتخلف
ومتطرف ونابعة زي طه لازم يكون مستهدف بسبب أفكاره المستنيرة
وإنه شهيد الانفتاح الفكري.

زفرتُ ثم أشعلتُ سيجارة أخرى قائلاً:

- أنا تقريبًا اتكلمت مع كل اللي بيقعدوا على القهوة وكل اللي بيشتغلوا
في ريش والجيران وحتى سكان العمارة اللي قدامه، كلهم يقولوا غضب
ربنا.. مالاقتش أي حاجة مهمة في مكتبه؟

- كلها كتب فلسفة عن الإلحاد وأفكار سياسية ومسودة مقالات وما
إلى آخره.

- مافيش خزنة ولا درج مقفول ولا...

- مافيش غير لاب توب عليه باسورد بعته للشباب عندنا يفتحوه..
بس عايز أقولك الصحافة على ودنها، مافيش حد في مصر دلوقتي مش
بيعمل شير للخبر ويقول الله أكبر.

- إحنا وصلنا لإيه لحد دلوقتي؟

- طه له بدل العدو ألف بسبب...

- بسبب إنه ملحد، يعني دايرة البحث بتاعتنا في المتطرفين اللي عندهم
القدرة إنهم يدخلوا شقته ويطلعوا منها من غير ما يقتحموها. ماشي، حد
دخل الشقة، طب إزاي قتله كده؟ وبعدين.. إيه حوار الجوابات اللي قال
عليها الجرسون ده؟

- ما أنا سألت البت السكرتيرة قالت لي إن هي دي طريقة طه في
استلام الصور أو الأخبار من اللي شغالين معاه وإنه دايمًا بيدي فلوس في
الأطرف، بيعشق الأطراف زي عينيه.

- مش راكب في دماغه الهري ده.

- طب وبعدين؟ مقفلة من كل حته، يا نوح. البيت مافيهوش غير
بصمات البواب وطه نفسه.

- يبقى البواب اللي عملها.

- الناس شهدت إن البواب فضل على القهوة اللي في شامبليون من
ساعة ما ساب العمارة في نُص الليل لحد أذان الفجر وبعدها صلّى جماعة
ونام على روحه وهو بيسمع درس الفجر لحد ما الناس صحوه وراح

العمارة وزع الجرايد ونصّف العربيات ومسح السلم وبعدها اكتشف
الجريمة، أنا عصرته أسئلة ...

- أومال مين يعني اللي عملها، يا قطز؟ أبويا طلع من قبره ولّع في سي
طه ورجع تاني؟!

- إهدا بس، بتوع المعمل شغالين من نار، العيون كلها علينا دلوقتي
وأكيد النتائج اللي هتطلع هتوصلنا لحاجة.. بس عارف إيه اللي هيجنني؟
- انجز.

- أنا فاكر إني سمعت عن موته زي دي قبل كده، كونتيسة إيطالية
جسمها اتحول لرماد وما اتبقاش منها غير ثلاث صوابع وبرضو مافيش
حاجة ولّعت في قصرها.
- قطز، أنزل من العربية.

- بتكلم بجد. ماما حكّت لي الموضوع ده قبل كده بس مش فاكر
كان اسمها إيه.. طرّع أصابعه فجأة قائلاً: هو أنا واجع دماغى ليه؟
مش أختك دكتورة في السنّ إيطالي؟ أكيد تعرف أكثر مني، أسألها يمكن
نلاقي حاجة تفيدنا.

- عارف إيه اللي هيفيدني بجد؟ أطفأتُ سيجارتي وأكملتُ:
ساعتين نوم.

- نوم إيه دلوقتي يا نوح؟ إحنا ماسكين قضية بنت ستين في سبعين ولو
حلناها هتفرق في تقيميننا وترقيتنا، ويمكن نطلع بمكافأة وانت تقولي أنام؟
- أنا مطبق من أول أمبارح، فُكك. هنام وأصحى فايق.

- براحتك، أنا مش هنام غير لما على الأقل الأقي خيط نمشي وراه.
- هنلاقي خيط وهنمسك القاتل والموضوع هيخلص وهيحل السلام العالمي، بس أنام حبة.

صعدتُ سلام البناية رقم ستين المُطلَّة على النيل بجاردن سيتي حيث أقطن مع جدي منذ أن تزوجتُ أمي من ذاك الطبيب النفسي اللزج. فتحتُ الباب الخشبي الثقيل ذا الشُراعة الزجاجية فأتاني صوتُ الكليين ينبحان بالمدخل.

دخلتُ حيث فاحت رائحة الفراولة التي تعصرها جدي إحسان الدمرداش البالغة من العمر سبعين عامًا والتي لا تسمع سوى أغاني "إديث بياف" التي تنبعث موسيقاها الباريسية من أسطواناتها السوداء الدائرة بالجرامافون النحاسي الذي أهدها لها جدي الراحل أيام خطبتها وقد اشترت باقي الأسطوانات من فرنسا أثناء بعثة التفوق التي حصلت عليها مع مجموعة من دارسي الحقوق إلى جامعة السوربون وقد عادت لتصير أستاذ القانون الجنائي بجامعة القاهرة حتى وصلت لسن المعاش ثم توفي جدي وتركنا مع كلب "جيرمين شيبرد" يدعى "روي" وكلبة "مالطي" بيضاء تشبه علبة المناديل أسمتها جدي لولو وهي تناسب شخصيتها الباريسية بشدة، فجدي لا تتكلم دون استخدام مصطلحات فرنسية لا أفهمها وتضع عطر شانيل 5 وتحافظ على قصّة شعرها الفرنسية ولونه الأحمر الكرزي ولا ترتدي سوى الأثواب والبلوزات من الشيفون

والتنانير الراقية فلن تجذب بخرانتها سر والأواحدًا بل مجموعة من القبعات الأوروبية المنتمة لحقبة الخمسينيات ومعظم ملابسها إن لم تكن كلها تحمل نمط التايجر البني.

- إنت جيت يا نوح؟

أخذت لولو تقفز أمامي كالمبوسة فتجاهلتها قائلاً:

- أيوه يا تيتة.

تخطيطُ الصالة ذات الصالون الفرنسي الأنيق والتحف المرصوفة بنظام والتي انشغلت الخادمة فكيهة في تنظيفها بالماء والليمون بحرصٍ واتجهتُ إلى المطبخ حيث وجدتُ جدتي تقف أمام الخلاط تمارس هوايتها المفضلة في جمع الفاكهة وعصرها وتعبئتها في أكياس بلاستيكية وإلقائها بالفريزر ثم تنساها لشهور فتلتقط رائحة الثوم والبقدونس واللحم النيء ثم تراها صدفة فتخرجها وتفكها من جمودها كي أشربها أنا بما تحمله من روائح متداخلة غصبًا وافتراءً.

أرخيتُ رأسي على الثلاجة التي امتلأت بمجسمات ممغنطة لبرج إيفل وقوس النصر وعلم فرنسا وبضع كلمات فرنسية قائلاً:

- في إيه يتاكل، يا سونة؟

استدارتُ بوجهٍ أسود متفحّمٍ جلعني أجفل متممًا:

- بسم الله الرحمن الرحيم.

- إيه، يا ولد؟! سُفت عفريت!

- إيه اللي على وشك ده؟

- ماسك القهوة.. فاضل ثلاث دقائق وأغسله.

صَبَّتُ الفراولة من الدورق في كوبٍ زجاجيٍّ وناولته لي فقلتُ:

- مش عايز أشرب. أنا جعان، يا تيتة.

- الأكل بيجهز.

نظرتُ حولي متفحصًا المطبخ السيراميكي الذي تلمع زواياه فقلتُ:

- أكل إيه اللي بيجهز؟ أنا مش شايف حلة واحدة.

- هيجهز دلوقتي، خُد دُش ونام شويتين هتصحى تلاقي الأكل

جاهز.

- أنا عايز أكل دلوقتي.

ده مش بنسيون عشان تاكل وتنام فيه وبس. -chéri-

- على فكرة هُمَّا اخترعوا البيوت عشان ناكل ونشرب ونرتاح، مش

عشان نخترع فيها الذرة.

أخذت تتمتم وتسبني بالفرنسية ثم نظرت في ساعتها الذهبية الرقيقة التي لا تخلعها إلا عند الاستحمام، واتجهت صوب الحمام وبدأت تفرك وجهها بشكلٍ دائريٍّ من ماسك القهوة فاستسلمتُ واتجهتُ إلى غرفتي التي نظفتها فكيهة وفاحت منها رائحة المنظف بالليمون، وبمجرد أن خلعتُ حذائي وسترتي وجدتُ نفسي أغوص في نومٍ لا سيطرة لي عليه.

هي ذكرى أكثر من كونها حلماً.

أقف في كهفٍ مظلمٍ بسقفه فجوات يتخللها نوراً ضعيفاً على استحياء
وأجد مجموعة من البدو جالسين مرتعشين بزاوية ثم ملكاً فرعونياً
يطوف حولهم ومحارباً فارسياً على حصانه الأسود يتجول بطرقات
الكهف وأرى نفسي صغيراً في الثامنة من عمري وأمامي شابة بدوية آية
في الجمال، لها بشرة رائقة وشعر أسود طويل وعينان واسعتان خضراوان
يكسوه ثوبٌ مطرّزٌ، تنحني على ركبتها وتفتح لي قبضتها ويدها ليمونة
صفراء ثم تهمس لي وعلى وجهها ابتسامة مشجعة:

- لو رايد الأمان، شق الليمونة يا إنسان وانطق اسمك بعد ذكر
السلام.

أخذ منها الليمونة وشقّها نصفين فإلتفت إليّ كلّ الموجودين فجأة ثم
أقول لهم بفخر:

- سلام عليكم، أنا نوح الألفي.

فيجيون جميعاً في صوتٍ واحدٍ: وعليكم السلام.

شعرتُ بيدٍ توضع على عيني وإصبع يُدسّ بلمي فاستيقظتُ من
حلمي منتفضاً لأجد التوأمين العفريتَيْن ابنيّ شقيقتي يلعبان في فمي
الذي يظل مفتوحاً أثناء نومي.

- يا ولاد ال...

ركضا مقهقهين خارج الغرفة فجلستُ بالفراش المقابل للنافذة المطلة على النيل وقد خيم الظلام على الأفق وتراقصت أنوار البواخر العائمة بالنهر.

فركت عيني ومسحتُ لعابي ثم تفقدتُ هاتفي، قطز لم يتصل.
خرجت من الغرفة على نباح لولو المزعج فصحتُ صوب المطبخ:
- ما تسكّتي علبه المناديل دي يا تيته.

خرجت نادية من المطبخ وهي شقيقتي الكبرى التي لا تشبهني في شيء سوى عينيّ العسليتين وغمازي البارزتين وعدا هذا، فهي قصيرة ومستديرة ولها بشرة فاتحة وشخصية متسلطة ونظر ضعيف وصبر قليل ومزاج عاصف بعكس زوجها طارق الذي وُلد وتربى بالكويت ثم عاد إلى مصر لدراسة الصيدلة بجامعة عين شمس، وقد تزوّجا فور أن أنهت دراستها ليمثلا زوجين مختلفين كل الاختلاف، ومع ذلك منسجمين كل الانسجام.

الاختلاف لا يتوقف عند أنه في غاية الطول وهي في غاية القصر وأن له بشرة داكنة ولها بشرة فاتحة بل لأنه شديد الصبر، طويل البال، بارد الأعصاب، دبلوماسي الردود، يتبع مبدأ ”حاضر بتريح“ فهو ينفذ تعليمات وأوامر نادية متجنباً ثورات غضبها القادرة على جعل حياته أسود من أيام النكسة ويتجلى ذلك في تربية أطفالها الثلاثة، تالا البالغة خمسة أعوام والتوأمن يحيى - على اسم والديّ الشهيد - وياسر البالغين من العمر ثلاثة أعوام، فنادية تضخم كل الأمور فيما يتعلق بصحة وتفوق

وتميز الأطفال وتصيح فيهم كالمجنونة إذا أخفقوا أو تعدوا حدود اللياقة التي لا يفهمونها بعد، بينما يظل طارق يتابع الأفلام الوثائقية على ناشيونال جيوغرافيك ببالي راقٍ.

لا أرى قاسمًا مشتركًا بين طارق ونادية سوى أن كليهما يرتدي نظارة نظر كبيرة ويجب صوت بافاروتي الأوبرالي ويدمن القرفة باللبن.

وعلى الرغم من اختلافهما إلا أنهما زوجان ناجحان لسبب أجهله؛ فهما قادران على إدارة عدة مشاريع معًا، حتى إنها يؤلفان روايات بوليسية مشتركة حازت على نجاح لا بأس به.

- كنت لِسّه هصْحِك قالتها نادية وهي تخرج أطباق الكسكسي بالخضار من المطبخ.

- عيالِك الشياطين كانوا يلعبوا في خلقتي.

جحظت عيناها وتطأير منها الشرر صوب الطفلين اللذين يحاولان امتطاء روي المستسلم لهما، وصرخت فيهما: بتعملوا إيبيبيبيبيبيب؟ أنا مش قُلت نقعد محترميبيبيبين؟ تعالوا هناaaaaaaaa.

خرجت "نالاً" التي ورثت من أمها غمازيتها ومن أبيها بشرته الداكنة وشعره الكثيف، من المطبخ وركضت صوي بحماسٍ طفولي يجعلني أفكر في الزواج لإنجاب طفلة تشبهها:

- نوووووووووووح.

حملتها عن الأرض وقبّلتها مداعبًا ضفيريّتها المشدودتين:

- حبيب قلبي... مربي بالتوت، يا ناس.

قالت من تحت ضرسها: أهو ده اللي إنت فالح فيه.. روح هات طبق الشورية وهزها شوية.

- حاضر، يا تيتة.

تجمعنا حول السفرة ولم يتوقف التوأمان عن قرص وركل بعضيهما من أسفل المفرش و”تالا“ تسألني كل دقيقة والأخري عن موعد تسليم البضاعة المهزبة وجدتي تأكل بأناقة وطارق يلتهم الكسكسي بنهم بينما وكزته نادية بمرفقها وقالت بصوت كالفحيح:

- براحة...مش آخر زادك.

- أصل تيتة بتعمل الكسكسي أحسن من المغاربة أنفسهم.

مسحت جدتي فمها بطرف منديل المائدة بأرستقراطية وقالت:

- أنا جبت وصفته من صديقة مغربية أيام ما كنا في السوربون، كان

اسمها سْكينة، هي

. La cuisine Marocaine اللي علمتني كل أسرار

بلع طارق الطعام وهز رأسه كالحمار قائلاً: طبعًا، طبعًا.

التفتت إليَّ نادية قائلة: شُفت، يا نوح خبر موت طه عبد اللطيف؟

- شُفته؟ ده أنا اللي متدبس في القضية؟

توقف كلُّ من نادية وطارق عن الطعام ونظرا لبعضيهما كالمتآمرين

وإذ بطارق يقول لي باسم الثغر بحماس البلهاء:

- قول والله؟

- إنت عبيط ولا إيه؟

قالت نادية بحماس مشابه: أصل أنا وطارق كنا بنفكر نكتب رواية عن الموت بالshc.

- الموت بإيه؟

أجابني طارق بطريقة عملية معدلاً نظارته:

- يعني الاحتراق الذاتي البشري، دي حالة نادرة جداً. في خلال القرنين اللي فاتوا، ما اتسجلش غير حوالي 200 حالة ماتوا زي طه كده. تركتُ الطعام قائلاً بفضولٍ: وضَّح لي.

- الموضوع ببساطة إن واحد بيموت محروق بدون ما المكان المحيط بيه يتأثر. الإنسان بيكون هو مصدر الحريقة، هو الفتيل. بيفضل يتحرق بشكل عمودي لحد ما يبقى رماد وده بسبب الدهون المتخزنة في جسمه بتبقى عاملة زي البنزين اللي مستنى شرارة صغيرة تولعه وما فيش شيء بيتحرق غير الإنسان نفسه أو أي شيء هو يلمسه و....

- اللي إنت بتقوله ده كلام علمي، يا طارق ولا رواية جديدة بتألفوها؟
أسرعت نادية مدافعة: طبعاً كلام علمي. دور على النت عن ظاهرة الاحتراق الذاتي البشري، في ناس ماتوا كدة وأشهرهم الأرملة "ماري ريزر" في الخمسينات والكونتيسة "كورنيلا دي باندي"، اتحولت لرماد وما اتبقاش منها غير...

قاطعتها قائلاً: ثلاث صوابع. قطز حكى لي عن الحوار ده.

- والفارس الإيطالي بولونوس فورستوس، شرب كمية كبيرة من النبيذ وبعدها ولَّع سيجارة واحدة فاحرق.. الموضوع مثير للاهتمام أوي وسبحان الله أنا وطارق كنا لِسَّه بنفكر نكتب حاجة كده بعد ما قرئت عن حادثة الكونتيسة في كتاب تاريخ بالصدفة، فدوّرنا على النت ولقينا يجي عشرين قضية مشابهة ماتت بالحالة دي وزمان في العصور الوسطي كانوا بيفسروا الموضوع ده على إنه سحر إسود ودلوقتي...

قاطعتها: دلوقتي يقولوا إنه غضب ربنا على طه الملحد الزنديق.

قال طارق: هو اللي يشوف الموضوع من بعيد يفتكر كده، خصوصاً إن قبلها يبجي إسبوع طلع في التلفزيون مع شيخ وقاله لو ربنا بتاعك ده متضايق من اللي بقوله خليه يرد علينا بنفسه.

قالت جدتي: وآديه رد.

التفتُّ لها قائلاً: إنتِ فعلاً مصدقة، يا سونة أن دي معجزة وغضب ربنا؟

- زمن المعجزات خلص، يا نوح. بس إن واحد يموت موة بشعة زي دي وما يلاقيش اللي يدعي له بالرحمة.. أظن ده أكبر غضب ممكن ينزل على حد.

فكرتُ في كلامها وكلام طارق ونادية ثم سألتها:

- طب لو افترضنا إن الكلام ده صح، وإن الجسم هو اللي بيتحرق ويعمل الحرارة دي. إزاي إيده وراسه سُلام؟

- غالبًا الإيد والرجل ينفصلوا عن باقي الجسم ويصابوا بحروق لكن مش بيتحولوا لرماد عشان دول أقل منطقتين فيهم دهون.. معظم اللي بيموتوا بالطريقة دي بيبقوا تخان وكبار في السن ويشربوا كحول كثير ومدخنين، وناموا ونسيوا السيجارة في أيدهم فولعوا زي ماري ريزر كده.

أضافت نادية: أو مثلاً كان فيه شمعة جانبهم زي الكونتيسة دي باندي.

- طب لو مافيش ده ولا ده؟

- أكيد فيه حاجة. لازم يكون في شيء هو حتى ولو شرارة من أي جهاز كهربائي أو موبيل مثلاً بيؤدي إلى حرق الدهون والأعضاء الداخلية ومن بعده يدوب اللحم و...

صاحت جدتي ممتعضة: إيه القرف اللي بتقولوه على الـ table ده، كلوا وانتوا ساكتين.

جلستُ مع نادية وزوجها اللذين أسهبا في الحديث عن هذه الظاهرة وأسرع طارق إلى شقته ليحضر اللاب توب فجلس ثلاثتنا نتناقش في الأمر وعرضنا عليّ كل ما جمعه من معلوماتٍ وأخبار عن حوادث مشابهة ثم وضعنا قائمة بالعلامات المشتركة بينها وأسباب حدوثها.

بعد مضي بضع ساعات من البحث الموسع، اتصلتُ بقطز الذي أجابني بصوتٍ ميت فسألته:

- إنت مارو حتش كل ده؟
- لأ. مستني حد يعبرني من البحث الجنائي.
- طب أنا تقريباً حطيت إيدي على خيط كده، في حاجة اسمها أثر الفتيل.
- مش فاهم.
- الكونتييسة اللي إنت قُلت عليها دي ماتت بحاجة اسمها الاحترق الذاتي البشري بتخلي الإنسان عامل زي الفتيل، يتحرق بشكل عمودي لكن ما يجرقش اللي...
- تثاءب: أنا مش فاهم حاجة.
- ما إنت بقالك يومين صاحي أكيد مش هتفهم حاجة. بُص، هديك كام حاجة تسأل عنها بتوع البحث الجنائي وروح نام وأنا هكمل.
- أمليتُه بضعة أسئلة وهو ينصت ويدوّن حتى تثاءب بشدة قائلاً:
- ماشي، وانت هتعمل إيه؟
- أنا هروح شقته أتأكد من كام حاجة كده.. بفكر أقابل طه نفسه.

(4)

أظن أنه قد حان الوقت لأخبرك الحقيقة الثالثة عن نفسي، بشرط أن تعدني أنك لن تتعجل وتحكم عليها بالخرافة والمبالغة ولتكن صبوراً وتنصت لحديثك؛ فحتى وإن لم تكن قصتي منطقية فهي حقيقية، بلا شك.

في عمر الثامنة، وهبني الله الحاسة السادسة.

أتذكر أن الأمر حدث خلال إجازة منتصف العام، عندما سافرنا إلى واحة سيوة، وقرّر أبي أن نشاهد الشروق من فوق جبل الموتى الذي تشاءمت أمي من اسمه بينما تحمست نادية لرؤيته ودخول المقابر الفرعونية المتراسة عمودياً في باطنه على شكل خلية نحل مرعبة.

كان فجراً بارداً، ولكن الملابس الثقيلة التي حشرتني فيها والدي كانت كفيلة بتحسيني ضد تلك النسبات الخبيثة المتسللة إلي صدري.

وصلنا عند هذه الهضبة العالية التي سُمّيت جبلاً مجازاً واقترننا من الدرجات الحجرية لنبدأ صعود الجبل المدهش، وبينما أخذ المرشد البدوي يتمم بمعلومات عن اكتشاف هذه الجبانة الأثرية صدفة أثناء

الحرب العالمية الثانية حيث احتمى فيها سكان الواحة من غارات الألمان، ثم أخذ يتكلم عن الأسرات الفرعونية المدفونة بالمقابر، سمعتُ همساً. صوت أنثوي ناعم يناديني باسمي. نظرتُ حولي فلم أجد سوى مجموعة من الأجانب العجزة يتمتعون بمنظر الواحة السحري من أعلى الجبل الصخري.

شعرتُ بالارتياح. المكان يبدو مخيفاً، ففتحات المقابر التي تخرق شكله المخروطي تشبه الأفواه المتلهفة لابتلاع أجساد الموتى المحنطين، وازداد خوفي عندما قال المرشد إنه يشاع أن جيوش قمبيز ملك الفرس قد بلعتها رمال هذا الجبل ولم يظهر لهم أثرٌ فانشغلت أُمي بتتممة آية الكرسي كلما ذُكرت كلمة موتى أو سحر أو مقبرة بينما شاهد أبي المباني والبيوت البدوية الدقيقة المرصوفة أسفل الواحة ملتقطاً بعض الصور وشقيقتي تدوّن كل معلومة يسكبها المرشد ذو الجلباب الأبيض وتنهال عليه بالأسئلة الدقيقة المفصلة.

عندما تأكدتُ أنه ما من مراقبٍ لي، تسللتُ من بينهم متبعاً صوت المرأة التي تناديني.

كان مصدر النداء فتحة مقبرة قريبة من السلام، وقفتُ عند طرفها بينما أكمل أهلي صعود الدرجات ظانين أنني خلفهم، ولكنني كنتُ أنظر للحفرة التي لم أرَ بها سوى ظلامٍ يتخلله ضوء خافت يتراقص بزواوية قاعها القريب.

ملتُ لأستوضح مصدر التور ففلتت ساقِي عند هاوية الحفرة وكدتُ
أسقط على وجهي لولا يدٌ خفية تلقفتني فسقطتُ على مؤخرتي بدلاً من
وجهي ونزلتُ على الأرضية المنخفضة ثم تلفتُ حولي فلم أجد أحداً ولا
مصدراً للضوء الضعيف الذي كان بالزاوية، لا أحد غيري بهذه المقبرة
الفرعونية ذات السقف الواطي فنهضتُ ونفضتُ الرمال عني وبدأتُ
أنفرج.

كانت تشبه الكهف الصخري بأفلام الكارتون وامتلاأت جدرانها
بنقوش وصور لبشر بروؤس حيوانات أسفل شجرة مخيفة متشابكة
الأغصان، أذكر أن أُمي أخبرتني أنها تدعى شجرة الجميز.

فكرتُ في كيفية التسلق إلى الفتحة والخروج، ولكنني سمعتُ اسمي
ثانية فتركتُ الحجرة المربعة متبعاً ذاك الصوت العذب ومشيتُ في دهليز
مستطيل ضيق وبالرغم من أنني وحيدٌ في جوف ذلك الجبل الموحش إلا
أن روح المغامرة دفعتني وكأنني أحد المغامرين الخمسة، وبهذا الحماس
الطفولي، سرتُ وضوء حمرة الفجر الخافت يتسلل من فجوات سقف
الجبل فيضيء أجزاء من طريقي حتى سمعتُ بكاء أطفالٍ وهمسات
خافتةً ثم شعرتُ ببرودة مباغتة وشممتُ رائحةً غريبةً ورأيتُ منظرًا
أغرب جعلني أتوقف وأراقب في صمت.

مجموعة كبيرة من الأشخاص يرتدون جلابيب بدوية، جالسين أرضاً
ومتكومين بالزاويا ملتصقين بالجدران الصخرية مرتعشين ويحتضنون
أبناءهم ونساءهم في هلعٍ وينظرون لأعلى بين الفجوات التي تحترقها

أصوات مخيفة تشبه أصوات الطائرات الحربية بالأفلام التي يجعلني أبي أشاهدها عن حرب أكتوبر فخفتُ من عنف الصوت المقرب وكأن الطائرات ستسقط فوق الجبل، ولكن قطعَ خريز المحركات سهيلُ خيلٍ فالتفتُ لأجد حصاناً أسود ذيله مجدل وشعره مقصوص وعلى ظهره سرج أنيق دقيق التطريز، يمتطيه فارس يرتدي زياً حربياً معدنياً ودرعاً حديداً وبیده اليسرى راية مرفرفة عليها قرص شمسٍ ذهبيٍّ واليمنى سيف حاد وعلى رأسه خوذة ثقيلة تنتهي بريشة نعام بيضاء كبيرة.

شقَّ المحارب الممَّر بحصانه وعبرَ من خلال أجساد البدو الخائفين من الطائرات فاهترتُ صورتهم كصفحة الماء عندما تلقي بها حجراً ثم ثبتت الصورة ثانية ولم يُبدوا أيَّ تعبيرٍ أو رد فعل ولم يلتفتوا حتى للفارس وكأنه لم يعبر من خلالها منذ لحظة، بل ظلوا يرتعدون وينظرون لفتحات الجبل كمنتظري الموت.

أخذتُ أراقب ممتطي الجواد الأسود الراكض بالجوار حتى أراعيني صياحٌ غاضبٌ فاستدرتُ لأجد نفسي على مقربة من باب مقبرة أكثر أناقة ونظافة من تلك التي سقطتُ بها.

وقفتُ عند مدخلها ونظرتُ لجدرانها المزينة برموزٍ ملونة باللون الأحمر، ولكني لم أهتم للنقوش الفرعونية فقد تثبتت عيني على الأرض حيث يرقد تابوت حجري مغلق خرج منه ملك فرعوني عاري الصدر يرتدي حلي ذهبية من رأسه حتى أخمصه.

عبر من خلال الغطاء الحجري للتابوت فنفذ منه دون أن يفتحه ثم وقف ولم ينظر صوبي كأني غير موجود على الرغم من قربي منه.

نظر حوله بعجرفة ثم رفع رأسه بغرورٍ ومَرٍّ من خلالي.

شعرتُ ببرودةٍ مخيفةٍ انتصبَ لها شعر جسدي كله وزادت ضربات قلبي وبدأ الخوف يتملكني فور أن عبر من خلالي ولكن فجأة، شعرتُ بيدٍ توضع على كتفي فالتفتُ لأجد شابة ترتدي ثوباً أبيض له أكمام واسعة، مطرراً عند الصدر كملايس كل سكان الواحة.

كانت تحمل في يدها مصباحاً زيتياً تتراقص به شعلة تعكس ملامحها: عينيها الواسعتين الداكنتين، شفاها المكتنزة، أنفها الدقيق ووجنتيها التفاحتين وشعرها الأسود الواصل لخصرها.

وضعتُ يدها المزينة بأكسسوارات فضية تغطي كفها كُلَّهُ وابتسمت بحنانٍ فأذهبت عن جسدي القشعريرة والبرودة التي خلفها الملك وعندما تكلمتُ، عرفتُ أنها من كانت تناديني منذ البداية.

- ما تخافش.

نظرتُ حولها حيث البدو الخائفون من أصوات الطائرات والفرعون الذي يمشي بزهوٍ، والفارس الذي يطوف بحصانه ثم نزلتُ على رُكبتَيها وكانت تفوحُ منها رائحة الليمون النضر التي ازدادت بوضوحٍ عندما اقتربت مني وهمست برفق:

- لورايد الأمان، شق اللمونة يا إنسان وانطق اسمك بعد ذكر السَّلام. لم أفهم ما تعنيه، ولكنها فتحتُ قبضتها فرأيتُ بها ليمونة صفراء كبيرة، قدمتها لي بابتسامة تشجيعية فأخذتها ببلاهة الأطفال وحاولت أن أشقَّها.

رائحة الليمون تجذب الأشباح لذلك أٌبقي واحدة بجيبي كلما أردتُ
الاستعانة بروح هائمة.

منذ ذاك اليوم وأنا أشق الليمون وألقي السلام ثم أنطق اسمي كلما
رأيتُ روحًا...

بعد منتصف الليل اتجهتُ لميدان طلعت حرب، وأمام العمارة 6،
رأيتُ روح تلك الطالبة التي دُبِحَتْ في سيارتها وتولى قضيتها صلاح
الشبكي.

كانت كسائر الأرواح، شفاقة يمكنك الرؤية من خلالها وترتدي
نفس الملابس التي قُتِلَتْ بها، وتظهر بعد يوم كامل من موتها في نفس
المكان الذي ماتت به.

كانت كمعظم الأطياف، لا تعلم أنها ميتة. فقد كانت تقف مكان
سيارتها - التي تحفظ عليها فريق البحث الجنائي - وتتلقت حولها في
توترٍ، وكلما مرَّ أحدهم بجوارها تذهب صوبه قائلة:

”لو سمحت، ما شوفتش عربيتي؟!“

ولكنها لم تجد أية أجابة، فما من أحد يراها بل إن هناك شابًا متعجل
عبر من خلالها دون أن ينتبه فوقفت مشدوهة تنظر لجسدها الشفاف في
هلعٍ.

قد يشعر بعضُ الأحياء بوجود روح ميت تطوف حولهم بأن يشتموا
رائحة مفاجأة لا مصدر لها مثل رائحة دخان قوي أو عطر نفاث أو

يחסوا بتغيّر مفاجئ وغير مبرّر في درجة الحرارة، ولكن أن يروا الأشباح بوضوح، فهو أمرٌ يحتاج لعينٍ أثيرية كالتي حصلتُ عليها بجبل الموتى. فيما يخصّ الأشباح، لديّ بضع قواعد.

القاعدة الأولى: لا تتعامل سوى مع الشبح الذي يهّمك أمره؛ لأنّ باقي الأشباح ستظلّ ملتصقة بك لكونك الوحيد الذي يراهم فهم يعانون من الوحدة ولن يدعوك وشأنك بل قد يطلبون منك طلبات سخيفة كأن توصل رسائل لأهاليهم من الأحياء أو أن تتقم لهم؛ لهذا صفتُ سيارتي وتجاهلتُ روح الطالبة المدعورة ثم صعدتُ بناية جروبي حيث وقف عسكري حيّاني وانتظرت قدوم البواب الذي سألته وهو يفتح باب شقة القتل مرتبّكًا.

- طه كان تخنن في الفترة الي فاتت؟

- لا، يا باشا. طول عمره رياضي وجسمه ولا أجدعها شاب.

- طب كان بيشر ب؟

- يشرب إيه؟ قصدك منكر يعني؟ تصدق بالله، مع إنه كان كافر بس

لا كاس ولا سيجارة.

زادت الأمور تعقيدًا، فالكحول والتدخين وزيادة الوزن هم الأسباب الرئيسية للاحتراق الذاتي.

- يعني عمرك ما شفته بيدخن؟ ولا حتى تفاريح؟

- عمره يا باشا. أصل أبوه مات بالمرض الوحش من كتر السجائر

فكان خايف يموت زيه.

- طب كان بياخذ منوّم؟

- والله ما عرف يا باشا.. إنتوا لقيتوا اللي قتله؟

- وإنت مالك إنت.. يلا غور وما تطلعش غير لما أندهلك.

رحل فدخلتُ الشقة بحذرٍ وصولاً إلى غرفة نومه وقد ترك فريق البحث الجنائي علاماتٍ بالحجرة كانت أهمها علامة الكرسي الذي نُثِرَ عليه رماده.

ارتديتُ القفازات الطبية حتى لا أفسد موقع الجريمة ثم نظرتُ إلى مكان المقعد الذي كان يبعد عن السرير ببضعة سنتيمترات.

لو كان طه قد مدَّ يده أو حتى رفع ساقه وهو يحترق للمس السرير وأحرقه بالكامل.

لَمْ يَنْهَضْ عن كرسيه ويصرخ ويطلب النجدة عندما أدرك أنه يحترق؟!

لو كان تحرك أو ترنح لكانت احترقت أجزاء من الأثاث وإن لم تكن الغرفة كلها.

في قضية ”ماري ريزر“ كان السبب أنها تناولت منوّمًا فتأخر إدراكها لكونها تحترق حتى اختنقت من الأدخنة السامة وماتت قبل أن تتحول لرمادٍ مثورٍ، ولكن ماذا عن طه الذي لم يجد فريق البحث الجنائي دواءً منوّمًا أو مخدرًا.. اللهم إلا مجموعة من أدويته الخاصة؟!

أخرجتُ الليمونة الصفراء من جيبى وداعبتها مفكرًا.

إذا كانت ظاهرة الاحتراق الذاتي البشري حقيقية وتأثير الفتيل الذي يصيب القتل يعني أنه يحترق عمودياً لكانت تركت أدخنة النيران المتقدمة أثراً على السقف فوق موقع الضحية، ولكان الكرسي قد تآكل بالكامل كما حدث في الجريمة التي قرأتها بعناية: الأرملة المسنة احترقت إثر تدخين سيجارة وقعت من يدها عندما غفت من تأثير المنوم الذي أخذته قبل النوم فاحترقت ملابسها وأكلت الدهون الداخلية جسدها كله وكرسيها هلك مثلها، ولكنها كانت تشرب الكثير من الكحول وتدخن وقد تركت النيران آثاراً على بعض الأشياء بغرفتها وعلى السقف والسجاد وبعض الأسلاك البلاستيكية وبخاراً على النافذة وسحابة من الدخان الأسود حتى إن حرارة مقبض الباب النحاسي قد ارتفعت وعجزوا عن فتحه بسبب بعض الأجزاء التي ذابت به ولم يحدث أيُّ من هذا في جريمة طه.

ليس فقط أن الغرفة بأكملها لم تُحس، بل إن طه ليس بسمينٍ ولا بمُدخِّنٍ ولا بسِكِّيرٍ، وكرسيه أصيب بحرق طفيف، ولكن ما أسفل وما فوق الكرسي لم يمسسه سوء.

بالإضافة إلى أن لحم وجهه لم يذوب بل احترق جلده وطُمِسَت معالمه فحسب وهو عكس ما يجب أن يحدث لمصابي هذه الظاهرة التي يبدو أنها لا تتماشى مع قضية طه ولا تناسب حالته؛ فكل من توفوا بتأثير الفتيل ماتوا مصادفة وليس بفعل فاعل ولا انتقاماً منهم.

طه لم يمت مصادفة، هناك من دَبَّر له هذه الميته المحكَّمة، هناك من أراد أن يجعل منه عبرةً.

أخذتُ نفساً عميقاً وأخرجتُ السَّكِينِ الصغير الذي أحضرته معي
وشققتُ الليمونة بعناية.

أبقيتُ نصفاً بيدي وأعدتُ الآخر إلى جيبِي برفقة السكين.
خففتُ إضاءة الغرفة القوية واكتفيت بضوء مصباح المنضدة،
فالأرواح لا تضح في الضوء الساطع أو الظلام القاتم.

لو كانت روح طه بشقته - وهو المكان الذي يجب أن تكون به -
فسوف تجذبها رائحة الليمون وستعطيني الأمان وتسمح لي بمخاطبتها.
من المُفترَض أن تحل روحه على الأرض في اليوم التالي بالساعة نفسها
التي قُتِلَ بها، ولكن متى ستظهر تحديداً؟

توقفتُ عن التفكير المفرط؛ فعند استقبال روح أحد الموتى يجب أن
تصفي ذهنك حتى لا تتشتت الروح التي تودُّ التواصل معها وتخيفها
فتهرب منك.

شعرتُ ببرودة خفيفة، بدأتُ الليمونة تجف تدريجياً، نظرتُ حولي
ببطءٍ منتظراً أن أرى طه.

ازدادت البرودة مع بداية تغيُّر لون الليمونة ثم فاحت رائحة عطر
قوي.

لم أتشتت ولم أبعاد عيني عن النقطة التي أنظر إليها، وتجاهلت تلك
القشعريرة وهذه الرجفة الداخلية التي لا تقل بالرغم من رؤيتي لمئات
الأشباح ولكن كلما اقترب طيفهم زادت نبضات قلبي، وبعد كل هذا
المجهود إذ بي أجد شبحاً غير الذي أنتظره.

تلك الطالبة الهائمة وقفت بمنتصف الغرفة وعلى وجهها علامات
الذهول والتعجب وأخذت تنظر لنصف الليمونة ثم لي وللحجرة كلها.
بلعتُ ريقِي وكتمتُ غضبي، ربما يجب أن أتظاهر بأني لا أراها حتى
ترحل ولكن عيوننا التقت فأبعدتُ نظري ولكنها قالت:

- إنت شايفني؟

لم أُجِبهَا وتظاهرتُ بأني أتفحص السرير، فاقتربت مني قائلة بِالْحَاحِ:

- يا أستاذ، حضرتك شايفني؟ يا أخي، إنت سامعني؟

يا لحماقتي! لقد جذبتُ الشبحَ الخطأ.

لمْ لم أفكر في أنّ روحها تطوف بالمكان وستنجذب كغيرها إلى رائحة
الليمون؟

تجاهلتُها، ولكنها مدت يدها عبر منتصف رأسي فشعرتُ بأن عقلي
تجمد فصحّت: لا لا لا.

القاعدة الثانية: إياك وأن تجعل شبحًا يلمسك.

ابتسمت مبتهلة: يعني إنت شايفني!

القاعدة الثالثة: تحدّث مع الأرواح باحترام، كأنهم شخصٌ حيٌّ وأبدأ
دائمًا بالسلام.

زفرتُ قائلًا: سلام عليكم، أنا نوح الألفي.

- وعليكم السلام، أنا بُشري. أنا كنت بدور على عربيتي وبعدها
شميت حاجة ...

- شميت ريجة اللمون.

- أنا عمري ما حبيت ريجته بس مش عارفة ليه لقيت حاجة بتشدني
إني أطلع العمارة وأدخل الشقة ... نظرت حولها قائلة: أنا إزاي دخلت
الشقة وبابها مقفول؟

خرجت للصالة وتأكدت من أن الباب مو صدًا.

القاعدة الرابعة: أخبرهم بأنهم موتى بطريقة تدريجية حتى لا تربكهم.

- عديت من الباب وهو مقفول.

ضحكتُ وظنت أنني أمازحها ثم قالت: إزاي يعني؟ أكيد ده حلم،
أنا كنت بايئة عند صاحبتى وبذاكر وحلمت إني ركبت عربيتي وكان
في حد قاعد ورا دبطني وبعدها صحيت من الكابوس الفظيع ده.. كان
كابوس مرعب خالص كأنه...

- كأنه حقيقي هزت رأسها موافقة فأضفت: للأسف هو فعلاً
حقيقي.

ضحكتُ بالطريقة نفسها وقالت: هو إيه اللي حقيقي؟

- اللي شفتيه ماكانش كابوس.. دي حاجة حصلت بجد.

صمتتُ ثم قالت مرتبكة: بجد إزاي؟ إيه الهزار السخيف ده؟ إنت...

- أنا النقيب نوح الألفي وأنا بنفسى سُفت جثتك.

صاحت بكلمات متقطعة: جثة.. أنا.. مية إزاي؟ مية إزاي وانت

شايفني وبتكلمني أهو؟

- ماحدث غيري يقدر يسمعك ويكلمك.

- بس...

أخرجتُ النصف الآخر من الليمونة وبدلته بذاك الذي جفَّ منتظرًا
ظهور روح طه في أية لحظة، ولكن بشرى لم تتوقف عن الهديان:

- يعني أنا عفريته؟

- لأ. إنتِ روح، طيف، شبح لكن مش عفريته. العفاريت، كائنات
تانية مستقلة بذاتها.

صاحت: إنت مجنون يا عم إنت؟!!

ثم خرجت من الغرفة كما دخلتها فزفرتُ بارتياح وجلستُ عند
طرف السرير منتظرًا ظهور شبح طه، ولكن من الواضح أن السويغات
التي نمتها ببتي لم تكن كافية فلقد غفلتُ ثانية ثم أتاني شعور بارد بأن
هناك من يراقبني ففتحتُ عيني بغتة لأجد طيف بُشرى جالسًا بجواري
وعلى وجهها حزن شديد فقالت لي منكسرة:

- ماحدث شايفني، الناس بتعدي مني كإني شبح... أو.. هو أنا

اتدبحت فعلاً؟

فركت عيني وعدلت جلستي ثم تفقدتُ ساعتِي، إنها الثالثة فجراً.

نظرتُ لنصف الليمونة، لم يتغير لونها ولم تجف، شبح طه لم يظهر

بعد.

- أيوه.

- ليه؟
- مش عارف.
- مش بتقول إنك ظابط؟
- أيوه بس مش أنا اللي شغال على قضيتك.
- أو مال مين؟ أنا عايزة أتكلم معاه.
- لا هيسمعك ولا هيشوفك.
- إشمعنى إنت شايفني وسامعني؟
- عشان.. كيف أشرح لها الأمر: ربنا مديني حاسة مش عند غيري.
- الحاسة السادسة يعني؟ سوبرهيرو إنت؟
- لا سوبر ولا زفت، أنا بس.. زفرتُ ثم أكملتُ على مضض: فيه مكان في سيوة اسمه جبل الموتى وقعت في المقابر اللي عنده طلعت بعرف أشوف الأشباح وبتكلم معاهم و...
- زي مسلسل ساحرة الجنوب كده؟
- لا مش زي ساحرة الجنوب، ساحرة الجنوب اتلبست، لكن أنا.. أنا بشوف وبسمع وبتكلم مع أرواح الميتين طول ما هُتمَّ على الأرض وبس. ماعنديش تفسير علمي أو منطقي للموضوع.
- قصدك إيه بطول ما هُتمَّ على الأرض؟
- الروح بتفضل أربعين يوم على الأرض.
- بعد كده بتروح فين؟

- مش عارف، بيقولوا بتطلع السما أو بتنزل القبر أو بتنتقل للبرزخ.
ما تسألينيش.

- والناس عارفة إنك بتشوف الأرواح وبيتعاملوا معاك عادي؟

- كان بودي أحكي لك قصتي المشوقة بس عندي شغل ووجودك
مشتتني، فرصة سعيدة.

- فرصة سعيدة؟! هو أنا قابلتك صدفة في ستاربكس يا عم إنت؟
أنا اتدبحت وبقيت روح وماحدش شايفني غيرك. رجلي على رجلك.
تمتمتُ: بدأنا في شغل الستيكز الأمريكاني.. أنا مش هفيدك في حاجة.
- لآ، هتفيدني. أنا عايزة أتطمئن على مامي وأخويا وأعرف مين اللي
قتلني وقتلني ليه و...

- إنتي جاية لي أحقق لك أحلامك.. أنا عندي شغل ولبست قضية
رأي عام معقدة أكثر من قضيتك مية مرة.

- يعني أنا دمي يروح غدر عشان حضرتك ماسك قضية رأي عام؟!!

- معاليك مش أنا اللي ماسك قضيتك، اتكلي على الله.

- طب أقسم بالله لو ما عملت اللي بقولك عليه لأعفرتك.

سألته ساخرًا: هتعفرتيني إزاي بقي؟

- هلبسك.

- الجن والعفاريت هُمَّا اللي بيبلسوا الإنسان مش أرواح الميتين.

- طب.. هيجنك ه...

- خيليني أوضح لك إنك روح مالهاش أي قوة فيزيائية. إنت ما تقدريش تشيلي ورقة من على الأرض، فكك من جو ”بارانورمال أكتيفيتي“ ده.

ارتبكت وتراجعت ثم همست: يعني أنا.. مالياش أي قوة خارقة؟
- آخرك تعدي من الباب وهو مقفول.

ظلت واقفة مكانها وقد ثبتت نظارتها على أنفها ثم أرجعت خصلة بنية خلف أذنها وهي تفكر بينما حاولت الاتصال بقطز، ولكن هاتفه كان مغلقاً حتى قالت هذه الروح اللحوحة:

- يمكن ما أقدرش أذكك كروح، بس أقدر أهبدلك كَبِنْت وأفضل أزن في ودانك لحد ما تكره حياتك وتلف حوالين نفسك زي المجانين.
لم أجبها، ولكنها جلست بجواري على السرير وبدأت تصيح بصوتٍ حادٍ:

- مين اللي قتلني؟ ها؟ مين اللي قتلني؟ مين؟ مين؟ مين؟
البنات حتى وإن مُتن لا يتخلين عن أعز ما يملكن: قدرتهن الخارقة على الزن.

أخرجت ساعات الهاتف وأوصلتها بالموبايل وشغلت الأغاني لينساب صوت حكيم إلى أذني:

- طب الله الله الله الله الله الله، إيه ده إيه ده إيه ده إيه ده ده.
أحبال حكيم الصوتية الخارقة غطت على صوت شبح بشري ذي

الطين، وقد رأيتُ الضيق على ملامحها وبدأت تطوح يديها في الهواء بغضب وتحاول أن تجذب الساعات أو تغلق الهاتف، ولكن أصابعها الطيفية تمر من خلال الأشياء كالهواء دون أن تقوى على إمساك أيٍّ منهم حتى.

أعادت فعلتها الأولى ومررت يدها من خلال رأسي فغمرتني رجفة نتجت عنها برودة وقشعريرة داخلية مباغته فانتفضتُ صائغًا:

- إياكِ عملي كدة تاني.

لو كنتُ بالمنزل، لأشعلتُ البخور وجعلتها تخنق وتفر بعيدًا.

ابتسمتُ ظافرة فقلتُ لها: أنا بقولك بكل أدب، إمشي. ورايا شغل.

- شغل إيه وانت مريِّح على السرير وتلعب بلمونة بايظة و...

- مش موضوعك أنا بعمل إيه. أقولك حاجة حلوة؟ روجي اتطمني على أمك.

- اسمها مامتك.

- الست الوالدة، روجي شوفها.

- ما هي مش هتشوفني.

- بس إنتِ هتشوفها وتطمني عليها... يلا، انصري.

- طب أروح إزاي؟ مش هقدر أمشي كل ده.

- لو صفيتِ دماغك وبطلتِ زن وفكرتِ فيها بوضوح هتلاقي

نفسك واقفة قدامها.. مش كنتِ بتسأليني عن القوى الخارقة؟ يلا، يا

ست السوبرهيرو وروحي لمامي.

نظرت لي بشك، ولكنها أغمضت عينيها وظلت هكذا لبضع دقائق
حتى اختفت، أتمنى ألا تعود.

أذنَّ الفجر وتخللت السماء الداكنة بضعة خيوط من النور الباهت
وبدأت تظهر السيارات المتحركة بالشوارع ولم تظهر روح طه بعد.
الساعة تقترب من الخامسة، كيف لم تظهر روحه بعد، لقد تلقينا بلاغاً
من البواب بأنه ميت في تمام السابعة فمن المفترض أنه ميتٌ بعد منتصف
الليل حيث رآه البواب آخر مرة.

أين طيفك، يا طه؟

- أنا شُفتها.

التفتُ لأجد بشرى جالسة على طرف السرير حزينة ومهمومة.

- رجعتِ ليه تاني؟ خليكِ جانبها.

- جت لها جلطة. بدأت تبكي: أنا عايزة أعرف مين عمل فياً كده،

وليه؟ أنا طول عمري في حالي مابعملش حاجة غير المذاكرة والجامعة

وبس، ليه حد يقتلني ويقهر مامي كده؟

اللعة على دموع النساء التي لا أتحمّلها.

- ما تعيطيش طيب.

- أنا عايزة أعرف ليه؟ لو ساعدتني أعرف، أوعدك هحل عنك

ومش هتشفوني تاني.

- زفرتُ مستسلماً: إنتِ ليكي أعداء؟ حد بيكرهك؟
- لاء، أنا في حالي، آخري أتخاقت عشان درجة زيادة ولأ مع حد مش شغال كويس في البروجيكت لكن أخلي حد يقتلني كده و... .
- في الغالب اللي قتلك مايعرفكيش، أظن إنه قاتل مأجور.
- ومين اللي يدفع فلوس لحد عشان يدبحني؟
- يمكن مثلاً حد بيكره أبوك، مش لازم بيقى عدوك أنت.
- بابي مات ومامي حامل فيّ، مين العدو اللي هيقتلني بعد عشرين سنة من موته.
- طب وماما؟
- مامي غلبانة وماهاش في أي حاجة، بتدرّس في الـ AUC والكل بيحبها.
- يمكن حاجة حصلت مثلاً أو... .
- استحالة حد يكره مامي لدرجة إنه يقتلني بالطريقة البشعة دي.
- وأخوك؟
- متجوز روسية وعایش في الغردقة وفتح أوتيل هناك.
- صمّتُ مفكراً حتى سألتها ثانية: ليك مثلاً في السياسة أو المظاهرات أو... .
- مش بفهم فيها. أنا حتى مش بشترك لا في اتحاد الطلبة ولا تنظيم الرحلات ولا... .

- طب إحكيلي اللي حصل قبل ما تموتي بالتفصيل يمكن أخلص من زك.

- أنا كنت بذاكر عند وفاء والمفروض هبات عندها عشان نخلص البروجيكت بعدها اتصلت بهامي أتطمئن عليها لكن ماردتش لا على الموبايل ولا التليفون الأرضي، افنكرت حصل لها حاجة واترعبت، نزلت بسرعة للعربية و...

- كانت الساعة كام لما نزلت؟

- حوالي واحدة ونص بالليل، جيت أفتح العربية لقيت المفتاح مش راضي يدخل وبدأت تعمل إنذار، بصيت على اللوحة لقيتها عربية تانية راكنة قدام عربيتي لكن نفس الشكل بالظبط بس عشان متلهوجة ماخذتش بالي. ركبت عربيتي، قلعت الشنطة ورميتها جانبي لقيت الباب بيتفتح وحد بيركب ورا ولا بس جواتي، شد رقبتني وأنا بحط المفتاح في الكونتاك وكتم بؤي عشان ما أصرخش ودبحني بسكينة غريبة زي اللي في الأفلام الأمريكياني.

- عربية نفس عربيتك بالظبط؟

- بالظبط، نفس اللون والنوع وحتى نفس الخبطة اللي ورا.

عقدت أصابعي قائلاً: خدت بالك من رقم العربية دي؟

- آه. كانت أمي 30 / 1.

- أمك؟!!

- قصدي أ. م. ي 301.. أنا حفظتها عشان تاريخ ميلاد مامتي فعلاً

1/ 30 فاستغربت.

أخرجتُ هاتفي وبحثتُ عن رقم ضابط بالمرور كان بدفعتي فقالت:

- بتعمل إيه؟

رفعتُ يدي في وجهها كي تصمت عندما أجبني زميلي:

- نوح باشا.

- حازم بيه، كله تمام؟

- الأمن مستتب.

- بقولك، كنت عايز أسأل عن عربية، أ. م. ي 301 عايز أعرف اسم

وعنوان صاحبها.

- عيوني، يا غالي. حبة وأكلمك.

أنهيتُ المكالمة ثم جربتُ الاتصال بقطر ثانية، ولكن هاتفه مازال مغلقاً فقالت بُشري:

- صاحب العربية له علاقة بموتي؟

- غالباً صاحب العربية هو اللي كان هيتقتل مش إنتِ.. أكيد صاحبة

العربية واحدة ست، يمكن تكون في رُفَعك وطولك وشكلك وبتسوق

نفس العربية ومن حظك المهيب إنكم ركتتوا في نفس الحتة في نفس

التوقيت. اللي قتلك قتلك غلط عشان كده بعد ما دبحك ركز في وشك

لقاه مش هو فهرب بسرعة ونسي الباب مفتوح و...

صاحت: يعني إيه؟ أنا اتقتلت غلط، يعني...

- هتفرق معاكي غلط ولا صح؟ في الحالتين إنت ميتة.
- لما أتدبح زي الخروف بدون ذنب يبقى حرام.. إنت لازم تقبض على اللي عمل كده، لازم...
- رنّ الهاتف برقم حازم فأجبتته سريعاً:
- باشا.
- العربية بتاعة واحدة اسمها شهرزاد محمد أحمد زكي، ساكنة في 6 ميدان، طلعت حرب.
- شكلها إيه الست دي؟ صورتها عاملة إزاي؟
- رفيعة وشعرها ناعم وعينها خضرة، مُرّة صغيرة كده.
- ألف شكر يا حازم. التفتُّ لها: صاحبة العربية شبهك، خيط القضية معاها.
- يبقى نروح لها و...
- مش كنتِ عايزة تعرفي مين اللي قتلك؟ خلاص بقى آدينا عرفنا، صباحك مرَبّي.
- نظرتُ صوب النافذة وقد أشرق ضوء الصباح بعد أن دقت الساعة السادسة والنصف ثم التفتُّ إلى نصف الليمونة الذي لم يمس.
- لو مش إنت اللي هتكمل الموضوع يبقى عرّف الظابط اللي ماسك قضيتي الحاجات اللي إنت عرفتها دي و...
- أنا أساعد صلاح الشُّبكي عشان يحل قضية؟! على جثتي.

- حرام عليك، لو عندك أخت ترضى إن...

- من غير ما تكلمي الأسطوانة اللي كلكم حافظينها دي.. هروح أقوله إيه؟ روح القتيلة اللي بتحقق في قضيتها طلعت لي وقالت لي فيه عربية بنفس...

- خليه يسأل البواب. هو أول ما شافني جري يلّمع لي العربية ولما نزلت منها قالي لا مؤاخذة افكرت الأنسة شهرزاد، قول للظابط ي...
رنّ الهاتف ثانية فأجبتُ سريعًا:

- إنت فين، يا قطز؟

- الموبايل فصل. أنا لِسّه داخل المكتب دلوقتي، تعالى عشان فيه مستجدات مش هتصدقها.

- انجز، يا قطز.

- كل اللي خلتنى أسأل عنه في البحث الجنائي طلع مش موجود، مافيش عضم للعامود الفقري والجمجمة ما اتمدتتش من أثر الحرارة، ومافيش آثار دهنية على الكرسي وخذ عندك المفاجأة.

- ها؟

- اللي على الكرسي ماكانش رماد طه.. طلع أسمنت مخلوط بشوية حاجات.

لم يظهر طيف طه وظلت روح بشرى تتبعني مثرثرة عن ضرورة مساعدتها لإيجاد قاتلها، ولكنني بقيتُ أتماهلها حتى وصلتُ للقسم حيث جلس قطز بغرفة مكتبنا وسط مجموعة من الملفات والتقارير يشرب الكاكاو متثاءبًا بصوت كالزئير ودخلت معي بشرى وظلت واقفة أمامي واضعة يديها في خصرها معترضة على تماهلي لها، ولكنني وجهتُ كلامي لقطز:

- أسمنت؟! -

أعطاني ورقًا قائلًا: نتایج المعمل أهي، الراس والصوابع يخلصوا طه لكن الرماد لأ.

دعكْتُ عيني: يعني كده جثة طه عبد اللطيف مش كاملة؟

التفتت بشرى قائلة: هو طه عبد اللطيف بتاع جرنال المعارف مات؟

هزرتُ رأسي قائلاً: مات في نفس الليلة اللي إنتِ مُتِّ فيها.

نظر قطز حيث نظرتُ، ولكنه لم يرَ بشرى فقال بتحفظ:

- إنتِ معاك ضيوف؟

همستُ: البنيت اللي اتدبحت إمبارح.

نظر صوبها وقال كالأبله: سلام عليكم.

سألتنِي بشرى: هو شايفني؟

أجبتها: لأ.. إنتِ تعرفي طه عبد اللطيف؟

- هو في حد في مصر ما يعرفوش؟ مات إمتي؟ ده أنا لِسَّه شايفاه

أمبارح.

- سُفْتِيهِ إِمْتِي؟

- سُفْتَهُ لِمَا... صَمَمْتُ قَلِيلًا ثُمَّ ابْتَسَمْتُ بِخَبْثٍ: أَنَا مُمْكِنٌ أَقُولُكَ
كُلَّ حَاجَةٍ بِالتَّفْصِيلِ بَسْ لَوْ إِنْتُ رُحْتُ لِلظَّابِطِ التَّانِي وَخَلِيْتَهُ يَدُوْرُ وَرَا
شَهْرزَادِ دِي.

زَفَرْتُ مُتَضَايِقًا: اللّهُمَّ طَوِّلْكَ، يَا رُوحَ.

قَالَ قَطْرٌ هَامِسًا: فِي إِيهِ؟

- بِتَقْوَلُ إِنَّهَا شَافَتْ طَهَ قَبْلَ مَا يَمُوتُ وَمَشَّ هَتَقْوَلُ شَافَتْ إِيهِ غَيْرَ لِمَا
أَسَاعَدَهَا فِي قَضِيَّتِهَا.

- طَبَّ قَوْلُهَا إِنْ صَلاَحٌ هُوَ الْيَاسِ مَاسِكُ قَضِيَّتِهَا مَشَّ إِحْنًا.

- مَا أَنَا أَتَيْتُ قُلْتُ. هِيَ مُصَمِّمَةٌ نَدِيْلَهُ الْمَعْلُومَاتِ الْيَاسِ عِنْدَنَا عِشَانٌ...

- مَعْلُومَاتُ إِيهِ الْيَاسِ عِنْدَنَا؟

قَصَصْتُ عَلَيْهِ مَا عَرَفْتَهُ عَنِ السِّيَارَةِ الْمَطَابِقَةِ وَشَهْرزَادِ فَقَالَ قَطْرٌ:

- طَبَّ مَا تَسَاعَدَهَا يَا نُوحُ؟ شَهْرزَادِ دِي مُعَرَّضَةٌ لِلْقَتْلِ بِرِضْوٍ، حَرَامٌ.

قَالَتْ بَشْرِي مَعَاتِبَةٌ: شَايَفَ النَّاسِ الْيَاسِ بِتَحْسٍ؟

- خَلَاصٌ، يَا قَطْرَ. رُوحُ إِنْتُ لِصَلاَحٍ وَقَوْلِهِ. سَحَبْتُ وَرَقَةً بِيضًا

كَتَبْتُ عَلَيْهَا اسْمَ شَهْرزَادِ وَعِنْوَانَهَا كَامِلًا: إِدِي لَهُ الْوَرَقَةُ دِي.

- طَبَّ وَلَوْ سَأَلْتَنِي عَرَفْتُ مَنِيْنِ.

- قَوْلُهُ كُنْتُ مَعْدِي عِنْدَ الْعِمَارَةِ الصَّبِيْحِ لَقِيْتُ عَرَبِيَّةً بِنَفْسِ الْمَوَاصِفَاتِ

وَسَأَلْتُ الْبُوابَ قَالَكَ اسْمُ صَاحِبَتِهَا خَلِيْنَا نَخْلَصُ بِقِي وَنُرَكِّزُ فِي شَغْلِنَا.

خرج قطز مسرعاً بينما ظلت بشرى واقفة فقلتُ:

- انفضلي، ارغي... شُفتيه فين؟

- شُفته مرتين، الأولى لما كنت بركن عند بيت وفاء كان هو نازل من عمارة جروبي وبيتكلم في التلفون، أصل أنا كنت بتفرج عليه في التلفزيون وعارفة شكله كويس وبعد كدة شُفته تاني وأنا نازلة بالليل و...

- الساعة كام؟

- قبل ما أتقتل على طول، كان نازل من نفس العمارة وبرضو بيتكلم في التلفون.

حدثُ أمامي للحظة.

البواب قال إن طه عاد من المقهى في تمام الحادية عشرة، وفي منتصف الليل رحل البواب ليجلس بالمقهى وبشرى رأت طه قبل مقتلها بدقائق - أي في حوالي الساعة الواحدة والنصف بعد منتصف الليل - خارجاً من بنايته ويتحدث بالهاتف و...

الهاتف!

كيف لم أفكر في تتبع موقع المكالمات واكتفيتُ بالأرقام المسجّلة والرسائل النصّية.

بحثتُ بين أكوام الأوراق على مكتب قطز ولكنه دخل قائلاً:

- اتأخرنا.. شهرزاد ماتت خلاص.

وضعت بشرى يديها على فمها مصدومة بينما أكمل قطز: طلعت

واحدة لا مؤاخذه صوّرت نفسها مع رجل أعمال في وضع مُخْلِ وبدأت
تبتزه، الباشا متجوز بنت وزير مهم فبعث واحد يقتلها، فقتل الأنسة بشرى
غلط فحبّ يصلح غلظه فاستدرجوا شهرزاد لشقة في المعادي وقتلوا بس
حظها إنها صوّتت والجيران اتلموا ولحقوا القاتل قبل ما يهرب.

التفتُ لبشري قائلاً: ها؟ خلاص؟ اتبطين؟

قالت لبشري: يعني قبضوا عليه؟

- ما يقولك لحقوه قبل ما يهرب التفتُ لقطر: ماتت إمتى؟

- في الفجر والواد اعترف من أول قلم، وجوز بنت الوزير ده بيتحقق
معا في النيابة. صلاح ماكانش مقتنع إن فيه ربط بين الجريمة، بس
لما لقي إن عنوان شهرزاد 6 ميدان طلعت مأجرة شقة مع مجموعة من
البنات اللي زيها واتأكد من ملفها في الآداب ولف الموضوع في دماغه
لقى فعلاً إن اللي قتل الاتنين واحد خصوصاً إن شهرزاد أتدبحت بنفس
الطريقة وعلى موبايلها الفيديو اللي ابتزت بيه ال...

- ابتزته؟ صمتٌ قليلاً ثم قلتُ سريعاً: هات سجل مكالمات طه.

انتشل ورقة بين العشرات وأعطاه لي قائلاً:

- بتفكر في إيه؟

- إستنى.

وجدتُ رقمًا غريبًا اتصل به في تمام السادسة، ثم رقمًا آخر اتصل به
ثلاث مرات كل مكالمة استغرقت قرابة دقيقتين من بين الساعة الواحدة
فجرًا وحتى الثانية والرابع.

- شوف لي يا قطز صاحب الرقم ده.

- ودي برضو تفوتني؟ ده رقم من اللي بيتباعوا على الرصيف وبعث حد يدور على صاحبه و...

- مش مهم صاحبه، أنا عايز بتوع جهاز الاتصالات يحددوا الرقم ده كلم طه منين بالضبط.

- ماشي.

أجرى اتصالاً طلب فيه تحديد موقع تلك المكالمة بالقمر الصناعي ثم التفت إلي فبادرته بسؤال: لقيتوا إيه على اللاب توب بتاعه؟

- ولا حاجة، مواضيع ومقالات وأبحاث فلسفية وكتب عن الإلحاد و...

اقتربت من المكتب بالكرسي قائلاً في حماس:

- لو حطينا كلمة الله أكبر اللي على الحيطه وإلحاد طه على جنب. تفتكر اتقتل ليه؟

شاركتنا بشرى في الحوار قائلة: يمكن حد عايز ينتقم منه.

أضفت: أو حد عايز يسكته.

قال قطز: يسكته ليه؟ طه ماكانش بيتكلم في السياسة ولا الاقتصاد، يعني مش مناضل و...

- بس ممكن يبقى مبتز.

صمت قطز لوهلة ثم قال: بتفكر في إيه؟

- في الأظرف اللي كان بيسلمها ويستلمها. طه ممكن يبقى زي شهرزاد، بيمسك صور أو فيديوهات أو ملفات أو حاجة يساوم صاحبها عليها. يمكن يبقى ذكي ويبخلي سعره حين عشان كده الكل بيدفع، يسلمه ظرف فيه فلوس ويستلم ظرف فيه مصيبته وكان بيختار مكان في العلن عشان يبقى في الأمان بس في واحد رفض يدفع.

- حد ماقدرش على التمن اللي طه طالبه؟

- أو حد مش واثق في إن الفلوس هتسكَّط طه، حد عرف يستدرجه لمكان مقطوع، عشان كده مالقتش روحه في بيته. خبطت رأسي متممًا: أنا إزاي غبي كده.. طه ما اتقتلش في بيته.. قطعوا راسه وكفه وعملوا المسرحية دي عشان نتلهي و...

رنَّ هاتف المكتب فأجابه قظز مسرعًا وأخذ ما أراد من معلومات ثم قال:

- المكاملة من المنطقة الصناعية في التين.

- التين؟!!

هكذا اتضح الأمر.

(5)

في بعض الأحيان يجب أن تغلق عينيك لتري بوضوح.
داعبتُ الليمونة المستديرة مفكرًا ومتصورًا المشهد بطريقة منطقية.
طه أبتز أحد الشخصيات الهامة فقام هذا الشخص بمجاراته. أكد
عليه أنه سيدفع له المبلغ كله ثم قام باستدراجه وكلمه ثلاث مرات
ليصف له العنوان الذي سيقابله به بين الساعة الواحدة والنصف حتى
الثانية والرابع.

وصل طه إلى المكان المختار. نحرّوا عنقه وقطعوا كفه الذي يرتدي
به خاتمًا مميزًا. أخذوا مفاتيح بيته. وُضِعَت الرأس والكف بعد أن تم
حرقها بطريقة لا تجعل من المستحيل التعرف عليهما في حقيبة داكنة واتجه
القاتل - وهو في الغالب أحد رجال ذاك الشخص الذي تم ابتزازه -
إلى البناية ثم دخل الشقة من بابها. أحرق الكرسي بشكل سطحي ثم
أطفأه (ربما ببطانية أخذها معه لاحقًا أو ربما قد أتى بكرسي محروق مسبقًا
ولم يكن بيت طه من الأصل). وضع رأس طه وكفه كأنه كان جالسًا
على ذاك الكرسي ونثر عليه الأسمت الذي يبدو بالفعل كرماد جسد

محترق ثم كتب على الحائط "الله أكبر" ليصق الجريمة بأحد المتطرفين أو المتحمسين لنصرة الإسلام، وليجعل منا أضحوكة وليجعل الجميع يؤمن بفكرة العقاب السماوي الذي أهلك الكافر.. وقد نجح بالفعل. لم يشتتنا ويجعلنا نبحت في دائرة أعداء طه من المتدينين فحسب، بل إنه جعلنا نبحت عن أدلة في نطاق منزله فقط، وعلى الصعيد الآخر فقد تم التخلص من باقي جسد طه.

لقد تحول جسده لرماد بالفعل لتعرضه لحرارة لا تقل عن 1500 درجة مئوية، ولكن أين يمكنك أن تجد مصدرًا آمنًا لهذا الكم المهول من النيران المتقدة دون أن تلفت الانتباه؟

- منصور الباز عنده مصانع للحديد والصلب في منطقة التبين مش كده؟

قال قطز: أظن لكن الجارسون قال إن طه ومنصور كانوا ييفطروا ويضحكوا...

- شوفها كده من الزاوية دي.. طه ماسك حاجة على منصور، فقام واخده على حجره وضحك وهزار عشان ما يقاش موضع شك، بعدها استدرجه لمكان مصنعه، ده المكان الوحيد اللي ممكن حد يتعرض فيه لدرجة الحرارة العالية دي بدون ما يثير الشكوك.

تمتم قطز: درجة انصهار الحديد 1500 درجة مئوية والجسم محتاج 1500 درجة عشان يتحول لرماد.. يعني هو التخلص من جثة طه هناك

لكن طبعاً ماقدِرش يلم الرماد فراح عمل الحركة بتاعة الأسمنت بس راس طه وكفه موجودين فحتى لو طلعلنا وقلنا للناس إن ده أسمنت مش رماد هيقولوا لك ربنا خفى جسمه وساب راسه عشان يبقى عبرة.

- لعبها صح ابن الصايعة وسوِّحنا في دماغنا عشان ندوّر ورا الإسلاميين وكل واحد ضد تفكير طه. كل مسلم هيكون موضع شك، لكن في الحقيقة طه ما ماتش عشان ملحد، مات عشان مبتزّ.

- يعني هو كده أكيد ماسك حاجة على منصور.. إيه بقى؟

- طه اللي هيقولنا.

إلى أن دقت الساعة الواحدة فجراً، بقينا نبحث عن أيّ دليلٍ أو معلومة تُتخذ ضد منصور، ولكنه مثل الأخطبوط، له ذراع في كل مكان وركن وزاوية.

كسائر قادة عصرنا، حرباءٌ تتلون بلون كل سلطة وتتقرب من أصحاب المناصب والنفوذ.

في عهد مبارك، لعب الإسكواش وفي عهد الثورة لبس حفاظة ونكش شعره، في عهد مرسي أمسك المسبحة والمساوك، ويسقوط حكم الإخوان حلقَ ذقنه وجمع التبرعات لصندوق تحيا مصر.

لا أعلم ما الذي قد يجعله يتخلص من طه بهذه الطريقة المُتقنة؛ فلو كان طه يملك ضده ملفات فساد أو رشوة فما هو بالأمر الجلل في هذا

الزمن الذي يُعتبر فيه المرتشون ضحية للفقر والفاستدين ضحية الجهل
والناس ينسون والحكومات تغفل.

الأمر أكبر من هذا، الدافع شخصي بحت!

استغرقني الأمر ساعة حتى وصلتُ منطقة التبين، وبينما كنتُ أقود في
الظلام، إذا بشبح عند حيد الطريق الصحراوي على بُعد خمسة كيلومترات
من مصنع منصور الباز للحديد والصلب.

رجل نحيفٌ، قصير القامة في منتصف الخمسينيات، له شعر ذهبي
وعينان زرقاوان، يرتدي معطفًا غاليًا فوق قميص أزرق أنيق.

يتمشى مطأطأ الرأس، واضعًا يديه خلف ظهره وينظر للأرض ثم
للسيارات المارة فتوقفتُ.

كان هو، طه عبد اللطيف، شعره المنكوش وعيناه الواسعتان.. تمامًا
كالصور.

أوقفتُ السيارة جانبًا ونزلتُ منها متجهًا صوبه، وهنا سأخبرك
بالقاعدة الخامسة:

- ضَع سِاعة بلوتوث في أذنك عند التحدث مع أحد الأشباح علنًا
حتى لا يظنك الناس مجنونًا.

- سلام عليكم، أنا نوح الألفي.

التفتَ إليَّ بعينين راكزتين ثم قال: وعليكم السلام، وإنّ ميت إنت
كمان؟

يبدو أن طيفه أذكى من البقية، لقد فهمَ بمفرده أنه روح متوفٍّ.

- أنا النقيب اللي بحقق في قضية قتلك.

قال بفتور: قبضتوا على منصور ولَّا لسه؟ هو اللي قتلني.

- عارف، بس عايز دليل يأكد ده.

- هتلاقي الصور في شقة باب اللوق.

- شقة مين دي؟

- شقة أخويا، مات من غير وريث فبقت بتاعتي وماحدش يعرف

عنوانها. هتلاقي سرير نحاس تحته خزانة صغيرة، كلمة السر 5891،

جواها صور وملفات تخص كل أوساخ البلد.

- ومن بين كل أوساخ البلد اللي ابتزتهم، إשמعنى منصور هو اللي

قتلك؟

- عشان أنا اتغريت وافكرته زيه زي غيره، ماكانش ينفع يتلعب

معا.

- ليه؟

تمشى بيالٍ رائقٍ كأنه في حديقة الفسطاط ثم نظر السماء وقال متنهداً:

- لأنه مش هيسمح لحد يعيش بالسر اللي أنا أعرفه عنه.

- اللي هو؟

- الشواذ اللي منصور بيهاجمهم، هو واحد منهم، قال يعني لو هاجمهم

ماحدش هيشك فيه. أنا عارف الكلام ده من أيام ما كان جار مراتي في

”نيس“. كنت ماسك عليه صور من قبل الثورة بس قُلت بلاش أفضح الراجل، كل واحد حر، لكن هو اللي بدأ، طلع في التلفزيون واستغزني وهاجمني وسبني.. بعد ما الحلقة خلصت بعت له من موبايلي السري عينة من الصور إياها. قابلته وقُلت له المبلغ المطلوب وهو عمل نفسه مش عايز شوشرة وخدها ضحك وهزار وقال يعني هيدفع لي اللي أطلبه وزيادة.. خدني على حجره الخبيث. قتلني وخذ الصور والموبايل بس على مين؟ أنا معايا نسخة من كل حاجة. هتلاقي في الخزنة صور تودي كل الطراير دول في داهية. اللي بتدعي الفضيلة وهي بنت ليل، اللي بيخطب في المساجد وهو تاجر رقيق أبيض واللي بينادي بحقوق الغلابة وهو مرتشي، اللي بيصرخ من الإهمال الصحي وهو أكبر مستورد للأطعمة المسرطنة، واللي بيع أعضاء أولاد الشوارع، والفاسد والحرامي والمتآمر...

- والمبتز؟

ابتسم متهكماً ثم قال بغرور: يا عزيزي، أنا أشرف فاسد. أنا لا آذيت ولا أفترت ولا اتبليت على حد. لو كانوا شرفاء ومستقيمين ماكانش حد مسك عليهم حاجة وأنا...

- وإنّ عرفت فسادهم وسكت. ما أظنّ إن ده يخليك أحسن منهم.

ضحك ساخراً ثم قال: وأديك إنت كمان عرفت، وريني هتعمل إيه.

ما وُجِدَ بهذه الخزانة الصغيرة، فتيلٌ قادرٌ على إحراق دولةٍ بأكملها.
وثائقٌ وصورٌ منذ التسعينيات كفيّلة بحبس أصحابها سنواتٍ لا تُحصى.
منهم مَنْ مات ومنهم من هاجر ومنهم من هو قادرٌ على قطع السنة
الجميع وإلزامهم الصمت.

قدمت الملفات جميعها إلى النيابة وتم التحقيق مع منصور الباز ولم أرَ
شبح طه ثانية.

علّه ما زال يحوم بطريق التبين يتأمل النجوم متنهّدًا أو يحدث نفسه
متفلسفًا.

لقد مات طه فعلاً بتأثير الفتيل، ليس الفتيل الذي يخص الموت
بظاهرة الاحتراق الذاتي البشري، بل فتيل الابتزاز الذي أشعله ولم يكن
يعلم تبعات نيرانه.

استيقظتُ شاعرًا بتلك البرودة ثانية؛ فوجدتُ كلب جدي روي
ينبح صوبَ شبحٍ بشريّ الواقفة بغرفتي مندهشة فسألّني:

- هو الكلب ده ليه بيهو هو كل ما أدخل... هو شايفني؟

همستُ بصوتٍ ناعس: الكلاب والقُطط يشوفوا الأرواح... خديه
واطلعي بره.

قطبت حاجبيها وعقدت ذراعيها وزمت شفتيها ثم صاحت غاضبة
كعادتها:

- إنت شايف إن ده عدل؟

زفرتُ وانقلبتُ على جانبي واضعًا الوسادة على رأسي، ولكنها
حلقت فوق الفراش ووثبت لتواجهني قائلة:

- الي قتل شهرزاد اتعاقب بتهمة قتلها هي وبس، ما ربطوش بين
قضيتي وقضيتها. الطابط صلاح ده فاشل و...

- يعني ربطوا قضيتك ولا ما ربطوهاش. في الحالتين الرجل هيتعدم
مرة واحدة.

- إنت إزاي بارد كده؟! إنت شايف إن ده عدل يعني؟

تمتمتُ أسفل الوسادة: أنا دوري أكشف الحقيقة وبس، العدل ده بتاع
النيابة والقضاء.

- يعني إيه الكلام ده؟ أنا...

نهضتُ صائغًا: إنتِ فاضية ومش لاقية حاجة تعملها، صح؟ ما
تروحي لأمك.

- باسل خدها معاه الغردقة.. كده أحسن، هبقى متطمنة عليها معاه.

- ماشي.. سبيني أنام بقی.

كدتُ أغفو ثانية ولكنها اقتربت وقالت بضحكة بلهاء:

- تعرف إنك بتنام بعين نص مفتوحة وبُقك بيقي مدلدل؟ شكلك
مخيف أوي.

اللعنة على حالة العين الأرنبية الليلية التي تجعلني أنام بعين مفتوحة
كالذئب.

- عشان لاسع والفانتازيا واكله عقله. لما حكيت له وإحنا أطفال
فضّل يتحايل على باباه ياخده سيوة عشان هو كمان ينزل مقبرة جبل
الموتى ويشوف الأرواح زيي.

- إنتوا صحاب من زمان أوي كده؟

- اتولدنا لقينا نفسنا صحاب ولما بابا مات أبوه كان زي أبويا بالظبط.

- وعيلتك متقبلين الحكاية دي؟

- لأ طبعًا، ماما أول ما قُلت لها على اللي سُفته في المقبرة عملت لي
طاسة الخضة.

- طاسة إيه؟

- طاسة الخضة... أصل حياة المصريين فيها 274 خرافة الحمد
الله أمي حفظاهم وتعملهم كلهم من أول، رش الملح والخرزة الزرقة
والدخول بالرجل اليمين لحد فك الأعمال وتسخير الجن السفلي.
أطفأت سيجارتي قائلاً: وطاسة الخضة دي يا ستي عشان لو ابنك الحيلة
اتخض ولّا اتفرع من حاجة تجيبي طاسة وتمليها مائة وتبيتها في الشمس
وتشربها للمحروس.

- بس مادام مامتك ليها في الحاجات دي يبقى أكيد صدقتك.

- هي صدقت، صدقت إن ابنها لبسه جن وطافت بيه على كل
الدجالين اللي تعرفهم، اللي بقى يديها حاجات غريبة تلبعها له، واللي
يقولها حميه بمية وملح وعين العفريت، واللي يقولك اللي عليه مش
هيطلع غير بالضرب و...

- بالضرب؟! -

ضحكتُ قائلاً: ده أنا شُفت أيام سودا.

- هي مامتك إزاي بتؤمن بالكلام ده؟ هي تعليمها على أدها؟

ابتسمتُ ساخراً: أمي أستاذ الغُدد الصماء في القصر العيني.

فتحت جدي الباب بلا استئذان ودخلت بغتة وعلى وجهها ماسك

الزبادي بالعسل:

- في حد معاك يا نوح ولا إنت خلاص اتجننت وبقيت بتكلم نفسك؟

- معايا حد، يا سونة.

نظرت حولها بفتورٍ ثم قالت: طب خلي الحد ده يستنى ويلا عشان

القطار.

خرجت يتبعها حفيف رداء نومها الصوفي وأغلقت الباب خلفها

فعلقتُ بُشرى:

- إسمعني جدتك اللي مستوعبة الموضوع عادي؟

- في الأول ماكانتش مصدقة. كانت فاكرة إنها مجرد خيالات أو حالة

نفسية جت لي عشان قعدت لوحدي في المقبرة بس لما بابا مات وأنا صغير

شُفت روحه وكلمته وهو جاهها في الحلم و...

- هو إحنا نقدر نطلع في الحلم؟

- للناس اللي بتحبوهم بس. بابا طلع لتيتة وقالها إني مش عيان ومش

كذاب، قالها ابني ربنا مدي له نعمة مش عند غيره، ومن ساعتها وهي

بتدافع عني وبتقف لماما.. بس كده كده أنا كنت وصلت لمرحلة كدبت
على ماما وعلى نادية وقلت لهم إني بطلت أشوف أي حاجة.

- نادية برضو زي مامتك؟

- نادية مش بتؤمن بالخرافات والأعمال والدجل زيها لكن برضو
مش مقتنعة بإن في حاجة اسمها أرواح نقدر نشوفها. ماكانتش بتعاملني
على إني ملبوس على أدّ ما بتعاملني على إني مجنون، بس الكلام ده كله كان
زمان، دلوقتي أنا بعرف أحفظ بأشباحي لنفسي.

- يعني ما بتحكيش لأي حد على اللي بتشوفه؟

- بحكي لقطر وتيتة عند اللزوم.

انبعث صوت جدتي في نفاذ صبرٍ من المطبخ قائلة:

- نووووووح، لو ماجتش هخلص مربى التوت كلها.

- جِي يا سونة.

نهضتُ فقالت بشرى: مش هتكمل لي باقي قصتك؟

- هفطر وأجيلك، مربى التوت بتناديني.

قد أظاھر بالضيق والانزعاج، ولكنني أحب التحدث مع أرواح
الموتى، فھم يفھمون ما لا يقدر الأحياء على استيعابه.



القضية الثانية

(كریم كرامیل)



(1)

أصبحت تالا الصغيرة صاحبة الضفيرتين، كالمدمن الخطر.
فور أن وصلتُ شقة نادية، قامت ذات الأعوام الخمس بفتح الباب
وجذبتني من يدي بحماس المجانين إلى غرفتها التي تمتلئ حوائطها
الوردية بملصقات الباليرينات النحيفات ثم همست لي وهي تلتفت
حولها كاللصوص: جبت الحاجة؟

أخرجتُ من جيبى السكاكر التي تعشقها ولوح شوكولاتة كبير
فابتسمتُ كاشفةً عن غمازتيها الملائكتين ثم قبلتني فقلتُ لها:

- هتخبي الحاجات دي فين، يا زردة؟

- في الدبodob.

اتجهت صوب دُمية دُبِّ كبير. فتحت السحاب الخلفي للعبة ودفست
السكاكر وسط القطن المنفوش ثم أعادت غلق ظهر الدب قائلة:

- إوعى تقول حاجة لمامي.

- عيب عليك.

فتحت نادية الباب بغتة؛ فقامت تالا بمعاينة دُميتها عفويًا حتى لا تشك بها والدتها، ولكن نادية نظرت لكلينا من خلف نظارتها الكبيرة قائلة كالمخبر السري:

- بتعملوا إيه؟

أسرعت تالا مجيبة ببراءة: بوري الدبدوب الجديد لنوح.
رفعت حاجبها بشك ثم قالت: الدبدوب؟ طب يلا، الغدا جاهز.

في الغالب، لا تدعوني نادية للغداء إلا إذا كانت تحضر رواية بوليسية جديدة مع زوجها وتود الحصول على بضع معلومات أو تعديلات تقنية تخص أسلوب المباحث.

وقد كان ما ظننته، ففور أن أكلنا الطعام المحروق جزئيًا واحتسينا الشورية ذات الملح الزائد، وبعد أن ضربت نادية التوأمن اللذين نعتا طهيها بالـ "قرف" ثم بصقا ما أكلاه على السجاد وتدمرت "تالا" من طعم السبانخ الذي أقسمت مرارًا وتكرارًا أنها تكرهه، وبعد أن تجاهل طارق الزيت المتقطر من جناح الدجاجة المحمرة التي يأكلها؛ الملمت نادية الأطباق واحتجزتني مع زوجها بغرفة السفارة بعد أن أعدت ثلاثة أكواب من القرفة باللبن التي أقبل عليها طارق بينما قلتُ:

- مابحبش القرفة.

- دي مفيدة. اشرب، اشرب.

- هو أنا عيل من عيالك عشان تشريني بالعافية؟!

رمقتني رافعة حاجبها الأيمن ومضيقة عينها اليسرى وقد اتسع ثقبا
أنفها وكادت أن تخرج نيراناً من فمها كالنتين المجنح فأثرت السلامة
وسلكتُ مسلك طارق صاحب شعار ”حاضر بتريح“.

- حاضر.

أخذتُ كوب القرفة الساخن فابتسمتُ برضا وراقبتني كمن ينتظر
أن تبتلع ضحيته السم.

- ها، حلوة؟

- أكيد مش جاياني عشان أقولك رأيي في القرفة باللبن الي إنت
وجوزك بتاخدها حقن دي. إنجزي عشان عندي شغل.

- عندك حق سحبت الكوب من يدي قائلة: خلينا نوّفّر الوقت. أنا
وطارق عايزين..

قاطعتهُ ضجراً: أبص على الي انتوا كاتبينه.. وريني.

فتحت اللاب توب ووضعتة أمامي على نصّ من أربعين صفحة
فقلتُ:

- أنا هقرا كل ده؟

- لأ.. الحتة دي بس.

حددت لي خمس صفحات عن ضابط بالمباحث الجنائية يتفحص
موقع الجريمة وقد امتلأ المشهد بالأخطاء التي يقع بها مخرجو السينما
ومؤلفو الروايات البوليسية فعلقتُ قائلاً:

- أنا فاهم أن قصدكم تطلعوا الطباط روش بس ماحدث بيولع سجائر ويرمي الطفني على السجادة في موقع جريمة ولا بيقلب في الجثة كده وما بيلمسش أي حاجة في الشقة من غير جواناتي.. كده موقع الجريمة اتلوث وبصماته بقت في كل حته.

قال طارق: على فكرة، أنا قلت لها كده بس هي...

آخرسته نظرة نادية المرعبة فبلع لسانه حفاظاً على سلامته بينما سألتني:

- طب في إيه تاني؟

- مش بنحرك أي دليل إلا لما يتصور في المكان اللي لقيناه فيه ولو أدلة بيولوجية مش بنحطها في كيس بلاستيك عشان يعمل رطوبة ممكن تبوظ الدليل. النوعية دي من الأدلة بنشيلها في ظرف أو نوع معين من الورق.

ارتشف طارق قرفته قائلاً: طب والله قلت إن رطوبة البلاستيك ه...

قاطعته نادية: إنت بتكتب ملاحظاته ولا مقضيها تطيل؟

- بكتب أهو والله. قالها منكباً على دفتره العملاق الذي يشبه دفاتر

السجل المدني.

- لقيت حاجة تاني يا نوح؟

- لأ. الموضوع شكله مشوق بس ركزوا في التفاصيل دي.

- ماشي بس...

سمعنا بالخارج شيئاً زجاجي يتهشم، فاقتربت نادية من الباب صائحة:

- كسرتوا أياه، يا ولاد ال... -

استوقفها طارق قائلاً: إستني، أنا هشوف في إيه.

خرج وأوصد الباب خلفه فقلتُ بسرعة:

- طب أتكلم أنا على الله قبل ما تبلي عيالك.

- لآ، إستني. عايزاك في موضوع. خالتو سوسن عاملة حفلة عشان

عيد ميلاد ماما و...

- جوز أمك هيبقى موجود؟

زفرتُ قائلة: خلاص بقى يا نوح. إحنا بقالنا سنين على الوضع ده و...

- وكلنا مستريحين. هي مرتاحة مع جوزها الدكتور فازلين وأنا

مرتاح كده.

- بس دي ماما، يا نوح. المفروض تتقبل إن إنت وجوزها تقعدوا على

تراييزة واحدة عشان...

- مش إنتِ متقبلة إن واحد تاني ياخذ مكان أبوكِ الشهيد ومخْلِية

عيالك يقولوا له 'يا جدو' و...

احتدت نبرتها قائلة: ماتلخبطش في الكلام يا نوح.

- لا ألخبط ولا ما ألخبطش يا نادية. فُكك.

- بكرة تبقى أب وتعرف يعني إيه ابنك اللي من لحمك ودمك

يقاطعك.

- أنا مش مقاطع أمك لكن مش هبقى في مكان واحد مع جوزها ده.

- مش مقاطعها؟ إنت آخر مرة سألت عليها كان إمتي؟
- وهي الثانية مش بتسأل عني .
- هو النَّد بالند؟
- إذا كان هي كأم قلبها قسي عليّ، أنا مطلوب مني إيه؟
- مطلوب إنك تطلّع السواد اللي جواك ده من ناحيتها.
- ضحكتُ متهكماً: سواد؟! أنا ممكن أسامح أمك على إنها عيشتني طفولة مقرفة كلها شعوذة ودجالين وجهل وطلعتني ملبوس قُدَّام عيلتها وخلاقي بقوا بيخافوا أَلعب مع عياهم ويشغّلوا قرآن لما أدخل بيوتهم كإني شيطان.. إنما تنسى أبويا وتتجاوز بعده بستين ثلاثة! آسف.
- اغفر، يا نوح.. اغفر عشان ترتاح.
- الغفران صعب يا نادية ولو ما اتطلبش يبقى مستحيل.. أمك عمرها ما اعترفت بغلطتها في حقي ولا بإنها فرطت فيّ عشان تتجاوز.
- فرطت فيك؟ إيه الكلام الأوفر ده؟!
- أوفر؟! هي اللي اختارت. أنا قُلت لها لو اتجوزت هعيش مع تيتة وهي اختارته و...
- مش من حَقك تحيّر ها بينك وبين سعادتها.. ماما ليها غلطات كثير بس بتحبنا بجد وبتخاف علينا من الهوا الطاير و...
- نادية، صباحك مرَبّي وماتفصلنيش منك.
- خلاص يا نوح اتفلق، بكرة تندم.
- دخل طارق وقال لاهتأ:

- يحبى وياسر فتحوا النيش وكسروا طقم الخزف.
تحولت ملامح نادية الناعمة إلى وجه الساحرة الشمطاء وبرزت
عروق عينيها الحمراء صارخة:

- إبيبييه؟! النبييش!

- أنا حاولت أتدارك الأمر بس هُمَّا خرجوا عن السيطرة.
صرخت صرخة تشقق لها السقف واهتزت لها الأرض وارتعشت لها
المصاييح:

- النبييش... النبييش، يا ولاد الكلب.

خرجت بثورتها المتزايدة بينما تنفّس طارق الصعداء وعاد لدفتره
الكبير قائلاً:

- أنا كده عملت اللي عليّ.

نظرت له بازدراء قائلاً:

- شعورك إيه وإنّ أب واطي بيسلم عياله تسليم أهالي؟

- مش أحسن ما يسلموني أنا؟ دول مش بس فتحوا النيش المبجل،
كمان كسروا طقم الخزف اللي بالشيء الفلاني... هُمَّا كده، يتفرجوا على
أي فيلم أكشن ولا كارتون سوبر هيروز فيتجنوا ويقلدوه ويكسروا في
الشقة ويلطشوا في أختهم. أتى صوت بكائهم مخلوطاً بسباب ولعنات
نادية فابتسم قائلاً برضا: والله الواحد بيتوغوش لو عدى يوم كده من
غير ما نادية تطحن العيال ضرب.

لا أتذكر مرة دخلت فيها المكتب دون أن تفوح منه رائحة الطعام، فقطز يسلي وقته بشيئين لا ثالث لهما: القراءة والطعام. فلمعدته قدرة خارقة على هضم أي نوع من الأكل ومع ذلك وزنه لا يزيد جرامًا واحدًا.

كان كعادته يأكل على مكتبي حتى لا يتسخ مكتبه هو؛ فعلى الرغم من عشقه لأكل الشارع وعشوائية انتقائه للطعام، إلا أنه في غاية النظافة والترتيب ولا يطيق أن يجد بقعة على مكتبه؛ لذا، لا مانع لدي لتحويل مكتبي إلى سُفرة.

خلعتُ سترتي وجلستُ على المكتب أمامه زافراً:

- عامل حسابي في الأكل؟

أشار إلى الكيس البلاستيكي الذي يتألق عليه شعار ”فلفلة“ البرتقالي؛ ففتحته لأجد ثلاثة سندويشات كبيرة، ألتقطتُ منهم واحداً بينما قال:

- أنا قلتُ أكيد مش هتاكل من طبيخ نادية وهتيجي جعان.

- أكلها يقرف الكلب. مش فاهم طارق مستحمل إزاي؟!

- اتعود.. صحيح، هتعمل إيه النهارده؟

- هعمل إيه في إيه؟

- مش هتحتفل بالسنة الجديدة؟

- يعني ألبس طرطور مكتوب عليه 2017 ولا أنفخ بالين هيليوم؟

- إيه السُكر ده، يا نوح؟

- عايزني أقولك إيه؟ الناس كلها بتحتفل وترقص وتتبسط وإحنا في القسم بناكل شاورما فراخ.

- مالها شاورما الفراخ؟ بتحتوي السناجل اللي زينا. مسح فمه بالمناديل المبللة مضيئاً: بمناسبة السنجلة، مش بتتمنى تقابل فتاة أحلامك في السنة الجديدة؟

- فتاة أحلامي؟! الكلمة دي اتلغت من 95.

- يا سيدي خلاص، مش بتتمنى تلاقي المزة الجامدة.. حلو كده؟

- بلا مزة بلا زفت. أنا مش عايز من السنة دي غير حاجتين اتنين.

- قول.

- ترقية ومُتَّج يقضي على الصلح. شعري بدأ يخف وإحنا عيلة رجالتها صلح... .

فُتِح الباب بهجمية ليدخل الرائد صلاح الشُّبكي قائلاً بسخافته:

- هابي نيوير لسيادة النقيب لمونة وزميله النقيب نسكويك.

هنا أدركتُ أنّ لي أمنية ثالثة: رصاصة في منتصف جبهة صلاح ترديه

قتيلاً.

لم أجبه بينما تتم قطز همساً: هابي زفت على دماغك.

جلس اللزج على الكرسي ومدَّ يده إلى كيس الطعام بلا استئذان

ساحباً سانديوتشاً تفحص محتوياته قائلاً:

- إيه ده؟ بانيه؟ إيه أكل الفراير ده يا ابني.

انتشل قطز الساندويتش من بين أصابعه القصيرة بعنف قائلاً:
- خلاص، ما تاكلهوش.

استعاد صلاح الساندويتش بغوغائية قائلاً:
- يا عم بضحك معاك.

ضحك ضحكته الصفراء ثم قضم بوحشية ومضغ بطريقة حيوانية وأخذ يتكلم والطعام يتطاير من بين شفثيه والميونيز يسيل من جانب فمه قائلاً:

- هتسهر وا فين الليلة دي؟ أصدقاء السوء هياخدوني كباريه إننا إيه.. أخذ قزمة أخرى وأكمل كلامه متباهياً: إبليس يتكسف يقعد فيه وهتحيي السهرة الرقاصة الكرياج دي.. اسمها إيه؟

لم نعره اهتماماً ولكنه استطرد: هتبقى سهرة ولا جهنم الحمراء.
قلتُ ضجرًا: طب ما تاخذ الساندويتش تاكله في الطريق عشان تلحق جهنم من أولها؟

- ما أنا خلاص خلصت. كور ورقة الطعام وألقى بها أرضاً ثم مسح فمه بكُم قميصه الأحمر الرخيص مضيئاً: أنا سايب القسم أمانة في إيديكم يا ولاد.. عايز الأمن مستتب نهض متجهًا للباب: سلام، يا كئيب منك له.

خرج بضحكته النابحة وعطره المزعج بينما قال قطز متشلاً ورقة الطعام من على الأرض:

- ياكش تموت هناك عشان تبقى موتة نجسة.



عندما أشعر بالضجر أخرج من المكتب وأتمشى بطرقات القسم.
أنزل عدة سلام وأصعد أخرى، بينما يظل قطز يقرأ في أحد الكتب
التاريخية أو الروايات الرومانسية سرًا، ففي هذه الليلة كان الوضع هادئًا
وآمنًا؛ فما من جريمة قد ترتكب في هذا التوقيت الذي يشغل فيه الناس
بانظار العد التنازلي حتى تدق الساعة الثانية عشرة مستقبلة سنة جديدة
أجهل ملامحها ولا أنتظر منها سوى ترقية وتقييم ممتاز بملفي.

عدتُ إلى المكتب بينما أضيئت السماء بالألعاب النارية التي لم تتوقف
عن الفرقة لقرابة خمس عشرة دقيقة وبينما كنتُ على وشك دخول
الحجرة إذ بقطز يخرج متعجلًا:

- تعالى، فيه بلاغ جالنا.

- ما تقولش الراجل العجوز اللي بيشتكي من الدوشة ده تاني.

- دوشة إيه، دي جريمة قتل.

- قتل؟ حد يتقتل دلوقتي؟

- ده مش أي حد، دي مرات يوسف المنياوي.

- أنا عارف الاسم ده.

- ده المنتج، يا عم اللي كان متجوز نادين المندي.. المثلة الشقرة أم

عيون عسلي دي.

صدمتُ قائلاً: إيه؟ يعني نادين المندي ماتت؟ ده أنا كنت لِسّه متفرج

لها على مسلسل و...

- لأ، مش نادين اللي ماتت. نادين ويوسف اتطلقوا من سنة، إنت مش متابع ولا إيه؟

- وأنا مالي أنا مين اتجوز ومين طلق.

- يوسف ونادين اتطلقوا وهو اتجوز مُزة بلطية كده بتطلع معاه في كل حتة، هي دي بقى اللي ماتت. حكَ ذقنه في طريق خروجنا من القسم مضيئاً: أكيد نادين قررت تنتقم من يوسف عشان اتجوز غيرها. أصل قصة حبهم كانت عنيفة.

لا ينفك قطز عن تحليلاته العاطفية ذات الطابع الدرامي.

(2)

هكذا قَصَّوا علينا الأمر:

بشارع بهجت علي في الزمك، اعتاد يوسف الميناوي الاحتفال بالسنة الجديدة في فيلته الفارحة ذات الأعمدة الإغريقية العالية والسقف الذي يتخذ شكل القُبَّة والحديقة التي تزدهم بالأشجار، فيجتمع المشاهير بالصالة الرخامية الملساء أسفل الثريا المنيرة ثم تنطفئ الأضواء ويبدأ العد التنازلي حتى تدق الساعة الثانية عشرة معلنةً عن عامٍ جديدٍ ولكن تلك المرة أعلنت الساعة عن جثة.

بعد أن هدأت الموسيقى وانطفأت الأضواء وبدأ العدُّ، سمع الحضور صريخاً يأتي من شُرْفَة الطابق الثاني للفيلا، وقبل أن يندفعوا صوب الصوت إذا بهم يرون جثة ديدا - زوجة يوسف - تسقط من بلكون غرفتها لتستقر فوق درجات سلم مدخل الفيلا فيفتح رأسها لافظةً أنفاسها الأخيرة.

كانت جثة لامرأة قصيرة في الثلاثينيات، لها جسد ضئيل ولكن ملفوف وتكثر به الانحناءات.

صاحبة شعر قصير وعينين واسعتين وساقين آية في الجمال يظهران من ثوب نومها الأحمر القصير الذي لم يخف أيًا من مفاتها.

انتشرت الدماء المناسبة من رأسها على السلام الرخامية بالمدخل، ولكنني لاحظتُ طعنةً في بطنها.

ظلّ قطر ينظر للشرفة العالية التي سقطت منها ثم إلى جثتها التي التفّ حولها رجال الطب الشرعي والبحث الجنائي ملتقطين صورًا ومُحَدِّدين موقعها ثم قال مفكرًا:

- دي اتشقلطت في الجو.. تفتكر مين اللي زقَّها؟

- أكيد نفس الشخص اللي طعنها في بطنها.

قال حسني بينما حُمِلَتْ جثة ديدا لتنقل إلى المشرحة:

- وفي ظهرها كمان.. في طعنة في البطن والظهر. هنشغل في الجثة وهنعرفكم الجديد.

بدأنا نحقق مع الحضور وقد رأوا جميعًا نفس المشهد: صريخ ثم سقوط الجثة عند سلام المدخل عدا المطربة الشهيرة دولي ذات الأعين الواسعة والشعر العجري التي كانت جالسة على كرسي بالصالة، مرتجفة ولا تتوقف دموعها عن الانهيار وهي تقول بصوتها الرقيق:

- أنا طلعت الجنينة بعيد عن الدوشة عشان أكلم جوزي في أمريكا وأقوله ها بي نيو يير فسمعت صريخ، ببص لقيت ديدا بتصوّت من

بلكونة أوضتها وبتقول إلقوني وفجأة سندات على السور كأن أغمى
عليها أو نامت أو...

- أو حد مثلاً طعنها من ضهرها؟

- أيوه، بالظبط.. بعدها اتقلبت، كأن حد رفع رجليها من على
الأرض ونزلت على السلام ودماعها اتفتحت أخذت تبكي مرتعشة:
المنظر كان فظيع.. مش قادرة.

قال قطر: معلش، يا مدام دولي. هدي نفسك.. أنا من أشد معجبيك
والله.

قدم لها منديلاً فأخذته ومسحت دموعها بطرفه قاتلة بأنوثة: ميرسي
خالص.

- لا ميرسي على واجب. والله لولا الظروف كنت خدت معاك
سيلفي ضحكك فأضاف: أيوه كده، اضحكي خلي الشمس تطلع.. أنا
بحب أغانيك أوي. ثم كالأبله بدأ يدندن إحدى أغانيها التي لا معنى
ولا إيقاع لها فوكزته هامساً:

- إنت أهطل يلا؟ فين هيتك كظابط!

- يعني يوم ما أشوف كل النجوم دول، يبقى عشان تحقيق في قضية
قتل؟!

تجاهلت صبيانيته والتفت لدولي قائلاً: ما شفتيش حد في البلكونة
قبل أو بعد ما القتيلة وقعت؟
- لآ، ما شفتيش حد خالص.

- تمام، شكرًا ليكَ.

ما إن التفتنا حتى وجدنا يوسف الميناوي يقترب منا.

رجل حليق الذقن طويل القامة في مقتبل الأربعينيات، يرتدي نظارة
نظر باهظة وبدلة سوداء أنيقة تكشف جسده المشقوق وقد كانت له
ملامح راقية تليق بممثلي الستينيات عدا كونه صاحب شعر رمادي
خفيف يكاد لا يُرى بالعين المجردة، مما زاد عمره بضعة أعوام.
بدا مذهولاً ومصدومًا ولكن ليس بالقدر الذي يجب أن يكون عليه
من قُتِلت زوجته للتو.

- الباقية في حياتك يا أستاذ يوسف.

- حياتك الباقية. ينفع ضيوف في يمشوا دلوقتي ويبقوا يجوا لكم القسم
بكرة عشان الوقت اتأخر؟

اندفع قطز قائلًا: طبعًا، إحنا برضو تهمنا راحة ضيوفك.

- أنا بس مش عايز شوشرة أكثر من كده، كفاية اللي الصحافة هتكتبه
و...

قاطعته قائلًا: حضرتك كنت فين لما المدام وقعت؟ ضيوفك بيأكدوا
إنك ماكتش في الصلاة.

أجاب بهدوءٍ: زينب قالت اطلع أوضة ديدا عشان في حاجة ضرورية.
- زينب مين؟

- الهاوس كبير.

- يعني حضرتك طلعت أوضة المدام في نفس اللحظة اللي وقعت فيها؟

- مش بالظبط. أنا وصلت الكوريدور، سمعت صرخ ولقيت الباب مقفول من جوه. خبّطت، ماחדش فتح، فكسرت الباب لكن مالاقتش حد في الأوضة فنزلت تاني بسرعة.

سألته مندهشًا: يعني الجريمة حصلت والباب مقفول من جُوّه ولما دخلتوا الماقتوش حد؟

- مضبوط.

- فيه أي باب تاني للأوضة؟

- إطلاقًا.

سأله قطز باهتمام: حضرتك بتشك في حد معين؟

- أنا ماليش أعداء، الناس كلهم حبايبي.

- والمدام؟

- ليها مشاكلها العادية بتاعت الستات، إنها ماتؤديش للقتل نظر حوله ثم قال: لو تسمحوالي بس أقول لضيوفي يروحووا وأرجعلكم تاني.

قال قطز: طبعًا، طبعًا. اتفضل.

قبل أن يذهب استوقفته قائلاً:

- معلش، يا أستاذ يوسف بس هي إيه الحاجة الضرورية اللي الشغالة

خلتك تسيب ضيوفك في أهم لحظة في الحفلة عشانها؟

حك أنفه قائلاً بعينين مرتبكتين: مش عارف، مالحتش أسألهما.

ثم أدار ظهره وابتعد فقلتُ لقطز: الراجل ده بيكذب.

- عشان هرش في مناخيره، صح؟ تفتكر هو اللي عملها؟ ما هو
اختفى في وقت وقوعها ومش منطقي يعني يبقى واحد عامل حفلة
مكلفة كده ويسيبها في ذروتها عشان الخدامة نادته.

- اللي مش منطقي أكثر هو إن مراته اللي بتطلع معاه في كل المناسبات
والحفلات ماتبقاش حاضرة الحفلة المعمولة في بيتها.

- مش حاضرة إزاي؟

- الجثة لابسة قميص نوم.. إيه اللي يخليها تسبب حفلة جوزها وتطلع
تنام قبل الكاوتنداون؟

وضع قطز يديه عند خصره قائلاً: سؤال يستحق التأمل.

ارتدينا القفازات ودخلنا موقع الجريمة وهي غرفة نوم أنيقة كل ما بها
غالي الثمن وقابل للكسر.

يتوسطها سرير عالٍ، وبأقصى يمينه حمام بابه مغلق، وعلى يساره
الشفرة الكبيرة التي سقطت منها الضحية وقد كان سور البلكون عاليًا
يصل إلى بطن القتيلة قصيرة القامة وعليه بقع دمائها ودائرة كبيرة من
الدم على الأرضية حيث طعنت بظهرها قبل أن تُلقى من الشرفة.

وجدنا حسني ورجاله يجمعون الأدلة وقد لاحظنا كوبًا زجاجيًا

مكسورًا بجوار الحائط وطبق فاكهة كبيرًا تناثرت ثماره على السجاد التركي بينما استقر الصحن بالقرب من السرير الذي تدلت أطراف ملاءته على السراميك البارد.

علقتُ قائلاً: كان في خناقة في الأوضة.

هز قطز رأسه موافقًا بينما أشار إلى تفاحة حمراء ملقاة أرضًا وقال:

- بص كده، التفاحة دي نصها متقشر.

فهمتُ ما يرمي إليه فدقتُ النظر مضيئًا: يعني طبق الفاكهة كان فيه سكينه التفتُّ لأحد رجال البحث الجنائي وسألته: في حد لقي سكينه هنا؟ - لأ.

قال قطز: يبقى هو ده سلاح الجريمة اللي اتطعنت بيه الضحية.

- والسلاح ده مش موجود.

نظرتُ لبصمات الأقدام التي تحمل القليل من الطين على السجاد الغالي ثم أتبعته بنظري لأجد أثرًا آخر عند باب الحمام؛ فوقفتُ عند عتبه لأجد بقعة داكنة من الدماء.

لقد طُعنَت ديدا الطعنة الأولى ببطنها في هذه المنطقة بالتحديد، ثم ركضت صوب الشرفة لتستنجد فطعنت الطعنة الثانية ثم تم إلقاؤها من البلكون.

سألتُ حسني قبل أن أفتح باب الحمام:

- لقيتوا حاجة في الحمام؟

قال حسني: نفس آثار الرجلين الي على السجاد موجودة على طرف البانيو.

نظرتُ للحمام النظيف بشكل مبالغ فيه ولم أهتم بتفاصيله الراقية، بل بالنافذة المفتوحة فوق البانيو.

اقتربتُ من النافذة الكبيرة فاكتشفتُ أنها تطل على شجرة ظل من السهل تسلقها، فإذا قام القاتل بالاستناد إلى طرف البانيو والجلوس على سور النافذة سيصل يُّسرِّ إلى الشجرة المتينة المؤدية إلى الجزء الخلفي من الحديقة المطل على الجراج الخاص بالفيلا.

هكذا اتضح طريقة الدخول والخروج دون الاستعانة بالباب.

ديدا كانت نائمة بغرفتها وأوصدت الباب من الداخل - لسببٍ لا أتبينه بعد - ثم تسلق القاتل الشجرة ودخل إلى الغرفة وقتلها، ثم خرج بالطريقة نفسها، وما يثبت نظريتي تلك الآثار بالحمام التي تحمل بقعاً من الطين ولا شك أن منبعها هو الحديقة.

دققتُ النظر فوجدتُ مسامراً بارزاً بطرف النافذة الخشبي جعلني أخمن أن من تسلق الشجرة ودخل من الشباك قد أصيب بجرح أو على الأقل تمزق سرواله.

- بص لقيت إليه؟

قالها قفز مشيراً إلى علبة السجائر والقداحة الموجودة عند طرف السرير قائلاً:

- علبة كليوباترا وولاعة بلاستيك رخيصة. ما أظنش إن دول يخلصوا يوسف.

وضعتُ يدي بجيبِي قائلاً: تفتكر دي الحاجة المهمة اللي الشغالة شافتها وندت يوسف عشانها؟

- نادته عشان علبة كليوباترا؟

- عشان اللي بيشرب الكيلوباترا يا أهطل.

- كيبيلوباترا؟! اسمها كليوباترا. كليو مش كيلو، بطلوا جهل بقى.

- طب ركز يا سفير ماركات السجاير في الوكسة اللي إحنا فيها.

زفر قائلاً: قصدك يعني إن مراته كانت بتخونه والخدمة شافتهم ونادت على يوسف عشان يقفشهم؟ حكَّ ذقنه بينما هزرتُ رأسي مؤكداً ثم أضاف: فدمه اتحرق وما قدرش يسيطر على نفسه وسحب أول سكينه شافها قدامه...

- وطعنها مرة عند باب الحمام فجريت البلكونة تصرخ وطعنها الطعنة الثانية ورمائها منها. نظرتُ صوب الشرفة مفكراً: بس يوسف طويل أوي. لو هو اللي عملها كانت دولي شافته.. القاتل لازم يكون في طول ديدا أو أقصر بحيث إن ما حدش يشوفه وهو واقف وراها، ويكون خفيف الحركة فيقدر يهرب من شباك الحمام ويتسلق الشجرة.

- شباك الحمام؟

نظر صوب الحمام فلاحظ الشباك الكبير المفتوح

- أنا أفهّمك. ست فريدة تعشق الكريم كراميل زي عينها بس
ماحدّش كان بيعرف يعمله على مزاجها غير و داد الي ما تتسمى فقبلا
يشغلوها عشان فريدة هانم شبطت فيها، وحتى البيه الي كان مايطقش
زفارة البيض، العقربة عرفت تحبّه فيه، وبعد كده لما نادين هانم كانت
مسافرة و داد غوتُ البيه ودبّسته والمدام نادين عرفت وكانت خناقة لربّ
السمّا فاطلقوا واتجوز و داد المقشفة. تقولش عاملة له عمل، يا باشا؟
قلتُ لها: ده إنتِ معبّية منها بقى.

- هو في حد في البيت ده طابقها؟ دي مارحمتش لا صغير ولا
كبير حتى البيه نفسه في الفترة الأخيرة بقى بيتخانق معاها كثير وكان
هيطلقها... آه، أنا سمعتهم إمبراح بوذني، قالها نتطلق وأديكي الفلوس
الي انتي عايزاها. شكله كده والله أعلم حن للمدام نادين، أنا كنت
بسمعه كثير بيتسحب عشان يكلمها في السر ووعدها إنه هيطلق الي
ما تتسمى، بس و داد قالت له تطلقني إزاي وأنا حامل، البيه وشه جاب
ألوان وقرر إنه يستحملها عشان العيل الي في بطنها ومش بقى تتعظ
وتصلح معاملتها مع البيه؟ كل شوية خناق. دي حتى اتخانقت معاه
ونكدت عليه في الحفلة.

- إمتى بالظبط؟

- قبل ما يطفوا الأنوار بيجي نُص ساعة. سُفتها متزبنة ويوسف
بيه وراها في الطريقة. كنت أنا بيجب الكريم كراميل للهانم الصغيرة في
أوضتها، وسمعتة بيقولها إنتِ مش هتبطلي غيرة ونكد، ماينفesch تمشي

في نص الحفلة، راحت فاتحة فيه ومزعقة وقالت له يعني طليقتك تبعت لك كلام حب ومش عايزني أتعصب، وبعدها رزعت باب أوضتها والبيه نزل وأما أنا طلعت من عند الهانم الصغيرة هي قفشتني وقالت لي روحي يا زفتة جبيلي كوباية اللبن بتاعي وطبق الفاكهة فجبتهم ودي كانت آخر مرة أشوفها يا باشا.

- وشكل سكينه الفاكهة دي إيه؟

- سكينه بمبي كده عليها ورد.

- يعني وداد كانت في الحفلة وبعدها اتخانقت مع يوسف وطلعت أوضتها ومانزلتش تاني؟

- أنا ماشفتهاش نزلت تاني.

- طب تفتكري مين ممكن يبقى قتلها؟

- بُص يا باشا. هي منكدة علينا عيشتنا كلنا بس ماحدث منا يقدر يئذيها، إحنا غلابة والله.

- مش لازم يبقى حد منكم، بس بتسمعيها بتخانق مع حد عامة؟ صممت قليلاً ثم أضافت مفكرة: أصل مايفش حد مش بتخانق معاه، يا باشا. ده حتى إمبراح الصبح دبت خناقة كبيرة مع شكرية و...

- شكرية مين؟

- أختها الكبيرة. شغالة ممرضة في القصر العيني وكانت بتمرض البيه الكبير أبو الأستاذ يوسف الله يرحمه وهي اللي جبت لنا المدعوقه أختها تشتغل.

- اتخانقوا على إيه؟

- ما أعرفش، تلاقيها كانت عايزة منها فلوس. ما هي اتعودت
تعرف من مال البيه وتدي لأختها. أنا لحقت الخناقفة من آخرها وسمعتها
بتشرشح وتقول ده أنا أفضحك وأشرب من دمك وشكرية معروفة إنها
كلبة فلوس وتاكل مصارين اللي قدامها عشان القرش وبعدين بتغير من
أختها عشان التجوزت البيه وبقت في الهلومة دي كلها وهي لأ.

- إنت شايفة إن شكرية ممكن تقتل أختها؟

- يمكن. يا باشا، دي عيلة بنت حرام ماتعرفش ربنا.

جعلنا يوسف يتصل بشكرية ويطلب منها الحضور العاجل بينما سألته:

- هو حضرتك والمدام اتخانقوا ليه؟

قال بتلقائية: غيرة ستات. نادين بعنت لي بوكيه ورد فديدا شافت
الكارت وأنعصبت.

- بس كده؟

- ديذا عصبية وبتكبر كل الأمور.

- مش غريبة إن نادين تبعت لك بوكيه بعد الطلاق العنيف اللي
حصل ما بينكم؟

- عنيف؟! بالعكس، إحنا طلاقنا كان مُتَحَضَّرْ جَدًّا وفضلنا أصدقاء
عشان مصلحة فريدة.

- بس لما يكون سبب الطلاق الخيانة مع الدادة، أكيد العلاقة هتبقى صعبة.

ارتبك و خلع نظارته ليفرك عينيه ثم أعاد ارتدائها وقال بنبرة متوترة:

- هو طلاقى له علاقة بالجريمة؟

- و داد لو ماكانتش حامل كنت طلقته و رجعت لمدام نادين،

مضبوط؟

ارتبك ثانية ثم قال: هو في مشكلة في ده؟

- هو حضرتك بتدخن سجائر إيه؟

تعجب من شذوذ السؤال ولكنه أجاب متردداً: أنا بشرب سيجار

مش سجائر هو...

- والمدام بتدخن؟

- آه، دافيدوف.. هو فيه حاجة؟

- لا، أبداً.. هو حضرتك أعلنت حمل مدام و داد؟

- لآ. هي حبت نستنى شوية عشان بتخاف من الحسد.

- ومدام نادين عارفة إنها حامل؟

- لآ، بس حضرتك بتسأل ليه؟

- مدام نادين كانت فين في توقيت الحفلة؟

- نادين عندها تصوير في أسوان و هترجع آخر الأسبوع.

- متأكد إنها كانت في أسوان النهارده؟

- متأكد طبعًا.
- تمام.. ممكن تنادي لنا على الهاوس كبير؟
- أكيد، بس هو حضرتك بتشك في حد معين؟
- في الوقت الراهن، كل حد دخل البيت ده موضع شك.

انتظرنا بالصالون الذي يغلب عليه اللون الذهبي والتماثيل واللوحات الفنية المجردة التي ظلّ قطر يحدق بها بإعجابٍ فأشعلتُ سيجارة بينما قال:

- أنا حاسس إن يوسف مش متضايق. بدمتك ده منظر واحد مراته الحامل اتقتلت؟!
- يمكن يكون تحت تأثير الصدمة، أو لما صدق خلص منها.
- تفتكر قتلها عشان يرجع لمراته القديمة؟
- كله هيبان، إتك على الصبر.
- طب علبة السجاير دي بتاعة مين؟ أكيد ماحدثش من اللي كانوا في الحفلة بيدخنوا كليوباترا.
- الفيلا مافيهاش غير ثلاث رجاله، الشيف وده الكل شهد إنه فضل في المطبخ طول الحفلة والجنايني وده راجل عنده ستين سنة وماكانش موجود أصلاً، كده فاضل مين؟
- يوسف المنياوي؟!!

- لاً، فاضل السواق.

قاطع حديثنا دخول امرأة قصيرة بمقتبل الخمسينيات لها وجه شديد الصرامة.

حاجباها الرفيعان معقودان، وشعرها الذي تحلَّته الخصلات بيضاء معقوصًا بشدة وتضغط على فكها بقوة واضحة ويدها مضمومتان وقبضتها مغلقتان وقد اقتربت بخطى ثابتة ورأس مرفوعٍ، ونظرت إلينا بشموخ ملكة مبعجلة ثم قالت بنبرة راقية:

- بونسوار، مسيو يوسف قالي إن حضراتكم طلبتوني.

أشار قطز لكبيرة الخدم أن تجلس على الكرسي المقابل فجلست مفرودة الظهر كالموناليزا.

- مدام زينب...

قاطعيني بحدة: مادمازيل من فضلك.

قلتُ ضجرًا: يا جناب معالي زينب هانم، الأستاذ يوسف كان فين وقت الحادثة؟

- كان معايا. طلعتنا السلام وعند الكوريدور سمعنا صريخ المرحومة بس الباب كان مقفول من جُوهٍ وبعد كذا محاولة قدرنا نكسره لكن لقينا الأوضة فاضية.

- وإيه اللي خلاكم تسيبوا الحفلة وتطلعوا الأوضة من الأساس؟

شددت قبضتها على يدها قائلة مهدوء:

- ده سؤال يقدر يرد عليه مسيو يوسف و...

قاطعُتها بحدّة: إحنا اللي نحدد مين يرد على إيه.

أضاف قطز برقته المعهودة مع السيدات:

- إحنا حايبين نسمع الإجابة منك إنتِ.. إيه الشيء الضروري اللي

كان لازم يشوفه في أوضة و داد؟

- أقولهم أنا، يا زوزو؟

قالتها فتاة في الثانية عشرة من عمرها واقفة عند طرف الباب ممسكةً بدمية كبيرة وطبق كريم كراميل لا أجد فرقاً بينها وبينه؛ فقد كانت سمينة ورخوة وبيضاء البشرة ولها عينان عسلتان وشعر بُني كالكريم كراميل.

قصيرة ومستديرة كالبرميل، دخلت بمنامتها الوردية حاملة دميته ثم جلست على الأريكة بجوار زينب وأكملت أكل الكريم كراميل قائلة: أنا اللي ناديت زوزو وقلت لها إني...

قالت زينب بنبرة آمرة: فريدة.. إيه اللي صحّاك دلوقتي؟

- أنا مانمتش أصلاً. قاعدة بتفرج عليكم من فوق. التفتت إليّ

مضيفة: أنا أوضتي قُدّام أوضة بابي، وكنت بتفرج على saw، عارفه؟

أجابها قطز: ده كله دم وتقطع؟ مش بتخافي؟

- بابي بيقول لازم أبقى شجاعة وقلبي جامد.

كررت زينب بنبرة جادة: فريدة، يلا على النوم.

- بس، يا زوزو أنا...

لها وماسك السكينة البينك وبيقولها هموتك هموتك، وهي قالت له أنا
حوّلت الفلوس في حسابك. خفضت صوتها وقالت هامسة: وحضنته
وباسته في خده وقالت له إنت مالکش غيري ماتسمعش كلام شكرية.
ارتبكت زينب ولكنها لم تُوقف فريدة ولم تمنعها عن الكلام بينما
أسهبت المراهقة في الحديث بأسلوب مسرحي تُعبر فيه طبقة صوتها
وتمثل بيديها:

- لفيت لقيت زوزو واقفة ورايا وبتقولي عيب تتجسسي على حد
لكن أنا قلت لها سعيد جوه مع...

قاطعها قطز: سعيد مين؟

أجابت زينب بهدوء: الشوفير.

فأكملت فريدة مسرعة: قلت لزوزو هروح أنادي على بابي بسرعة
يشوف بنفسه بس هي قالت لي خليك في أوضتك أنا اللي هناديه، لكن
وداد سمعت ولما بابي جه مالاقاش حد.

ألثفتُ لزينب قائلاً: هي دي الحاجة الضرورية؟

قالت ببطء: أيوه، أنا.. أنا حاولت ألمح لمسيو يوسف كثير بشأن...
نظرتُ لفريدة التي بدأت تقطع خصلة من شعرها وتمضغها وهو تصرف
لا يليق بفتاة في سنّها فقالت: سيبي شعرك يا فريدة.

تركت شعرها سريعاً ثم بدأت تداعب دميته التي تقبض على رقبتها
بعنفٍ فقالت زينب زافرة:

- أنا مش هعرف أتكلم والبنّت قاعده.

صاحت فريدة معترضة: أنا مش صغيرة. أنا كبيرة وعارفة كل حاجة. وداد كانت بتخون بابي.. بابي أصلاً مش بيحبها، لو ماكانتش حامل كان هيرجع لمامي ويسيبها. التفتت إلينا وهي تهز قدمها بتوتر وتريد من شدة قبضتها على دميتها: وداد كانت الناني بتاعتي وهي ضحكت عليّ وخلتني أحبها بعد كدة اتجوزت بابي ومامي عيطت كثير بسببها. هي وحشة مع كل الناس. التفتت إلى زينب قائلة: قوليلهم، يا زوزو إنها ضربتك النهارده وكانت هتخليك تمشي زي ما مسّت حامد.. احكيلهم.

همس لي قطز قائلاً: أنا شايف إن البنت تمشي.

- أنا شايف إن سعيد لازم يحضر حالاً.

- أنا بعث له.. هطلع أشوفه بنفسي.

خرج قطز برفقة فريدة التي سحبت دميتها الكبيرة ورحلت.

قالت زينب متضايقة: حضرتك خلّصت أسئلتك؟

- هو أنا لِسّه بدأت؟ مين سعيد بقي؟

- وداد شغلته من كام شهر. اتبلّت على حامد شوفيرنا القديم بيانه

أتخرش بيها وعملت دوشة ومسيو يوسف حب يريح نفسه فبعث حامد يشتغل عند أحد أصدقائه المهمين وخلي سعيد...

- وإيه شكل العلاقة بين سعيد ووداد؟

صمتت زينب قليلاً ثم أضافت: الشكل اللي فريدة قالت عليه.

- وإيه الدليل على ده؟

- أنا وألطف لمحنها كذا مرة بتتسحب لأوضته في وقت غير مناسب

أو هو يطلع لها في عدم وجود مسيو يوسف.

- والموضوع ده بقاله أدّ إيه؟

- حوالي شهرين.

- ويوسف كان حاسس بحاجة؟

- إطلاّقاً. المسيو بيثق في الناس كلها، أطيّب إنسان ممكن تتعامل معاه

في الدنيا.

- شكلك بتعزّيه أوي.

- أنا بقالي اتنين وتلاتين سنة بدير بيت عيلته.. هو بيعتبرني أخته الكبيرة.

- مدام إنتِ غالية عليه أوي كده، إزاي سمّح لوداد تضربك؟!

- ما يعرفش إنها ضربتني.

- ليه ما قتليلوش؟

- ما حبتش أزعجه الليلة دي. رأس السنة مناسبة مقدّسة عند مسيو

يوسف وممنوع طرح أي نوع من المشاكل حتى لو كانت نهاية العالم.

- بس مع ذلك ناديت عليه عشان يقفش وداد.

صمتت ولكني كنت أعلم الأجابة مسبقاً فقلتُ:

- عشان تردي لها القلم اللي أتدهولك، صح؟

رمقتني بكبرياء وتمنعت عن الرد فتأكدتُ من صحة تخميني وأضفتُ:

- هي ضربتك ليه صحيح؟

أجابت على مضض: عشان اكتشفت كذبتها.. وداد مش حامل.

(3)

أشعلتُ سيجارة ثم سألتُ زينب: وعرفتِ منين إنها مش حامل؟

- سُفتها النهاردة بتاخذ دوا خاص باللي شايلين الرحم.

- وانتِ عرفتِي منين إنه خاص باللي شايلين الرحم؟

- عشان أختي الصغيرة استأصلت الرحم وبتاخذ من الدوا ده فتأكدت إن حمل وداد كان كدبة حاولت تنقذ بيها نفسها عشان مسيو يوسف قرر يطلقها ويرجع لمدام نادين، بس لما عرف بحملها تراجع عن الفكرة. أنا قررت أواجهها لكن رد فعلها كان في غاية البجاجة.

- وما قُلتيش ليه ليوسف إنها مش حامل؟

زفرت في نفاذ صبر: ما قُلت لحضرتك عشان ما أنكدش عليه الليلة دي، بس كنت حالفة أقوله بعد الحفلة. مش بس عشان وداد لازم تنكشف على حقيقتها، عشان مسيو يوسف ومدام نادين لازم يرجعوا لبعض وفريدة تتربى بينهم.. وداد هي اللي بوظت كل حاجة، بعد خمستاشر سنة حب ووئام بين المسيو والمدام، كان لازم تطلع من الصورة عشان السلام يرجع في البيت ده.

بدأ الشك يبتابني، فزينب لم تكن فقط تتكلم عن وداد بكل ما أوتيت من كرهٍ وغِلٍّ، بل إنها تكاد تكون أقصر من الضحية فإذا وقفت خلفها لن يراها أحد، كما أن ولاءها ليوسف وعائلته منقطع النظير وقد يدفعها حبها للعائلة التي كرسست عمرها في خدمتها لهذا.

- يعني يوسف مايعرفش موضوع حملها لحد دلوقتي؟

- أنا قُلت له لأنه لما شاف وداد ميتة انهار على ابنه اللي كانت حامل فيه. فاضطريت أعرفه عشان أهديه وفهمته إنها ما تستاهلش دَمعة واحدة منه ووريته الدوا عشان يتأكد.

هذا يفسر ردود فعله الهادئة وعدم اهتمامه بمعرفة القاتل أو حتى حزنه على زوجته القتيلة.

- وصدِّقْ؟

- مش عارفة.. فضل ساكت، مانطقش بكلمة. عمري ما شُفته في الحالة دي. بيتعامل كأن مافيش حاجة حصلت، لا غضب ولا حزن.. حالة غريبة من عدم التصديق.

- موؤتوا أختشي، يا كفرة.

أتى الصوت مجلجًا غوغائيًا من الخارج؛ فاقتربت صاحبة النواح العجري واقترحت الصالون.

كانت امرأة في منتصف الأربعينيات قصيرة القامة، ناتئة العظام، لها أسنان بارزة من أسفل شفثيها الرفيعتين وشعر تختلط فيه ألوان الصبغة الرديئة بين الأحمر والبني والبرتقالي.

وقفت ورفعت يديها بأداء مسرحي فتشخّشت أساورها الذهبية
بذراعها الرفيعة وهي تقول:

- قتلوا أختشي، يا باشا. قتلوا أختشي الحيلة. بدأت تبكي فساح
كحلها ليزيد منظر وجهها النحيف قبحًا: يا عيني، يا وداد يا أختشي..
يا صغيرة على الموت يا أختشيسيني.

مطت زينب شفيتها ممتعضة من أداء شكرية الهمجي ثم زفرت قائلة:

- حضر تك عايز مني حاجة تاني؟

- حاليًا، لأ. بس خليك قريبة.

هزت رأسها وخرجت لتتركني مع شكرية شقيقة القتيلة التي بدأت
تمسح دموعها بكمها قائلة:

- لما كلموني في المستشفى ماصدقتش. زاد بكائها: أنا اللي مربية وداد
يا باشا. أبويا وأمي سابوهالي وهي تلاتاشر سنة وأنا اللي اشتغلت وريت
وحلفت لأخليها تتعلم وتأخذ الدبلون وتبقى عروسة. احتد بكأؤها
وهي تقول: تيجي تموت كده هُوك؟ بدأت تولول قائلة: سبتشيني لمن؟
لي مين من بعدك، يا بنت أمي وأبويا.. مين اللي عملها، يا باشا؟ مين اللي
قتل أختشي؟

أشعلت سيجارة أخرى وسألته متجاهلاً رثاءها المصطنع:

- تفتكري إنت مين؟

- يعني أنا اللي هعرف، يا باشا؟

- ردي عدل.. كنت فين الساعة اتناشر؟

- في المدعوقه المشتشفى عندي نبطشية.

- واتخانقت ليه مع أختك النهارده الصبح؟

مسحت دموعها كاشفة عن وجهها الحقيقي: عشان واطية بنت ستشين كلب.. طلبت منها مبلغ ميسواش ربع الي صرفته عليها في تعليمها تقوم الناقصة تقولي وأنا مالي ياكش تتحرقى.. ده أنا لو كنت مربية كلب كان طمر فيه. أول ما دخلت البيلا نسيت أصلها ونكرت جمالي عليها.. أنا اللي خلتها بني آدمة ووقفت حالي ومحتالي وفي النهاية تعمل كده هوك؟ عادت للبكاء: بس أقول أيه، يا باشا.. أختشي وماتت وقطعت بي... على كل اللي كان بينا ماكانش لينا غير بعضينا. كنا ناكل بعض زي الكلاب السعرانة وبرضك نرجع نتصالح.. دي مش أختشي الصغيرة، دي ضنايا. اشتد بكاؤها: ضنايا ماتت يا باشا.

خرجت الكلمات الأخيرة صادقة من قلبها وأخذت تمسح أنفها
المدبب كالساحرة الشمطاء:

- مين الي عملها يا باشا؟ شاوري بس عليه وأنا أنمش مصارينه.

- كنت تعرفي العلاقة الي بين سعيد ووداد يا شكرية؟

- هو حضرتك عرفت؟!!

- ده البيت كله عرف.

- عرفوا إمتى وأزاي؟ ده لحد النهارده الصبح ماחדش كان عارف

أيوتها حاجة.

- وإنتِ بقى اللي عارفة؟

- إلا عارفة. ده أنا اللي.. أستغفر الله العظيم. ماكتتش عايزة أحكي بس خلاص، ما هي ماتت وماعادش يفرق.. لما وداد رفضت تديني فلوس أنا جيت سعيد وحطيته قُدَّام عينيها كده هُوَّك وُقَلت لها لو ما ادتنيش اللي عايزاه هخلي البيه يعرف كل حاجة.

- هددتِ أختك بإنك تقولي لجوزها عن خيانتها له مع سعيد؟

أرجعتِ رأسها للخلف قائلة بدهشة:

- أستغفر الله العظيم، يا رب. تخون جوزها مع سعيد إزاي، يا باشا..

استغفر ربك.

- إيه، يا ست الشيخة؟ ما إنتِ اللي لِسَّه قايلة كده.

- قايلة إيه يا باشا. دي وداد تخون البيه مع أي حد إلا سعيد.

أجبتها ساخرًا: ليه أخته في الرضاعة؟

- لا يا باشا.. أمه.

(4)

فركتُ عيني وقد بزغ الفجر ونفذ ضوءه من النافذة بينما تكلمت
شكرية بلا توقف:

- سعيد يبقى ابن وداد ومدحت. الواطي عمل عملته مع البت وهي
خمسناشر سنة وقالها هسافر أطاليا وأرجع أعيشك برنسيسة. الفقري ابن
الفقرية مات في البحر وقرقشه السمك.. بس وداد كانت حيلة وجت
تعيط لي وأنا أختها الكبيرة وبرضك مسئولة عنها يا باشا. قالت لي
هتنزل العيّل قتلها حرام يا أختشي ده روح.. كان في بقى جارة عندنا
اسمها جمالات إنما غلبانة غلب الدنيا.. متجوزة جدع شغال في الكويت
وقالها إن أمه هتخليه يطلقها عشان لسه ماجبتلوش عيّل، أصل جمالات
مابتخلفش وكانت خايفة تقول لجوزها على الحكاية دي هيّك. أنا بقى
جت لي الفكرة حيث إن أنا إيه.. لما أحمخ أعجبك أوي. قلت لها خدي
ابن وداد وقولي لجوزك إنك حامل وهو كده كده بينزل مرة في السنة يعني
مش هيشك في حاجة. قامت جمالات خدت وداد الفيوم.. هي أصلًا
من هناك وعندها سجرتين برتقان.. عيّشت وداد معاها لحد ما ولدت

وخذت العيل بس مافيش مخلوق يعرف إن سعيد المكتوب في الشهادة
باسم جمالات وجوزها يبقى من لحم ودم وداد.

- أو مال إيه اللي جابه هنا؟

- الواد حاله اتشقلب بعد ما أبوه مات وعمه كل عليه ورثه.. وهو
عيل خايب وعواطلي وبيتشي على القرش. أنا شفت ظروفه وبرضك
كنت مبقوقة من وداد الصراحة يعني، قُلت أخلي المصلحة واحدة..
كلمته وقُلت له وداد تبقى أمك الحقيقية وامشي معايا تطلع بحاجة حلوة
وهو لما صدق.. كلب فلوس زي أمه. جبته لوداد وقُلنا لها تدينا فلوس،
نسكت وما نفتحش بُقنا.

- ابتزاز يعني؟

- فين الاستبزاز ده يا باشا؟ ده أنا سترت عليها ولميت لحمها وخلتها
تساعد الواد اليتيم وتشغله عندها وياكل لقمة حلوة ويلبس هدمه نضيفه
ويقعد في بيلا أهله ما يلموش يشوفوها من بعيد و...

- وإنت تسحبي من وداد وما تقدرش تقولك بم.

- ماتقدرش إيه؟ وداد دي جبارة، ده أنا لما طلبت منها فلوس آخر
مرة قالت لي كفاية بقى وأعلى ما في خيلك اركبيه، إنت ما عندكيش دليل
إن سعيد يبقى ابني، فقُلت لها بس عندي يا روح أمك دليل إنك مش
حامل.. أصل كلام في شرك، هي جاهها المرض إياه بتاع نزيف الرحم،
قبل ما تيجي البيلا هنا وكان لازم تشيل الرحم بس طبعًا اليه مش
عارف، هي خبية عليه.

- وسعيد؟

- عيل قلبه أبيض، هو عصبي حبتشين آه، بس يطلع يطلع وينزل على مافيش. وراث من وداد طبعها الحامي وخذ مني قلبي الطيب.
رفعتُ حاجبي، فأنا لا أفهم عن أي قلبٍ طيب تتحدث وكدتُ أسألها سؤالاً آخر، ولكن قاطعني دخول قطز المفاجئ ممسكاً بفتى في التاسعة عشر من عمره له أذنان وطواطيتان ووجهٌ كالفأر وبشرة لم تتعافَ من آثار حب الشباب بعد.

شدّد قطز قبضته عليه قائلاً: الباشا حاول يهرب.

ألقي به على الكرسي بينما قال الفتى معترضاً بنبرة همجية:

- ماكنتش بهرب، يا عم. إوعى كده طاهاه.

- يا عم؟! طب اظبط يا ض بدل ما اظبطك.

قالت شكرية بريية: بتحاول تهرب ليه يا سعيد؟

- ماكنتش بهرب بقولك.

صاح قطز: أو مال مين اللي كان بينط من فوق سور الفيلا.. ها؟

لم يكن غريباً أن يحاول الهرب؛ فهو قصير القامة ونحيف وبسرواله ثقب.. مواصفاته تطابق مع القاتل، كما أن فريدة رأته ممسكاً بالسكين ويهدد وداد بالقتل.

أطفأتُ سيجارتي قائلاً: بتدخن يا سعيد؟

أجاب بتردد: آه.

- أكيد كيلوباترا، ها؟ مش ثقيلة على صدرك دي؟
ضحك متهكمًا وقال متفاخرًا: يا باشا أنا لا مؤاخذة صدري حديد.
نظرتُ لقطز فهز رأسه موافقًا، إذًا فعلبة السجائر والقداحة اللذان
وجدناهما بغرفة وداد يخصانه.

- كنت بتعمل إيه في أوضة وداد الساعة إتناشر؟
حك رأسه قائلاً ببطء: والله، يا باشا يعني.. كنت بكلمها في موضوع
كده.

- موضوع إيه اللي يخليك ترفع سكينه على أمك؟
اتسعت حدقتا قطز في اندهاش، بينما استعجب الفتى قائلاً:

- هي شكرية اعترفت من أول قلم؟
شهقت شكرية قائلة:

- اعترفت على إيه يا واد؟ رفعت السكينه على وداد ليه؟ قتلت أمك
يا سعيد؟ اندفعت من مقعدها وانقضت عليه كالضبع ممسكة بعنقه
صائحة: قتلت أختشي يا ناقص.

دفعها بقوة صائحًا: إوعي كده. سكينه إيه يا باشا؟ إنت جبت الكلام
ده منين؟

- الناس شافوك ماسك سكينه الفاكهة وبتهددها.

- يا باشا دي كانت لحظة غضب.. إنت فاهم غلط. أنا طلعت لها
الأوضة وشديت معاها بكلمتين بس هي فهمتني الدنيا وأنا خرجت و...

- خرجت من الشباك ليه؟

صمت مرتبگًا فقلتُ له: قول اللي حصل بالتفصيل عشان كده القضية لابساك ياروش.

حكَّ رأسه ثم زفر قائلاً: يا بيه أنا خدت كاسين من اللي في الحفلة والخمرة ونّت معايا. كنت طالب منها فلوس وهي قالت مش هتديني فطلعت لها الأوضة وهددتها بس اللي هو طلقين في الهوا يا باشا، كلام في الكليتش يعني مش تهديد بجد وهي نفسها كانت عارفة كده وخدت مني السكينة وسابتها على السرير وسجّدتني، وقالت لي أنا بعت لك فلوس في الحساب اللي فتحتهولك عشان تسدد ديونك.. أصل أنا دخلت مشروع ساير وانتصب عليّ ومتداين لطوب الأرض وماضي على وصولات أمانة ومحتاج فلوس عشان ما أتجسسش مش أكثر من كده يعني.

- وبعدين؟

- البقرة الضاحكة بنت البيه دي شافتني من حُرم الباب ونادت على الحيزبونة اللي اسمها زينب فوداد قالت لي أنط من شبّاك الحَمّام قبل ما جوزها يشوفنا ويفهم غلط، يعني لما يلاقي راجل في أوضة نومه.. ما هو ماחדش يعرف إني ابنها غير شكرية.. نطيت بقى من الشباك ورجعت أوضتي اللي في الجراج وبعدها سمعت صوت.

قال قطز: والمفروض بقى نصدق الهتش ده؟ هددتها واتصاحتوا ومشيت؟

- ورب الكعبة ده اللي حصل.

- أَمَّالٌ حاولت ليه تهرب من الفيلا؟

- عشان ألحق أسحب الفلوس من البنك، أصل لو حد لقي إنها حوَّلتهم لي ممكن يشك فيّ.

قال قطز: إنت كداب شاطر أوي.

- كداب ليه يا باشا؟

- في حد يشهد على إنك طلعت من أوضة ودااد وهي لِسَّه عايشة؟

- يعني إيه؟

- يعني الكاسين لعبوا في دماغك وكلمة منك على كلمة منها طعتها عند باب الحَمَّام، جريت تستجد من البلكونة، طعتها تاني ورميتها وهربت إنت من شبَّك الحَمَّام وخفيت السكينة...

صاحت شكرية وانقضت عليه ثانية: قتلت أختشي يا وسخ؟

انتفض قائلاً: ورب الكعبة ما حصل.

أكمل قطز: طولك نفْس طول القاتل. دخلت الأوضة وقفلت من جُوّه وجزمتك سابت آثار طين ومسمار شبَّك الحَمَّام نتش بنظلونك وانت بتهرب.. شايل في قلبك غل وكره إنها بتنكرك قُدَّام الناس وكيان رافضة تديك فلوس وتعوضك فخلصت عليها.

- تعوضني عن إيه يا بيه؟ تعوضني على إنها جابتني من الحرام ورمتني لغيرها عشان تستر فضيحتها؟ يا بيه ده أنا ربنا أنقذني منها ومن عيشتها الوسخة.

- أُمّال قتلتها ليه؟

- وربنا وربنا وربنا ما قتلتها. التفت لشكرية صائحًا: قولي له.. قولي له إن إنت اللي جبتيني هنا ولعبت في دماغي بمفك عشان ناخذ منها قرشين. صاح صوبنا: ما قتلتهاش، ده أنا بخاف من الدم.. طب ورب العباد ما قتلتها.

صاح قطز بحزم: فين السكينة يالا؟

- ورب الكعبة ما أعرف.. أنا ما عملتش حاجة، إيه الإفترا ده!

قال قطز مخرجًا أصفاده: هو إنت لِسَّه شوفت إفترا!

تعلقت الأصفاد في يدي سعيد الذي لم يتوقف عن البكاء والصياح والقسم بأنه لم يرتكب الجريمة التي تُناسب مقاسه بشكلٍ دقيق. فما من شاهدٍ على رحيله من غرفة وداد وهي على قيد الحياة، كما أنه اعترف بنفسه أنه كان مخمورًا غاضبًا ولم يدرك ما يفعله. ربما المقت الذي يحمله بعقله الباطن دفعه لهذا.

يبدو الأمر في غاية البساطة، ولكن في الواقع عندما يكون الأمر سهلًا، أتأكد من أن هناك خطأ ما.

وُضع سعيد بسيارة الشرطة ولم يتوقف عن الارتعاش والتشنج والصياح حتى وصلنا إلى القسم كي تؤخذ أقواله ويتم التحفظ عليه إلى أن يُعرض على النيابة.

جلستُ إلى المكتب لاهياً بليمونتي الصفراء قائلاً لقطز:

- أنا مش مقتنع.

- بيايه؟

- سعيد مش هيستفيد من موت وداد. لسبب ما أنا مصدق أنه نط من

الشباك قبل ما وداد تموت.

صمّت قطز وقد قطب حاجبيه قائلاً:

- الأدلة كلها ضده يا نوح.

- عشان كده إحنا متحفظين عليه لكن فين الدافع؟

- عشان يشفي غليله.

- لو على الغليل يبقى الأولى إن شكرية هي اللي تقتلها بعد ما قضت

عمرها تربي أختها وستررت عليها لما غلطت. وداد بقت غنية وطرقت لها.

- بس شكرية كان عندها نبطشية في المستشفى.

- وجبانة ومش من النوع اللي يقتل.. هي تهدد، تبتز، تسرق لكن

قتل لأ.

- يبقى خلاص هو سعيد.

- مين المستفاد من موت وداد يا قطز؟ أو بمعنى تاني من المتضرر من

وجودها؟

- نادين مرات يوسف بس...

- بس هي مش عارفة إن و داد حامل و فاهمة إن يوسف هيطلقها.
- و كان كانت في أسوان وقت الحادثة.. يبقى يوسف نفسه؟ بس
طويل و كان هيشتاف في البلكونة.

- ممكن ما ييقاش هو اللي رامها.. هو اللي طعنها و حد غيره كمل.
صمت قطز للحظات ثم أضاف:

- قصدك إن اللي قتلوا و داد، اتنين مش واحد؟

- ماكانش فيه غير اتنين اختفوا وقت الحادثة ”يوسف وزينب“
و ما فيش شاهد على إنهم كانوا فين و بيعملوا إيه، غير هُمَّا الاتنين. يعني
ممكن يبقوا طابخينها سوا.

حاولت تخيل مشهداً معقولاً للجريمة.

- يوسف و زينب دخلوا الأوضة و يوسف قفل بالترباس و لمح سعيد
قبل ما يهرب فدمّه فار و سحب سكينه الفاكهة في لحظة غضب و طعنها
الطعنة الأولى فتنح و السكينة وقعت منه من الصدمة لكن و داد جريت
على البلكونة و صرخت. زينب خافت إن حد يسمعها و يوسف يتسجن،
فخذت السكينة و طعنتها الطعنة الثانية و زقتها عشان تحلص منها و تحمي
يوسف.. زينب أقصر من و داد.

حك قطز ذقنه مفكرًا حتى نطق أخيرًا:

- احتمال معقول و الدافع موجود عند الاتنين، بس فريدة قالت إنها
شافت باباها بيكسر باب أوضة و داد لأن أوضتها قدام أوضتهم بالضبط..

لو هو اللي قتل و داد كان عادي دخل و خرج من غير ما حد يشوفه، إيه الهدف من إنه يتربس الباب من جُوه و بعدها ينط من الشباك؟ و هنقول يا سيدي إنه غير البنطلون عشان ما يبانش قطع المسمار بس ليه يرجع الأوضة تاني و يكسر الباب؟ لو كان فعلاً مصدوم ما كانش هيلحق يفكر و يخطط.. و بعدين زينب هتنط من الشباك إزاي بسنّها ده؟ لفة طويلة أوي يا نوح.

أمسكتُ رأسي محاولاً مقاومة ذاك الصداع الذي يفتك بي قائلاً:

- أنا بفكر معاك بصوت عالي، بس أنا متأكد إنه مش سعيد اللي عملها.

- يا سيدي، هيتعرض على النيابة وهم يحددوا، ولّا أقولك؟ لما الساعة تيجي اتناشر، شبح و داد هيظهر؛ إبقى روح اسألها.
زفرت و قد ازداد ألم رأسي: شكلي هعمل كده.. معاك حاجة مسكّرة؟
حاسس إني مهبط.

- إستنى نبعث حد يجيب لنا تودو براونيز و...

- تودو براونيز إيه هو أنا قاعد مع ابن أختي!

مددتُ يدي بجيبي متذكراً وجود حبتين من السكاكر التي اشتريتها لتالا وخبأتها كالعفريّة بدميتها الكبيرة و...
دميتها الكبيرة؟!

أنفضتُ من على الكرسي ساحباً مفاتيحي قائلاً:

- قوم، يا قفز بسرعة.
- بسم الله الرحمن الرحيم، في إيه؟
- أنا غزاي ماخدتش بالي من اللقطة دي.. عارف مين اللي قتل وداد؟
- مين؟
- فريدة.

(5)

إذا رأيت فريدة، ستظنها ملاكًا لا يقوى على إيذاء بعوضة؛ ولكن ليس كل ما تراه حقيقياً.

كنتُ أرى أنه من المريب أن تكون فتاة بالثانية عشرة في عصر الواي فاي، تنتقل حاملة دمية كبيرة محشوة بالقطن في يدها، ولكنها ذكّرتني بتالا التي كانت تحمل دهبها القطني معها لأنها تخفي به سرّها - الحلوى المخبأة - ولا تود أن تتركه حتى لا تتفحصه أمها وتكتشف أمرها وهكذا فعلت فريدة.

لم عزمنا أن القاتل هربَ من النافذة؟

أليس من الممكن أن يكون قد اختبأ أسفل السرير أو بالخزانة منتظرًا حتى يُفتح الباب ثم يخرج من الغرفة - يوسف وزينب - هرعًا إلى الحديقة لتفقد جثة القتيلة وسط الحضور بينما يتسلل القاتل من الخزانة أو من أسفل السرير وصولاً إلى مكان آخر قريب؟

وأي مكان أقرب من الحجرة التي حدثت بها الجريمة غير غرفة فريدة؟

هكذا أتصور الأمر:

وصلت باقة من الورود بها كارت من نادين طليقة يوسف. وداد
رأت الكارت وشعرت بالغيرة فتشاجرت مع زوجها. سعيد لمحها تترك
الحفل متجهة إلى غرفتها.

ألطاف قدمت الكريم كراميل لفريدة - المنشغلة بمتابعة فيلم رعب
دموي - ثم رأتها وداد فصاحت بالخادمة وطلبت منها كوب الحليب
وطبق الفاكهة وفي دقائق كانت ألطاف نفّذت الأمر.

انشغلت وداد بتقشير التفاحة الحمراء في اللحظة التي رأته فيها
سعيد السكران يدخل غرفتها بحذائه المتسخ بالطين صائحًا فخافت أن
يراه أحدهم فأغلقت الباب من الداخل بكامل رغبتها.

أمسك سعيد كوب الحليب وألقى به عرض الحائط مترنحًا ثم سحب
سكين الفاكهة وهددها بالقتل في لحظة تهور. سمعت فريدة الضجيج من
حجرتها التي تبعد عن غرفة وداد بوضع خطوات.

نظرت من ثقب الباب لترقب ما يحدث بينما أخذت وداد السكين من
سعيد ووضعتة على السرير.

أتت زينب من خلف فريدة وتحدثتا، ولكن وداد سمعتها فجعلت
سعيد يهرب من نافذة الحمام.

نزلت زينب السلام وأمرت فريدة أن تعود لغرفتها، ولكن من شدة
فضولها لم ترحل.

بعد أن هرب سعيد من النافذة، أخذت وداد نفساً عميقاً وفتحت الباب متظاهرة بأنه لم يحدث شيء.

رأت فريدة واقفة أمامها فصاحت بها، عليها استفزتها أو شتمتها أو حتى ضربتها وربما سمعت صوتاً قادمًا من الحمام أو بشكل فطري اتجهت صوب الباب لتتأكد من أن سعيد قد رحل.

محمّلة بالكراهية ومشحونة بكمّ كبيرٍ من المشاهد الدموية العنيفة بالفيلم الذي كانت تشاهده، لمحت فريدة السكين على السرير وقد ألهمها مشهد تهديد سعيد لوداد بالقتل.

أوصدت فريدة باب الغرفة وأغلقت القفل الداخلي ثم سحبت السكين وأقربت من وداد الواقفة عند باب الحمام وفي اللحظة التي استدارت فيها وداد قامت فريدة بطعنها في بطنها بعنفٍ.

اندفعت وداد ضئيلة الحجم صوب الشرفة صارخة طالبة العون فطعتها فريدة القصيرة ثانية من ظهرها وعندما شعرت أن وداد مازالت حية، انحنت البدينة ذات الجسد المتين ورفعت قدمي الضحية ضعيفة البنية عن الأرض لتُسقطها من الشرفة.

استدارت فريدة لترحل ولكنها سمعت صوتَ أبيها وزينب يقتربان فاخبتأت سريعاً تحت السرير أو بداخل الخزانة وظلت هناك حتى كسر أبوها الباب ودخل وتفقد الغرفة ثم رحل الاثنان.

خرجت فريدة من مخبأها وهرعت إلى غرفتها. غسلت سكينها ويديها من الدماء وغيرت ملابسها ثم ألقت حولها ولم تجد سوى دميتها

المنفوخة الراقدة على السرير .

فتحت سحَّاب الدمية كما تفعل تالا وأخرجت القطن. دفست
السكين. أعادت الحشو. أغلقت السحَّاب وظلت متعلقة بدميتها حتى
لا ينكشف أمرها.

انزعج قطز من الفكرة وقال ونحن في طريقنا إلى الفيلا:

- لا لا لا.. مستحيل.

- ليه؟

- ليه؟! إنت بتحاول تقنعني إن بنوتة كيوت تـ...

- أولاً كلمة كيوت دي بتعصّبي.. ثانياً الجريمة جت بشكل عفوي
بدون سابق تخطيط وده يزود احتمالية إن هي اللي عملتها. العنف اللي
بيتشاف في التلفزيون كل يوم سواء أفلام ولأ مسلسلات ولأ حتى
الأخبار اللي بتعرض الجثث كأنهم جبنه شيدر عليها عرض في كارفور..
كل ده بيأثر على نفسية العيال ومش بس كده. هي حاسة بالخيانة من ناحية
وداد اللي وثقت فيها وحبّتها وبعدها لقيتها بتفرّق بين أبوها وأمها وكان
بتسيء معاملتها وبتتريق عليها وبتلطشها في الرايحة والجاية وماحدش
بيمنعها ويوم ما البنات اتعشمت إن أبوها وأمها هيرجعوا لبعض، وداد
طلعت حامل وفرقت بين أهل فريدة للمرة الثانية.

- بس، يا نوح..

- الضغط بيولّد الانفجار والناس بيتعاملوا مع عيالهم على إنهم أطفال مش فاهمين حاجة ولا عارفين اللي بيحصل حوالِيهم وإنهم لما يكبروا هينسوا، بس عمرهم ما بينسوا. كل إهانة وكل ضربة وكل قسوة يشوفوها بتتخزن جواهم، فطبعي تبقى دي نهاية وداد.

- طب على الأقل لو كانت هي اللي عملتها كانت تنهار، مش تبقى متأسكة ولا أجدعها سفاح.

- ممكن تبقى في حالة صدمة أو شايقة إن اللي عملته حلال في وداد فما تتأثرش بدليل إصرارها على إن وداد تموت. طعتها مرة واتنين ورميتها من البلكونة.

بدأ قطز يفتنع ولكنه رفض الاعتراف بذلك فقال:

- عموماً، نظريتك دي هتبقى صح لو لقينا السكينة في الدبدوب زي ما بتقول.

- تراهن على كام؟

كانت الساعة السابعة صباحاً عندما دخلنا فيلا يوسف وكان مضطرباً عندما قابلنا قائلاً:

- خير يا حضرة الظابط؟

عجز قطز عن الرد فقلتُ: حضرتك عارف إننا مالاقيناش سلاح الجريمة اللي هو سَكِينَةُ الفاكهة وسعيد ما اعترفش على مكانها فُكِّنًا شاكين إن حد خباه عند بتتك.

اضطرب قائلاً: عند فريدة؟ بس البوليس فتش الفيلا حتة حتة وقلبوا
أوضتها ومالاقوش حاجة.

- بس في مكان ماحدث فكر فيه، الدبدوب الكبير اللي بتتك
ماسكاه.. هي متعودة تشيله كده؟

- لآ. أنا حتى استغربت بس قُلت يمكن عشان خايفة ولا حاجة.

- ممكن أشوفه؟

- أوي، أوي. بس هو مين ممكن يجي السكينة في الدبدوب؟

كاد قطز أن يشرح له ولكني أوقفته قائلاً:

- كل حاجة هتبان، بس تسمح لي أشوف الدبدوب.

- طبعًا. لحظة أجيبه لحضرتك ...

- لآ. أنا هطلع معاك أشوفه بنفسي.

اضطرب ولكنه بلع ريقه قائلاً:

- اللي تشوفه.

وقفنا عند عتبة باب غرفة فريدة ذات اللون البرتقالي التي ينتشر على
حوائطها ملصقات أفلام الرعب ذات الوحوش البشعة والوجوه الدامية
والمشاهد المرعبة وقد كانت الفتاة البدينة نائمة في سريرها الكبير، تحتضن
دميتها بشكلٍ عنيفٍ وفور أن دخل والدها فتحت عينها وقالت متفضفة

- بابي؟

حبيبي. خليكى نايمة...أنا هاخذ ال teddy bear بتاعك وهطلع

نهضت فرعة وأحكمت قبضتها على الدمية قائلة:

- له يا بابي؟

- الطباط عايز يشوفه.

- لآ. ده بتاعي أنا، ماחדش يشوفه.

تعجب الأب من اعتراض ابنته بينما كانت مقاومتها - من وجهة

نظري - تأكيداً على نظريتي.

- حبيبي، هنشوفه ونرجعه تاني.

صاحت في أبيها بعنف: لآ، ماחדش هيشوف حاجتي.

جذب الأب الدمية ضجرًا ولكنها شدتها منه وظلا يتجادبان أطراف

الذب المحشو حتى انخلعت قدمه فصاح يوسف في ابنته:

- إيه يا فريدة الدلع ده؟

ومن الساق المخلوعة التي تدلى منها القطن، سقط السكين الوردي

محدثًا صوتًا معدنيًا على السراميك الأبيض ولمع عاكسًا ضوء الصباح

المنبعث من نافذة الغرفة.

شهقت فريدة واضعة يدها على فمها بينما تعجب الأب وكاد ينحني

لالتقاط السكين ولكني أسرعُ قائلاً: إوعى تلمسه، ده سلاح الجريمة.

شعر قطز بخيبة الأمل في اللحظة التي شعرتُ فيها بمشاعر لا

أفهمها.

نصر ماسخ وظفر مُر .

انفجرت فريدة باكية قبل أن ينطق أيُّ من ثلاثتنا وهي تقول:

- هي السبب... هي اللي عملت نفسها بتحبني وضحكت عليَّ عشان
تتجوزك وبعدها بقت بتضربني وتشتمني وتتريق عليَّ.

تجمدت أطراف يوسف وتبيست ملامحه وهو يتمتم بصوتٍ مهزوز:

- هي مين يا فريدة؟

أكملت بكاءها ووجهها يكاد ينفجر من شدة حمرة

- وداد.. وداد الشيطانة. هي اللي خلتنى أقتلها.

أسقط يوسف الدمية من يده وفتح فمه وشعرْتُ أنه عجز عن التنفس

بينما أكملت فريدة:

- هي اللي خلتك إنت ومامي تسيبوا بعض وخلت عمو حامد

يمشي وهي اللي ضربت زوزو وسممت الهاميستر بتاعي عشان بتخاف

منه.. هي اللي شالت صور مامي من كل حته وبقت بتطلع معاك في

التليفزيون بدلها وتقععد على السُفرة مكانها وتنام في سريرها وتاكل في

أطباقها.. إنت ومامي كتتوا هترجعوا لبعض بس هي حامل عشان

كده هتفضل طول عمرك معاها وهي هتفضل طول عمرها بتعذبني،

ماكتتش عايضة أخ منها.. أنا كنت عايضة أعيش معاك تاني إنت ومامي،

كنت عايضاكم ترجعوا لبعض.. وداد تستاهل اللي جرى لها. وداد

تستاهل تموت، يا بابي.



الجريمة لا سن لها.

أصبحنا في عصرٍ يسهل فيه سلب الناس أرواحهم ولا يجب أن تطعن أحدهم أو تلقيه من النافذة كي تصبح قاتلاً، فالقتل المعنوي هو سم بطيء المفعول ودائم الأثر.

كلمة واحدة قادرة على قتل أحدهم فهكذا يُصنع المجرمون، أيًا كانت طبقتهم الاجتماعية أو المادية فالنفس البشرية واحدة.

كلنا كائنات نطنُّ نفسها الأقوى بالرغم من أنها الأضعف، فلنا قلوب سهلة الجرح ونفسية هشة قابلة للكسر وعقلٌ من السهل التلاعب به وذاكرة تخلد كل ألم وجرح.

لم يعد من الإنساني أن نوذي صغارنا ونؤلمهم سباً وضرباً وسخرية وإهانة ظانين أنهم سيكبرون وسينسون لأننا في الواقع، لا ننسى ولا نغفل عنم أذونا أبداً.

أخرج قطز من جيبه اللعبة البلاستيكية الصغيرة التي يضع فيها بذور القرنفل النفاذة، أخذ بذرة داكنة اللون وبدأ يمضغها لسببٍ أجهله ولم أكن في مزاجٍ لأسأله عن هذا.

لم يتوقف عن المضغ بينما تصفح الإنترنت قائلاً بنبرة مصدومة:

- يا نهار إسود! تعرف إن فيه أكثر من 10 آلاف طفل محكوم عليهم أو محبوسين احتياطي في مصر... ونسبة الجريمة المتورط فيها الأطفال زادت 25% من بعد الثورة ونسبة المحكوم عليهم بسبب جرائم بشعة تؤدي

للحبس أكثر من عشر سنين، حوالي 23٪ من إجمالي الأطفال المسجونين
اللي 20٪ منهم ارتكبوا جرائم قتل عمد و 50٪ منهم سرقة ومخدرات؟!
لم أعلق و بقيتُ أحمق بالسقف في حالة من الشعور بالذنب.

للمرة الأولى، أشعر بالندم بعد كسفي لهوية القاتل الحقيقي.
حاولتُ أن أذكر نفسي بأنني أنقذتُ سعيد المسكين البالغ من العمر
تسعة عشر عامًا من حبل المشنقة، وأنه يعتبر أيضًا طفلًا بالنسبة لي،
ولكنني لن أنسى هذه القضية ما دمْتُ ولن يُمحى مشهد القبض على
فريدة وهي تبكي من ذاكرتي، ولا شكل تعبيرات أبيها المتكسر الرأس.
ذاك الرجل اكتشف في ليلة واحدة أن زوجته كاذبة وليست بحامل،
فخسر ابنًا كان يظنها تحمله بأحشائها وابنة أصبحت قاتلة بسبب نزوة
حمقاء وزواج متهور أقحم نفسه به ولا أعلم كيف سيكمل حياته حاملاً
على كاهله ذاك الذنب الذي اقترفه بحق ابنته الصغيرة.

اقترب قطز من الشاشة وأكمل كلامه بنبرة أكثر غضبًا:

- إلحق، يا عم. تعرف إن في 2016 بس، اتسجلت 15 ألف جريمة
ارتكبتها عيال تحت سن الـ 18 منها 4730 قضية سرقة و 4 قتل و 22
قضية سلاح ناري و 75 قضية سلاح أبيض و 333 قضية مخدرات و 40
قضية هتك عرض و 8 قضايا دعارة هز رأسه ثم كرر مصدومًا: دعارة؟!
- طب سمعت إنت عن قضية العيل اللي من سوهاج؟ قتل صاحبه
عشان اتخانقوا على زينة رمضان، وفي القناطر طفلين اتخانقوا على سعر

سماعات توكتوك وواحد فيهم قتل الثاني.. على الأقل فريدة كان عندها
دافع منطقي.

زفر قطز وأغلق اللاب توب بعنف ثم قال بجديّة:

- إبقى فكّري لما أخلف، لا خلي عيالي يتفرجوا على أفلام رعب ولا
أجيب لهم دباديب كبيرة.

ضحكتُ مضيئاً: ولا تخون أمهم مع دادة بتعمل كريم كراميل.



القضية الثالثة

(ست الحسن)



(1)

لو رأى قائدو السيارات العالقون بزحام كوبري قصر النيل ما أراه الآن بعيني، لوّأوا فرارًا وقفزوا بالنهر هلعًا.

على الكوبري العتيق، بين أبواق السيارات وصياح سائقها الغاضبين، انتشرت أشباح لأطفالٍ تتراوح أعمارهم بين الثامنة والسابعة عشر، يركضون بطريقة بهلوانية على السور الحديدي للكوبري ويرقصون بشكل همجي فوق تماثيل الأسود الشاخنة ثم يثبون إلى النيل أو يقفزون على أسقف السيارات ويطيرون فوق رؤوس المارة وبائعي الورود والمناديل.

خمس عشرة ضحية من أطفال الشوارع، ماتوا نتيجة حالة تسمم غريبة أصابتهم بمنطقة قصر النيل، وقد اتجه الصغار إلى المشفى ولكن لم يتم استقبالهم لعدم توافر المال أو عدم وجود مكانٍ لهم؛ فمنهم من مات على سلم المشفى، ومنهم من خرجت روحه على الكوبري وهامهم الآن، خمسة عشر طيفًا في حالةٍ من الهرج والمرج كأنهم بملاهي السندباد، وكل هؤلاء البشر الذين يتدمرون من الاحتناق المروري بساعة الذروة، يغفلون عمن يطفون ويعبثون حولهم.

من بين الأرواح التي غزت الكوبري، لفت انتباهي شبح رجل
بالبستينيات من عمره يقف متكئاً على السور بعيداً عن الأطفال العابثين
وهو يراقب الزحام في صمت.

يرتدي كنزة من صوف غالٍ ونظارة نظر ذهبية وله شعر فضي ناعمٌ
وملامح دقيقة وتوحي هيئته بأنه فيلسوفٌ أو فنانٌ يتأمل النيل تارةً
ويبتسم لأشباح الأطفال اللاهين تارةً أخرى، وقد بدا وجهه مألوفاً
لدي، ولكني لا أتذكر أين رأيته من قبل.

ارتاب شبح الرجل الأنيق لتحديقي المطول به فأبعدت نظري سريعاً
قبل أن يدرك أنني أراه، ثم أكملت قيادتي متجهماً إلى القسم متسائلاً إن
كان ذاك الأنيق قد مات مسموماً كباقي الأطفال.

قبل أن أتجه إلى مقعدي، أخبرني قطز برغبة اللواء رشوان في رؤية
كلينا فتوجهنا إلى مكتبه بعد أن قام قطز بتلميع حذائه وهذب شعره
ورش من عطره وكأنه على وشك مقابلة خطيبته.

طرقنا الباب ثم دخلنا المكتب الواسع ذا الأرضية اللامعة والخشب
الأنيق وقد رحّب بنا اللواء رشوان صاحب الوجه المستدير والأعين
الضيقة والأنف المعقوف ثم قال بصوته الخشن:

- أكيد سمعتموا عن حادثة ولاد الشوارع اللي اتسمموا من كام يوم.
أجبتُه: أكيد سيادتك.

- خدتوا بالكم من تلميحات العيال بتوع النت واتهامهم للداخلية

بإننا اللي سَمَّناهم عشان نخلص منهم زي ما حكومة البرازيل ضربت
أولاد الشارع بالنار.

قال قطز: يا افندم، لما القضية تتحل ونكشف الفاعل الحقيقي
هنخرس ألسنتهم.

- عدى أسبوعين وما تمش التوصل لأي شيء..

أخذ نفسًا عميقًا وأكمل: أنا منبهر بالشغل اللي إنتوا الاتنين عملتوه
في الفترة اللي فاتت، خصوصًا قضية طه عبد اللطيف، عشان كده قررت
إنكم تسيبوا أي قضية في أيديكم دلوقتي وتنضموا لزمائكم اللي شغالين
في الموضوع ده.. أنا ممكن أديها لحد قديم بس كلهم يفكروا في نطاق
محدود ويحطوا افتراضات تقليدية والموضوع دلوقتي التحول لقضية رأي
عام، والوزير نفسه متابع لأن أصابع الاتهام بدأت تتوجه لينا. أنا واثق
إن التسمم الجماعي ده مش صدفة زي ما أنا واثق بالظبط إن إنتوا الاتنين
هتقدروا توصلوا لإجابة منطقية للي حصل ده.

علقتُ قائلاً: وإحنا أدُّ ثقتك يا سيادة اللوا.

أضاف قطز: إن شاء الله هنلاقي اللي عملها.

ابتسم اللواء رشوان وأضاف بحميمية:

- طريقة شغلكم بتفكرني بأهلكم. يحبى وأنور كانوا لما يحطوا قضية
في دماغهم بيحببوا آخرها.

قال قطز متوسلاً: طب والنبى يا سيادة اللوا تبقى تقول الكلمتين
دول قُدَّام بابا عشان يبطل يقولي يا خايب في الرايحة والجاية.

ضحك اللواء فاهتز كرشه الكبير قائلاً:

- ده الفرق اللي بيني وبين أنور، هو مش شايف أمل في جيلكم بينما أنا مؤمن بإنكم قادرين على صنع المعجزات.. عايزكم ترفعوا راسي، الترقيات قربت.

نهض قطز قائلاً بثقة: صدقني، يا سيادة اللواء.. هتندهبش.

جلس كلانا إلى المكتب وسط الأوراق ونتائج المعامل بعد أن أطلعنا زملاءنا عمّا توصلوا إليه في القضية وفي الواقع، لم يتوصلوا إلى أي شيء.

قلتُ لقطز: إيه مادة الأترويين دي بقى؟

- المادة اللي اتسمموا بيها.

نظر إلى التقرير: جرعة زائدة من مادة الأترويين.

- مخدرات يعني ولا إيه؟

- مكتوب هنا.. -انتشل ورقة وبدأ يقرأها-: مادة تُستخدم كقطرة لتوسيع حدقة العين أثناء العمليات الجراحية والتهاب العنينة وبطء القلب والقولون العصبي والقرحة وترياق للتسمم من فطر عش الغراب والمبيدات الفوسفورية العضوية...

- إنجز يا قطز.. ده سم ولا دوا؟

- اللي فهمته إنه مادة تُستخدم في صناعة الأدوية بس جرعة معينة منه تخليه يتحول لسم.

- يبقى نشوف مين اشترى أي دوا فيه المادة و...
- الشباب عملوا كده، لقوا إن كل اللي اشتروه في الفترة اللي فاتت كانوا من مرضى القلب وجابوه بروشته وبالجرعة المحددة. الطب الشرعي قال إن المادة اللي مات بيها الأطفال هي المادة الخام للسم مش المستخدمة في الأدوية.

- وإيه مصدر المادة الخام للسم؟

- مش عارف.

- نبقى نعدي على طارق وهو يفهمنا. يعشق السموم زي عينيه.

- قشطة أكمل قراءة التقرير.

ثم أضاف: بيقولك إن السم دخل الجسم عن طريق الأمعاء، يعني اتحطت في أكل أو شرب.

- حلو، إيه بقى الشيء اللي أكل منه خمستاشر عيل في نفس التوقيت؟

زفر قطز قائلاً: حسبي الله ونعم الوكيل في اللي خلى العيال يموتوا على

سلام المستشفيات كده. تعرف إني فرحان إن الموضوع سخنان والعيون

على القضية كده؟ حق العيال دول لازم يجي.

- هيجي، بس إيه الدافع ورا تسميم خمستاشر عيل؟

- تلاقيه توريني جديد.

- التوريني كان بيغصب أطفال الشوارع وبعدها يقتلهم لكن المرة

دي ماحدث من العيال دول اتعرض للاغتصاب أو السرقة أو الضرب،

اتقتلوا وبس.

- يمكن شغل عصابات، معظم أولاد الشوارع متورطين في تهريب مخدرات أو إتجار.

- ما أظنش إن عصابة مخدرات هتقتل بالسم، معظمهم بيستخدموا طرق عنيفة وهمجية.. السم طريقة منتقم ذكي بس خايف يواجهه، مش عصابات قلبها ميت.

كعادته، دخل صلاح بملابسه ذات الألوان الفاقعة المؤذية للنظر بلا استئذان.

في الغالب لا يمر على مكتبنا إلا لثلاثة أسباب: كي يتباهى بأمر ما، كي يطلب منا طلباً سخيماً، أو لأن رائحة الطعام الذي نتناوله قد جذبت حاسة شمه التي تفوق حاسة الكلاب. وبرؤية هذه العلبة الحمراء الملفوفة بطريقة رخيصة التي يحملها بيده، أظنه أتى ليتفاخر بأمر ما.

- إيه يا نكدي منك له؟ بتعملوا إيه؟

لم ألتفت إليه وانشغلت بقراءة الملفات بينما نظر قطز للعلبة بفضول قائلاً:

- دي هدية الفالنتاين؟!

تظاهر صلاح التافه بأنه يرى العلبة لأول مرة ثم قال بتباهٍ لا داع له:

- إيه ده؟ إنت خدت بالك؟ داعب شعره الذي تفوح منه رائحة الجليل المقيتة: دي البت سماح، جاييالي برفان عشان عيد الحب، إنت عارف تفاهة النسوان.

- تفاهة؟! كتر خيرها إنها عبرتك.

- دي أقل حاجة، يا ابني. ده أنا مغرّقتها كروت شحن. بس والله أحسن من البت سوسن اللي جايبالي دبدوب محمياها في جردل تترتر -ضحك كاشفًا عن أسنانه الصفراء- النسوان لسعت، يا جدع. أنا يتجايلي دبدوب أحمر؟ فاكراني خريح تجارة إنجليش؟! ضحك ضحكته الأقرب لنباح الكلب ثم أكمل: لما نشوف نجوى هتجيب لي إيه، على الله تكون حاجة لها لازمة. التفنت إلي قائلًا: سيادة النقيب لمونة ساكت ليه؟ أجبته بفتور دون أن أرفع عيني عن الأوراق:

- مشغول.

- مشغول في إيه يا ابني إنت؟

- هو أنا مش قلت تبطل كلمة يا ابني دي؟!

- هو أنا بسبب لك؟ التفنت لقطز قائلًا: ما تقول لصاحبك ينزل من على البرج الي بيكلمنا منه ويتعامل معانا عدل، إحنا مش شغالين عند الست الوالدة.

قلتُ بهدوء: بقولك يا صلاح. خد هديتك وشنبك وجيل لولوا الي في شعرك ده واتكل على الله.

- آه. أنا برضو قلت كده. محروق إنت عشان جالي ثلاث هدايا وانت سنجل معفن ماחדش معبرك ضحك ساخرًا: يا شباب، صفوا نيتكم عشان ربنا يكرمكم.

قلتُ ببرود: يكرمنا بإننا نبقي زيك؟ عندك 34 سنة ومطلق ثلاث مرات ومخلف أربع عيال كل واحد فيهم من واحدة شكل؟!

ضحك الضحكة نفسها وقال: طب يمين ثلاثة بتغيروا مني. معلىش،
بكرة يجيلكم عدلكم. ضحك ثانية: صحيح وصلتوا لإيه فى القضية
بتاعت العيال اللي اتسممت؟ أنا كنت هشتغل فيها بس اللوا رشوان
شاف إنها قضية تافهة وصغيرة عليّ أوي.

أدرت عينيّ فى محجريها وزفرت ضجرًا فهكذا هو صلاح، يُتفه
ويحقر من شأن أي شيء يخفق فيه ويقلل من قدر من ينجح فيه حتى يهون
فشله على نفسه.

لم أعره اهتمامًا بينما أكمل منفعلًا:

- شوية عيال كلوا من الزبالة ولا اشتروا أكل بايظ وماتوا، إيه
بقى الهليلة الكبيرة اللي اتعملت دي والجراید العالمية تتكلم عن حقوق
الإنسان وإهمال المستشفيات ...

قاطععه قطز متضايقًا: ما هو لو كان عيّل من عيالك اللي اتسم
ماكتش قُلت كده.

احتدت نبرة صلاح قائلاً: إنت هتجيب عيالي بعيال الشارع؟ أنا موفر
لهم أحسن عيشة وهطلعهم بني آدمين مش بلطجية وكولاجية يرازوا فى
الخلق. التفت إليّ مضيئًا: إيه يا سي نوح. نسيت جارك اللي عيّل من دول
ثبته وغزه؟ ولا المتظاهرين اللي عيال الشوارع قتلوهم ولبسوها فينا، ولا
البنات اللي بيغتصبوهم.. إيه يا جدعان! العيال دي موتها راحة، بلاش
خوته دماغ.

- إنت ما عندكش ذرة إنسانية، اللي بتكلم عليهم دول أطفال

عندهم سبع وتمن سنين وكل القرف اللي هُمّا عايشين فيه ده بسببنا، مش عارفين نوفر لهم حياة كريمة ولا مأوى يلهمهم... يعني إيه عيل يتسمم ومايلاقيش دكتور ينقذه؟ يعني إيه يسيبوه يموت على السلم زي الكلب عشان مالوش أهل؟

- والله ماحدث خلاه يهرب من بيتهم ويعيش في الشارع ولا أجبر أمه على إنها تيجيه من الحرام وتبلينا به، بناقص الأشكال الوسخة دي.
طويت الملف الذي أقرأه وقد طفح بي الكيل، فأجبتُ صلاح بنبرة صارمة:

- أمثالك يا صلاح اللي مديين نفسهم الحق في تحديد مين يستاهل يعيش ومين يستاهل يموت، هُمّا اللي جايننا ورا...روح شوف البت نجوى جيبالك هدية إيه وسبنا نشوف شغلنا.

- وهو شغلكم حماية ولاد الشوارع والبلطجية و...

- شغلنا حماية الأرواح والأعراض والأموال ومنع الجرائم وضبطها وكفالة الطمأنينة والأمن للمواطنين في كافة المجالات.. مش دي المادة الثالثة من القانون 109 اللي إنت فالقنا بيه ومش حافظ منه غير اللي على مزاجك واللي لصالحك وبس!؟

ضحك متهكماً وقال: قلب خساية، يا أخويا منك له. خرج متمتماً:
جَنَتكم خيبة.

رحل عن مكتبتنا بعدما سحب كل الأوكسجين من الغرفة فقال قطز:

- أنا مش مصدقه بجعد.

- عادي، صلاح طول عمره حيوان وأفكاره...
- مش قصدي على أفكاره.. أنا مش مصدق إن صلاح المعفن تجيله
تلات هدايا في الفالتيان وأنا قاعد زي قرد قَطَع.. ده ظلم.
زفرتُ قائلاً: طب قوم، قوم نروح لطارق، يا خيبتها.

في طريقنا إلى صيدلية طارق بجاردن سيتي، رأيتُ السيدة "فتون"
ذات القامة الطويلة والجسد النحيف والبشرة السمراء والشعر الأسود
الجارسون والملامح المتطابقة مع نفر تيتي.

تقف بمحل الورود الذي افتتحه أبوها بالخمسينيات ليصبح أول محل
يستخدم منظر الشلال الصناعي والمياه الجارية على الزجاج الخارجي.

لهذه السيدة مَعزَّة خاصة بقلبي؛ فقد اعتادت أن تعطي جدتي ما لا
يقل عن ثلاثة أو أربعة بطرمانات من مربى التوت التي تصنعها بالمنزل
والتي أعشقها بشكل يفوق الوصف وأكاد أجزم أنني سأصاب يوماً ما
بمرض السُّكري من كثرة تناول مربى جارتنا فتون.

لم أكن الوحيد الذي يعشق هذه السيدة ذات الصوت الوديع
واللمسات الحنونة؛ فالجميع يحبها.

ليس فقط لأنها صاحبة أرقى ذوق في اختيار الهدايا وتزيين باقات
الورود، بل لأن السيدة فتون البالغة من العمر خمسة وخمسين عامًا امرأة
ملائكية، خُلقت لتشر البهجة بيننا؛ فبكل مناسبة تنزل الشوارع وتوزع
الورود على الناس، فبعيد شرطة تتجه إلى قسم قصر النيل وتوزع الورود

البيضاء على الضباط والعساكر والأمناء، وبالصيف توزع المياه الباردة على عساكر المرور لترحمهم من حرارة أغسطس وبعيد الفطر تفرّق علب الكحك بالملبن على البوايين والباعة الجائلين، وبعيد الحب تضع تخفيضات خرافية لا مثيل لها على باقات الزهور وتقف أمام محلها بعربية بلاستيكية مزينة بشكلٍ مبهج، وكلما مرَّ أمامها حبيبان أعطتها وردة بابتسامة تأسرك.

لمحتنا عندما نزلنا من السيارة ولم يكن حب قطز لها أقل مني، ففور أن رآها أقبل عليها وقبّل وجنتها، بينما عانقتُ فشخلت أساورها الفضية ذات الرموز الفرعونية وهي تقول:

- الطبايط الحلوين عاملين إيه؟

أجبتها: ما فيش حد في الكوكب يقول طبايط دي غيرك.

- عشان أنا ما فيش مني اتنين يا ولد.

- لا منك ولا من مرتبك.. وبالمناسبة هي ال...

- المربى بتاعتك هتوصل لك قريب، المرة دي أنا عملاها بطريقة

جديدة.. مش هتشتري ورد؟

أجابها قطز: ملين، يا حسرة؟

- للبنوتة اللي بتحبها.

أجبتها: بنوتة مين، يا طنط؟ صباحك مربى.

- الكلام مش ليك، يا أبو قلب ناشف.. قولي إنت يا قطز، ما فيش

حاجة كده ولا كده؟

قال ساخراً: يوووووه، ده فيه وفيه وفيه.. ماما الله يبارك لها عايزة
تجوزني استشهاد.

تعجبت قائلة: استشهاد؟! مش دي بنت خالتك رتبية؟

- آه. طب بدمتك أنا أتجوز واحدة اسمها استشهاد؟

أجبتة ساخراً: ده على أساس إن اسمك لؤي؟!!

قالت السيدة فتون: بغض النظر عن اسمها، إيه الي مش عاجبك فيها؟

- مش بحبها يا طنط. ده أنا ماباطقش خالتي نفسها أقوم متجوز بنتها
وأخليها حماتي؟!!

- إوعى تتجوز غصب عنك يا قطز. مش كفاية خلوك ظابط بالعافية؟

- والنبي قوليلها عشان أنا خلاص قربت أبلبلع حبوب وأنتحر.

- بمناسبة الحبوب، هنروح لطارق في الصيدلية ونرجع لك تاني يا طنط.

- ماشي يا حبايبي. في رعاية الله.

دخلنا الصيدلية التي تدلت على بابها ستائر من القلوب البلاستيكية
المزعجة، ووضع على الزجاج ملصقات لملائكة مُحلَّقة بمناسبة عيد الحب
الرتيب؛ فقد انتشرت الزينة الحمراء كالجدرى الذي أصاب مقاهي
ومحال القاهرة.

وجدنا طارق جالساً أمام أرفف الأدوية الزجاجية، يحملق بشاشة
التلفاز متابعاً برنامج وثائقي بقناة ناشونال جيوغرافيك بكل حواسه
حتى إنه لم يلاحظ دخولنا، فصَحَّتْ مِباغْتًا:

- طارق!

أغفل المسكين وأخذ يتلفت حوله كمن رأى عفريتاً:

- حرام عليك يا نوح.

- ده ممكن حد يدخل يقلّبك ويطلع وانت ولا حاسس.

نظر قفز صوب شاشة التلفاز المعلقة على العمود الجداري وسأل

طارق باهتمام:

- بتتفرج على إيه؟

- مسلسل العبقري.

- مش ده بتاع قصة حياة آينشتاين.

- آه، إنت متابعه؟

- طبعاً، سُفت الحلقة لما اتحدى البروفيسور فيليب لينارد في

المحاضرة؟

- آه ولما اتخانق مع ميلفا مارتش و...

قاطعتُ حماسها العلمي - فعندما يجتمع قفز وطارق، لن تجد نهاية

لحديثها الثقافي:-

- والنبي اقللوا صفحة ويكيبيديا اللي فتحتها دي واطفي لنا

التليفزيون ده عشان عايزينك في موضوع مهم.

اضطرب طارق قائلاً:

- في إيه؟ نادية اشتكت لك من حاجة؟

- وهي نادية محتاجة تشتكي لحد؟ هي بتعرف تخلص على طول.
- أطفأ التلفاز قائلاً: على رأيك. أمّال في إيه؟
- قال قطر: عايزين نسألك عن مادة اسمها الأترويين.
- آه. دي موجودة في بعض أدوية القلب وقطرة لتوسيع حدقة العين في العمليات و...
- عارفين الكلام ده بس عايزين نفهم هي سم ولا مخدر؟
- نسبة الأترويين الموجودة في الأدوية اللي في الصيدليات مش مخدرة ولا بتسبب الإدمان لكن المادة الخام للأترويين بتسبب هلاوس، في العصور الوسطي كانوا بيستخدموها كمخدر.
- والمادة الخام دي بتتجاب مين؟
- من مشتقات قلويدات الأتروبا الموجودة في نبتة البلادونا أو بالعربي شجرة ست الحسن والمضاد السُمي للأترويين هو البيلوكاربين وأعراض التسمم بتبدأ بعد حوالي ساعتين تلاتة من هضم السم وكل ما كانت الجرعة أكبر كل ما ظهور الأعراض كان أسرع إلا لو كان السم اتخط في وجبة دسمة، التأثير يبقى أقل.
- يعني السم ده بيتباع فين؟
- الحصول على السم ده صعب جداً، بيتجاب من المعامل أو من الشجرة نفسها.
- الشجرة دي بتزرع في مصر؟

- ما أقدرش أفيدك في الحنة دي لكن خليني أكّد لك إنه صعب
تلاقي سم الأترويين.

جلسنا بمقهى البستان بعد أن اشترينا الساندويتشات من فلفلة
وطلبنا المشروبات الساخنة.

ارتشفتُ القهوة بينما ظلُّ قُطزٌ يحدق بمصباح الإضاءة الباريسي
التصميم بصمت فظنته يراجع معلوماته التاريخية عن ماضي مقهى
البستان أو تاريخ إنارة العمود أو أيّ من تفاصيل قطر الثقافة الغربية
ولكنه قال:

- البلادونا دي سمعت عنها قبل كده، مش فاكر فين، بس واثق إن
حد مات مهم بسمها.

- لحد ما تفتكر، عايزين نعرف السم تحط في إيه؟

- بقولك يا نوح، الدنيا هادية وضملة، ما تيجي؟

نظرتُ له بارتياب: نيجي إيه بالظبط؟

- نكلم أرواح العيال.

- آآآآه، أنا كنت ناوي أعمل كده. زفرتُ قائلًا: ربنا يستر.

- ليه في إيه؟

- في إيه؟ أصلك ما شفتش العيال دول بيعملوا إيه على الكوبري.

يزداد نشاط الأرواح ليلاً وهكذا أمسى لعب الأطفال ومرحهم
هسيترًا.

كان الكوبري خاليًا من المارة والحركة عدا صريخ وصياح أشباح
الأطفال الذين يتنادون بصوتٍ عالٍ ويركضون على السور كالبهلوانات
ويجرون خلف بعضهم ويلعبون الغميضة.

ودَّ قطز أن يأتي معي، ولكنني لا أشعر بالرحمة عند التحدث مع
الأرواح أمام الأحياء فأصررتُ على الذهاب بمفردي وشففتُ سيارتي
على حيد الكوبري ونزلتُ منها ممسكًا بالليمونة.

وقفتُ مترددًا؛ فأنا لم أتحدث يومًا مع هذا العدد الكبير من الأرواح في
الوقت نفسه ولم أرَ أطيافًا بهذا النشاط من قبل.

كانت أصوات ضحكهم ومرحهم عالية، لا أظن أنهم كانوا بهذه
السعادة عندما كانوا أحياءً.

داروا حول أنفسهم في دوائر وهم يلعبون فشقتُ الليمونة نصفين
وإذ بالأطفال كلهم يلتفتون إليّ ويحدقون بي بطريقة مريبة فقلتُ مترددًا:

- سلام عليكم، أنا نوح الـ...

قبل أن أكمل جمليتي، ركضوا صوبى مهللين وهجموا عليّ كمحاربي
الطروادة.

امتدت أيديهم الشبحية لانتشال الليمونة من بين أصابعي قائلين:

- لمون، لمون، لمون.

صحبتُ بهم محاولاً أن أخفي الخوف والرجفة التي أصابتنني:

- بالراحة، بالراحة.

تراجعتُ ولكنهم ظلوا يطوفون حولي بحماس طفولي مزعج وحيوية مفرطة حتى التصق ظهري بالسور ولم يعد هناك مفر فتحوّل خوفي إلى

غضبٍ

- ابعدوا.. انصرفوا يا ولاد الكلب.

لم أعد أحتمل الطاقة الكهر ومغناطيسية المتولدة من خمسة عشر شبحاً يعانون من نشاطٍ مبالغٍ فيه؛ فألقيتُ بالليمونة جهة النيل فحلّقوا في الهواء وطاروا خلفها ونزلت أرواحهم بالنهر.

شعرتُ بالوهن مع تصارع نبضات قلبي فابتعدتُ عن السور لاهثاً، وقبل أن أصل إلى سيارتي، ظهر أمامي شبح الرجل ذو الشعر الفضي والكنزة الصوفية قائلاً:

- إنت شايفنا، صح؟

حاولتُ أن أنظم أنفاسي وألا أعلتُ مع شبح جديد ولكنه أضاف بابتسامة هادئة:

- هتعمل نفسك مش شايفني زي كل يوم؟

أخذتُ نفساً عميقاً ثم قلتُ بهدوء: سلام عليكم، أنا نوح الألفي.

مدَّ يده ليصافحني قائلاً: وعليكم السلام، أنا ياسين الجارحي.

- بلاش لمس والنبوي.

لم يفهم ياسين ما أقوله ولكنه أنزل يده ونظر للأطفال الذين بدأوا
يخرجون من النهر ليكملوا لعبهم قائلاً: تعرف إنهم فاكرين أنفسهم أبطال
خارقين مش أرواح ميتين.

- إنت اتكلمت معاهم؟

- دول هم اللي مسلييني. صحيح، إنت شايفنا إزاي؟ وسيط روحاني
زي الأفلام الأمريكياني؟

- يعني.. حاجة زي كده.

- واكتشفت الحكاية دي إمتى؟

لم أكن في مزاج رائق لأقص عليه حكايتي مع جبل الموتى؛ فغيرتُ
دفة الحوار قائلاً:

- إنت مُت أزاي؟

- كنت قاعد في عربيتي ومُتّ فجأة بدون أي مقدمات.

- بالبساطة دي؟

ابتسم قائلاً: هو الموت لازم يبقى معقد؟

- لآ، بس عشان أنا متعود إن الناس بتموت مقتولة ومسمومة
ومدبوحة، فإن حد يموت موتة طبيعية ده اختراع بالنسبة لي. تأملتُ
ملاحه لثوانٍ ثم علقْتُ مضيقاً: أنا شُفتك فين قبل كده؟

- إنت بتنح لي كل يوم وانت معدي على الكوبري.

- مش قصدي وانت ميت، شُفتك وانت حي.

- لو بتروح الأوبرا أكيد سُفّنتني، أنا مايسترو و... .
- أيوه صح.. ياسين الجارحي. أنا جدتي حضرت لك حفلة قبل كده وخلّتي أصورها معاك.
- فعلاً؟
- جدتي بتحب الأوبرا جدّاً.
- ده شيء عظيم. قولي يا... .
- نوح.
- اسمك حلو أوي، مين الي اختارهولك؟
- جدتي. كانت بتقرا سورة نوح لما جاهها خبر إن ماما بتولد فقررت تسميني نوح.
- طب قولي يا نوح. إنت عايز إيه من الأطفال دول؟
- أنا من الي بيحققوا في قضية قتلهم.
- أخيراً حد قرر يجيب لهم حقهم، طب وصلتوا لإيه؟
- ماتوا بهادة سامة، كان في حد قاصد يقتلهم مش صدفة ولا أكل بايظ.
- وكنت عايز تكلمهم في إيه؟
- كلوا أو شربوا إيه. أي معلومة تفيدنا بس هُمّا هايبر بزيادة.
- ثبت نظارته الذهبية على أنفه ثم قال:
- لعلمك دول أطفال لطاف جدّاً، لكن محتاجين حد صبور.

- أصل أنا ماليش خُلق مع العيال.
- أنا ممكن أكلهم لك. شوف عايز تعرف إيه وأنا أسألهم.
- لو عملت كده يبقي كتر خيرك و...
- أنا بس محتاج منك خدمة صغيرة.

(2)

كنت واثقاً من أنه لا يوجد أحد يُقدِّم مساعدة مجانية بهذا الزمن.

- خدمة إيه؟

- روح لبنتي الكبيرة قولها بابي بيقولك ما تتجوزيش كريم.

حككتُ ذقني قائلاً: بابي مين؟

- بابي أنا، روح لبنتي و...

قاطعته ساخرًا ومتخيلاً مشهد لقائي بابتته:

- أروح لبنتك أقولها أنا سُفت بابي الميت على كوبري قصر النيل

لابس بلوفر صوف وبيقولك ما تتجوزيش كريم. آه، نسيت أعرفك

بنفسي أنا نوح الألفي اللي يشوف الأرواح.

- أكيد مش هتقولها كده، شوف لك طريقة.. أنا اكتشفت إني أقدر

أروح لها بمجرد ما أفكر فيها بس هي لا بتشوفني ولا بتسمعي.

- اطلع لها في الحلم وكلمها.

- أطلع لها في الحلم إزاي؟

- اقف عند طرف سريرها وهي نائمة وأبدأ أتكلم معها، الروح
بتنفضل عن الجسد في وقت النوم وتقدر تشوف أرواح الميتين.

- إنت متأكد من الكلام كدة؟

- جرب وانت تعرف. أغمض عينيه ليرحل ولكني استوقفته: إستنى
رايح فين؟

- هروح لبنتي أقولها ما تتجوزش كريم.

- أكيد بنتك مش هتتجوز وأبوها لسه ميت، فمممكن نستنى ونشوف
موضوع العيال ده الأول؟

- إنت مش فاهم، أنا اللي ضغطت عليها عشان تستمر في الخطوبة.
في الأول كانوا بيحبوا بعض وبعد ما اتخطبوا وميعاد كتب الكتاب قرب
قالت لي أنا عايزة أسيبه يا بابي عشان حاسة إنه بيخوني بس أنا افتكرتها
بتدلح أو إن دي غيرة بنات مالهاش لازمة، ده غير إن والد كريم يبقي
صديق عمري وما أقدرش أبقى في موقف محرج معاه لكن لما مُتَّ وبدأت
أراقب تصرفاته اكتشفت أن عندها حق وإنه فعلاً حقير وبيخونها وأنا
مش...

- مش عايز بنتك تكمل حياتها مع واحد خاين بسببك، مفهوم
مفهوم. ساعدني بس في القضية دي وإن شاء الله كله هيبقى تمام.

- طيب.. عدّي عليّ بكرة في نفس التوقيت.

في تمام الواحدة بعد منتصف الليل، وقفتُ بالمكان نفسه على كوبري قصر النيل واضعًا سماعة البلوتوث في أذني حتى لا يظن أحدهم أنني مجذوبٌ يحدث نفسه.

ظهر شبح المايسترو ياسين الجارحي بجوارِي قائلاً بوجه مشرق:

- لقيت لك الإجابة، تعالى معايا.

مشينا حتى تثال الأسدين بمدخل الكوبري ووقفنا أمام واحدٍ يمتطيه فتى سمين في التاسعة من عمره يهتز فوق الأسد الشامخ فيتحرك جسده الرخوي بشكل متموج وهو يقول:

- شيببي، شيببي.

كان يظن الأسد حمارًا يمتطيه بالحقل فقلتُ لياسين يائسًا:

- هو ده الإجابة؟

- ده ولد في غاية الذكاء.

- ذكاء إيه؟ ده فاكر أسد قصر النيل حمار.

- ما تتسر عش في حكمك. أشار للطفل منادياً: يا بطيبسيخة. انزل،

يا حيببي.

أجابه الفتى بصوتٍ يلهث من بين دهونه وشحومه:

- أنا بطل خارق وراكب أسد.

- طب انزل دلوقتي ونبقى نركب الأسد بعدين يا بطيبسيخة.

- اسمي سوبر بطيبسيخة.

- طب انزل يا سوبر بطيخة عشان تساعدنا. مش السوبر هيروز
بيساعدوا الناس؟

زفر الفتى ونزل بسترته الممزقة وحذائه المثقوب وسرواله المتسخ
وقفز شبحة من فوق التمثال ليقف أمامنا لاهثاً فقال له ياسين بحنانٍ:

- بطيخة يا حبيبي، احكي لأنكل إنت سُفت إيه.

حكَّ رأسه قائلاً: ها؟

- أنكل إيه يا أستاذ ياسين. اقتربتُ من الطفل قائلاً: إنت سُفت إيه

يا بابا.

- هات بوجار وأنا أقولك.

- إيه؟

- طب هات بوزو.

- يا حبيبي إنت م...

- هات ببس طااه.

- اللهم طوِّلك، يا روح.

زفر وأشار لي أن أقرب قائلاً: تعالا أقولك في ودنك.

اقتربتُ فبدأ يهمس في أذني بعد أن ظل يتنفس بها لفترة طويلة حتى

قال:

- معاك ملبس؟

صحَّتْ به: يا ابني.. يا ابني، ماتخنقنيش بقى.

قال ياسين: بطيخة يا حبيبي، هنديك اللي إنت عايزه بس قولهُ اللي
حكيتهُولي.

أشار إليّ أن أقترّب ثانية فقلتُ معترصًا: إنت بتوشوشني ليه ما تحكي
وتخلصني.

بكي صائحًا: إنت بتزعق لي.. طب والله ما هحكيلك حاجة.
كاد يرحل ولكنني استوقفته قائلاً:

- خلاص، يا حبيبي أنا راجل قليل الأدب. اتفضل احكي.
مسح دموعه قائلاً: هات ودنك.

أطعته مضطراً فبدأ يتكلم ببطءٍ ويتنفس بصعوبة بين الكلمة
والأخرى.

- في راجل سايق عربية سودة كبيرة وزَّع علينا عصير بتنجاني.
- بتنجاني؟

- لونه بتنجاني وطعمه مسكر.. كلنا شربنا منه وبطننا وجعتنا.. رُحنا
المستشفى بس من كتر الوجع نمنا وصحينا لقينا نفسنا أقويا وبنطير في
السما وبنعوم في النيل وماחדش يقدر يشوفنا.

- شكله إيه الراجل ده؟

- طويل ورفيع وأسمر ولابس جلايية بيضا وطاقية حمرة ونضارة
شمس واكله نُص وشه.

- لو سُفت الراجل ده تعرفه؟

- أنا سوبر بطيخة وعارف الناس كلها.. هات شوكولاتة.
- هجيبلك بس كامل، تعرف اسم الرجل ده؟
- لآ، أول مرة أشوفه.
- طب سمعته يقول حاجة أو... .
- ده راجل أحرص بيتكلم بالإشارة.
- طب كان فيه حاجة مكتوبة على علبة العصير اللي وزعها عليكم؟
- ماكانتش علبة. إزازة كبيرة بيكب منها في كوابيات بلاستيك.
- طب والعربية اللي كان بيسوقها؟
- قال ياسين: بطيخة حافظ رقمها و..
- قاطعته الفتى صائحًا: أنا سوبر بطيخة.
- قال ياسين ضاحكًا: أنا آسف يا سوبر بطيخة.
- رفع رأسه بشموخ ثم أشار لي حتى يكمل حديثه بأذني:
- أنا بحفظ أرقام كل العربيات من بصة واحدة بس.
- تصدق يا ض إنك فعلاً سوبر هير، إيه رقم العربية؟
- مانا مش بعرف أقرأ ولا أكتب.
- ضربتُ وجتتي قائلاً: ألطم؟! ألطم على وشي؟!!
- أنا ممكن أرسمهالك، أنا برسم حلو أوي، أرسملك كلب؟
- كلب إيه يا بابا إنت مش هتعرف تمسك ورقة وقلم.

- ليه؟ هو أنا اتشليت؟

- لأ عشان إنت مي... توقفتُ عن الكلام وتراجعتُ عن إخباره
بكونه ميتًا فقلتُ: عشان إنت بطل خارق والأبطال الخارقين مش
بيستخدموا الورقة والقلم.

زفرتُ ووضعْتُ يدي في خصري مفكرًا حتى أخرجتُ دفترتي
الصغير وقلمي من جيبي قائلًا:

- إنت حافظ شكل اللوحة كويس؟ يعني لو شُفتها تعرفها؟
- أيوه، أنا سوبر بطيخة.

فتحت الدفتر وبدأتُ أكتب الحروف الأبجدية بالترتيب قائلًا
- ماشي يا سي سوبر بطيخة.

أنهيتُ كتابة الأحرف العربية ومن بعدها الأرقام من صفر إلى تسعة
وأريتهم إليه موضحةً

- دي كل الأرقام والحروف. قولي شُفت إيه منهم على لوحة العربية؟
نظر للدفتر ثم التفت إليّ وقال ممتعضًا:
- خطك نقش فراخ.

ضربتُ نفسي بالدفتر ثم قلتُ لياسين:

- مالقتش غير العيل السَمِج ده أكلمه؟

- ما ده الوحيد اللي خد باله من لوحة العربية.

قال بطيخة: اشتري لي حلبة.

- هشتري لك كل عربيات الحلبسة اللي في الكوكب بس ارحم أمي وانجز.

دقق النظر في الدفتر ثم اختار الأحرف: قاف وباء وراء ومن الأرقام خمسة.

- وباقي الأرقام؟

- هو الرقم ده مكتوب ثلاث مرات جنب بعض.

- متأكد من ترتيب الحروف والأرقام ده؟

نظر لي بثقة منقطعة النظير

- أنا سوبر بطيخة.

أخبرني حازم - صديقي بالمرور - أن هذه السيارة تابعة لشركة تأجير سيارات بالتجمع الخامس فذهبتُ أنا وقطرز إلى عنوانهم بعد أن قصصتُ عليه ما حدث مع أشباح الأطفال فتأثر وتلألأت عيناه بالدموع لفكرة أنهم يظنون أنفسهم قد تحولوا إلى أبطال خارقين بسبب مشروب سحري ولا يدركون أنهم صاروا موتى بسبب عصير مُسَمَّم، مما أشعرتني أنني إنسان معدوم الإحساس والعاطفة حيث أنني لم أتأثر بالقدر نفسه. ربما لأنني أرى أشباحهم فلا أشعر بهم كموتى أو ضحايا، كما أنني رأيتهم يلهون ويلعبون وهم أسعد مما كانوا عليه أحياناً.

وصلنا المكتب الأنيق الذي يملكه شاب يرتدي حذاءً لامعاً ويضع عطراً ثقيلاً وقد رحب بنا بابتسامة بلاستيكية قائلاً: أخدم حضراتكم بيايه؟

- عايزين نعرف مين اللي أجّر من عندكم عربية سودة عالية رقمها
ق. ب. ر؟

- مين اللي أجّرها إمتى بالظبط؟

- يوم الأربعاء واحد فبراير ما بين الساعة اتناشر لاتنين الضهر.

- لحظة.

خرج من مكتبه النظيف ثم عاد بورقة بها نسخة من بطاقة قائلاً: دي
بطاقة اللي أجّر العربية.

كانت تحمل اسم "خيرى مدحت أمجد شلهوب"، جراح مقيم بفيلا
في التجمع الخامس.

قال قطز في طريقنا لفيلا صاحب البطاقة:

- بانك كده، يا معلم. جراح ومش صعب عليه يجيب السم.

- إيه اللي يخلي جراح محترم يسمم أولاد الشوارع؟

- هنجيبه من قفاه ونخله يعترف، ده المفروض يبقى عبرة لمن يعتبر

ثم حكّ ذقنه قائلاً: بس برضو هموت وأعرف أنا سمعت عن شجرة
البلادونا دي فين قبل كده؟

وصلنا الفيلا المترفة ولم نجد لها حارسًا.

فتحنا البوابة الحديدية التي لم تكن موصدة ومررنا من الحديقة المهملة

ذات مقاعد الخوص المتربة وأقتربنا من الباب الخشبي الأنيق وقبل أن

أطرقه شعرتُ برجفة لا تتابني إلا عندما يلمسني شبخٌ.

استدرتُ لأجد روحَ رجلٍ في مقبلِ الستينيات، قصير وأصلع. له
جسد هزيل وعينان ذابلتان ويرتدي نظارة نظر مستديرة ويضع روب
النوم الصوفي فوق منامته المخططة طويلاً.

نظر إليّ متعجباً وقد زادت دهشتي عندما أدركتُ أنه الجراح ”خيرى
شلهوب“.

أخرجتُ نسخة البطاقة ثانية ونظرتُ بالصورة ثم لشبحه، إنه هو بلا
شك.

بدأ قطز يقرع الباب بينما قال لي الشبح بنبرة تائهة:

- ما شفتش فاطمة؟

- دكتور خيرى؟

التفت قطز حوله قائلاً: شكله مش جُوّه و... .

أشرتُ إليه أن يصمت وقلتُ لشبح الطبيب:

- سلام عليكم، يا دكتور. أنا نوح الألفي.

ارتبك قطز ونظر إلى حيث أوجّه حديثي ففهم ما يدور وسألني

هامساً:

- نوح، الدكتور.. هو هنا؟

هزرتُ رأسي إيجاباً بينما أعاد شبح الطبيب سؤاله:

- ما شفتش فاطمة؟

- فاطمة مين، يا دكتور؟

- مراتي، قالت لي إنها هنا.. شفتها؟

- هي ماتت؟
- هز رأسه ثم أضاف: بس أنا رُحِت لها أهو.
- رُحِت لها إزاي؟ مين اللي قتلك؟
- نظر حوله قائلاً: ما سُفتش فاطمة؟
- هساعدك تلاقيها بس قولي إنت مُتَّ إزاي؟
- عبس وغضب قائلاً: مش عايز...مش عايز منك حاجة، أنا هدوّر عليها بنفسِي.
- إستنى يا دكتور أنا...
- أتى صوت ناعس من جهة اليمين قائلاً:
- أيوه يا أساتذة، في حاجة؟
- التفتنا لنجد البواب يفرك عينيه خارجاً من غرفته الصغيرة بينما اختفى شبح الطبيب.
- قال قطز: دي فيلا الدكتور خيرِي شلهوب؟
- الله يرحمه.
- هو مات إمتى؟
- آخر يناير، قبّضني وأتكل عالله.
- سألته: هو مات إزاي؟
- أنا ما عرفتش الأساتذة بيقوا مين؟
- الأساتذة بيقوا مباحث، إخلص. خيرِي مات إزاي؟

- لا مؤاخذة، يا باشا. الأستاذ انتحر، ما استحملش الحزن على
الست فاطمة ومات.

- فاطمة دي مراته؟

- أيوه يا باشا. ماكانتش بتخلف وهو كان بيدوب فيها دوب وفضلوا
عايشين مالهمش غير بعض لحد ما ماتت في حادثة عربية والدكتور ما
استحملش بعديها بشهرين وانتحر.

- انتحر إزاي؟

- حط لنفسه سم في العصير ومات.

الأمر برمته غير منطقي.

جمعنا ملفات التحقيق في وفاة خيرى، وعدنا إلى المكتب في محاولة
لتحليل الأمر، فقال قطز:

- يعني خيرى جاب سم الأترويين وحطه في العصير وأجر عربية
وطلع على كوبري قصر النيل وزع العصير المسموم على العيال ورجع
بيته وانتحر بنفس السم؟

- إنت شكلك مش مركز وعايز تنام.

- ليه؟

- شهادة وفاة خيرى مكتوب فيها 30 يناير والعيال ماتوا واحد فبراير.

- يعني إيه؟ مات وعفريته سمم العيال؟

- يعني مات وحد سرق بطاقته أجر بيها العربية وسمم العيال.

أوصاف خيرى مش متطابقة مع اللي بطيخة قالى عليه، اللي سمم العيال راجل طويل وأسمر ورفيع وأخرس.

- يبقى الراجل ده هو اللي قتل الأطفال وخلي خيرى ينتحر.

- خيرى اتقتل ما انتحرش.

رفع حاجبيه قائلاً: إزاي بقى؟ التقرير بيقول...

- تقرير المباحث بيقول إن الباب كان مقفول بس المفتاح مش موجود

وإنهم لقوا كوباية العصير اللي فيها السم على التريزة لكن ولا لقوا أزازة السم ولا مصدر العصير نفسه.

- ترجم لي.

- الراجل اللي وزع العصير المسموم على العيال هو نفس اللي دخل

بيت خيرى وصب له من نفس العصير المسموم وسرق بطاقته وخرج

وقفل الباب وخذ المفتاح معاه عشان خيرى مايقاومش ومايلحقش

يروح المستشفى لما تظهر عليه أعراض التسمم، نفس الاستراتيجية اللي

اتبعتها مع أطفال الشوارع، كان عارف إن مافيش مستشفى هتستقبلهم

وتديهم المضاد السُمى.

- بس خيرى ماقاومش لأن نفسه يموت ويشوف مراته، ولعدم

وجود أعراض مقاومة أو لأنه ما استنجدش بالبواب افتكروا إنه انتحر.

- عشان بهائم ويكروا التحقيق.

- طب إيه الرابط بين خيرى وأولاد الشوارع؟

- الرابط هو الشخص اللي قتل الاتنين بنفس الطريقة، لو شبح خيرى

ماكانش مخرف كده بسبب موت مراته كنت فهمت منه.

- تفنكر البواب اللي قتله؟

- لو البواب كان حط له سم فران، وبعدين ده أبيضاني وتخين مش مواصفات القاتل خالص.

زفر قطز قائلًا: هو إحنا ليه ديبًا بنقع في قضايا حلزونية كده؟

نهض وفتح اللاب توب فسألته: بتعمل إيه؟

- هحاول أشوف اسم شجرة البلادونا ده أنا شفته فين قبل كده،
يمكن تطلع حاجة مفيدة.

في الظهرية، علقْتُ بالزحام المروري على كوبري قصر النيل وما
زالت الأشباح الصغيرة تلهو حولنا، ومازال بطيخة يمتطي ظهر الأسد
صائمًا:

- أنااااا سوووووبر بطيييخة.

في الآونة الأخيرة، ظهرت إشاعة أن الكوبري مسكون بسبب ظهور
وجوه ضبابية غريبة بالصور التي يلتقطها المشاة ليلاً، والسبب الذي لا
يعلمه مستخدمو الإنترنت، هو قدرة الكاميرات على التقاط هالات
الأشباح.

بالطبع لا يظهرون بشكل واضح وصريح، ولكنك تراهم بعينك
البشرية العادية على هيئة ضباب أو دخان أو نور مخيف، وقد أعجبت
أطيان الأطفال بهذه اللعبة، فكلما وقف أحد الأحياء لالتقاط صورة،
حلق الأطفال خلفه وبعد أن يتفحص الشخص صورته يلاحظ وجود

شيء مخيف به؛ ا فيظل يلتفت حوله ويهرب مرتبكا فتتف أرواح الأطفال
ضاحكة ساخرة.

وجدتُ شبح ياسين يتأمل السيارات كعادته، ولكن عندما رأني عالقا
في الركوض المروري، اقترب مني وجلس بالسيارة قائلاً:

- وصلت لحاجة؟

- الدنيا اتعقدت خالص.

- بكرة تتحل وتقبض على اللي عملها.

- يارب.

- أنا طلعت لبنتي في الحلم زي ما إنت علمتني فصحيث من النوم
وكلمت كريم وسابته.

- طب الحمد لله.

- أنا مش عارف أشكرك إزاي.

- يا سيادة المايسترو أنا ما عملتش حاجة.

رنّ هاتفي، كانت أمي تتصل بي، فأخرسْتُ الرنين بينما قال ياسين:

- لو حابب تتكلم على انفراد أنا ممكن أمشي.

- لا، أنا مش فاضي أرد.

- ما إنت ماوراكش حاجة أهو. رد لاتكون والدتك عايزاك في حاجة
ضرورية.

- لا مش عايزاني في حاجة.

- في مشاكل بينكم؟

- عادي.

- شكله مش عادي.. احكيلى، آدينا بنتسلى.

- أفضل نتسلى بحاجة غير مشاكلي العائلية.

- مش قصدي أتطفل عليك، بس إنت مش ضامن هتسمع صوت والدتك تاني ولا لأ.. نظرتُ له مستفهماً فأكمل: أنا مغرم بالموسيقى. درست في إيطاليا وفرنسا وبقيت أستاذ في الكونسرفتوار واشتغلت في الأوبرا ولفيت العالم لحد ما قرّبت من الأربعين ولسه مش متجوز. عمري ما فكرت في الجواز وتكوين أسرة والكلام الفارغ ده على أدّ ما فكرت في إن قلبي يُدق.

- ودق؟

- دق في فينيسيا. اتعرفت على يسرا، كان عندها معرض رسم، هي فنانة تشكيلية وحد من صحابي عزميني على معرضها صدفة ومن ساعتها قلبي دق واتجوزتها وعشت معاها أحلى خمسة وعشرين سنة في عمري، ما أظنش إني ممكن أحب حد في الدنيا أدّها وشوف بقى على الحب ده كله، دينا خناقة غريبة. كانت أول مرة نتخانق بالشكل ده لدرجة إني سبتلها البيت ورُحت شقة بابا اللي في الزمالك. تاني يوم كان عندي بروفة في الأوبرا والدنيا كانت زحمة وأنا قاعد في العربية لقيت التليفون بيرن برقمها بس أنا كنت مقموص ومارضتش أرد، عملت زي ما إنت عملت كده وقفلت الصوت وقبل ما أرجع الموبايل مكانه مُتّ.. لو كنت أعرف إن دي آخر فرصة عشان أسمع صوتها أكيد كنت رديت. إنت مش عارف أنني كلمة هتبقى الكلمة الأخيرة ولا أنني فرصة هتبقى آخر فرصة ليك.. العمر مش مضمون يا نوح.

بدأت السيارات تتحرك رويداً رويداً بينما أكمل ياسين بحزن:

- المضحك إني مش عارف سبب الخناقة، بس عارف إن يسرا شايلة
ذنب إني مُتّ زعلان منها.

- طب كلمتها في الحلم وهوّنت عليها؟

- حصل. صحيت فضلت تعيط، وأول ما البنات دخلوا عليها
مسحت دموعها ومثلت إنها كويسة. هي دائماً كده، تحس إن رجليها
واجعها فتدوس عليها أكثر، ضهرها يألمها فتشده أكثر، ضرسها يوجعها
تمضغ عليها أكثر.. طول عمرها بتعانده الوجع عشان تفضل ضهرنا
وسندنا. كداب اللي قالك إن الراجل هو عمود البيت. أنا مُتّ أهو بس
البيت لِسّه واقف على حيله لو كانت يسرا هي اللي ماتت كان البيت اتدمر.
- مش مضبوط. أنا لما والدي مات أمي التجوزت وخذت أختي
وعاشوا في بيت جوزها وأنا عِشت في بيت جدتي وبيت أبويا اتقفل ومن
ساعتها وفي شرخ في العيلة مش عارفين نداريه.

- من الواضح إنك رافض جوزها.

- أكيد.

- إشمعنى؟ الرجالة بيدفنوا مراتتهم الصبح ويتجوزوا بالليل؟

- يعني لو يسرا التجوزت إنت هتبقى مبسوط؟

- أنا ميت بس هي عايشة. مش المفروض إن موتي يدفنها تحت
التراب معايا.

- والله إنت رومانسي وطعم وحبُّوب وأنا مش كده.

- أكيد خطيبتك تعبانة معاك.
- خطيبة 'يه؟ هو أنا لاقى وقت أهرش في دماغي.
- لما قلبك يدق، هتلاقي وقت لكل حاجة.
- ده لما بقى..
- عمرك ما حبيت؟
- لأ حبيت، بس كان عندي تمن سنين ومن ساعتها وأنا بحلم بيها.
- صاحبتك في الكلاس ولا بنت الجيران؟
- شبح واحدة في جبل الموتى.
- قصصتُ عليه حكايتي مع جبل الموتى، وركزتُ على الشابة البدوية ذات البشرة الخمرية والعينين الواسعتين التي مدت لي يدها بالليمونة ودلتنني على طريق التواصل مع الموتى.
- بتحب عفريته؟!
- روح مش عفريته.
- طب وشفتها تاني؟
- من خمس سنين كده رُحت جبل الموتى بس ماشفتش أي حاجة، لا البدو الخايفين ولا المحارب الفارسي ولا الفرعون ولا هي نفسها.
- ماشكّتش قبل كده أن كل دي هلاوس سمعية وبصرية وإن ده مجرد عقلك الباطن؟
- عيل عنده تمن سنين هيبقى كل ده في عقله الباطن ليه؟ أنا كان أقصى طموحي وقتها إني أحل ألغاز المحقق كونان.

ضحك قائلاً: ومن ساعتها بقى شايف إنها فتاة أحلامك؟

- مش فتاة أحلامي على قد ما حسيت إنها ملاكي الحارس.. يمكن
عشان كان حب طفولي وهي كانت.. كان فيها طيبة وابتسامة حنينة كده.
ميكس غريب بين الرومانسية والأمومة.. أنا عرفت بنات كتير بس كان
دايمًا في حاجة ناقصة.

- ما كلنا فينا حاجة ناقصة.

- بس اللي بيحب حد مش هيحس إن فيه حاجة ناقصة.. أقولك؟
أنا مقتنع إن البنات اللي هكمل معاها بقية حياتي هي اللي هقدر أقولها إني
بشوف الأرواح من غير ما أخاف ومن غير ما تشوفني ملبوس زي أمي
ولا مجنون زي أختي.

هز ياسين رأسه وقال بابتسامة دافئة:

- تفاعل، يا نوح يمكن القدر يفاجأك.

لا أتذكر أنني أرتحتُ لأحد الأشباح بهذا القدر من قبل.

بدأت روح ياسين تزور غرفتي وتجلس معي بالشرفة ليلاً، ولأول
مرة أحزن لكون أحد الأطياف سيرحل عن الأرض ويتركني.

عندما علمت جدتي بوجود شبحه في منزلنا كادت تبكي تأثراً،
وحرصت على أن أوصل إليه رسائل إعجابها وتقديرها وإجلالها
لموسيقاه، حتى إنها كانت تشغل معزوفاته طوال الوقت لتؤكد حبها
الشديد له.

وبنهاية الأسبوع، لم يكن يتبقى سوى يومٍ واحدٍ لياسين بعلمنا، فغداً سيتمم يومه الأربعين ثم يرحل.

- هروح فين؟

خلعتُ حدائي بغرفتي استعداداً لأخذ قيلولة قصيرة قبل أن تعد جدتي من نزهتها مع صديقتها.

- ده السؤال الوحيد اللي مش لاقى له جواب.

- وبعد ما أمشي مش هعرف أشوف يسرا والبنات وتاني؟

صمتُ قليلاً حتى أجبته: يقولوا إن الميت بيشف الناس اللي بيحبهم في أي وقت لكن ما حدش أكد لي المعلومة دي بس بابا كان بيزورني كثير في أحلامي بعد ما مات. صحيح كان بيقول كلام مبهم وشكله ماكانش واضح لكن كنت بشوفه في الحلم.

- يبقى لازم أقولهم إني ماشي. أنا بحكي لهم عن كل حاجة، حتى عنك. ضحكتُ قائلاً: تعرف إن دي أول مرة من بعد وفاة بابا وجددي أحس إن فيه روح هتقطع بيّ؟

- وإنت هتوحشني بس.. أنا قلقان على يسرا والبنات من بعدي.

- مراتك وبتتك الكبيرة مايتخافش عليهم، الصغيرة متهوره شوية بس أختها هتاخذ بالها منها.

رنّ هاتفي فقلتُ لشبح ياسين: لحظة بس أرد أجبّ قائلاً: في جديد يا قطر؟

- ماكبث يا نوح.. طلعتنا ماشين في الطريق الغلط.

(3)

- أنا مش فاهم حاجة يا قطز.
- مسرحية ماكبث بتاعة شكسبير اللي خدناها في ثانوي و...
- مالها؟
- المسرحية كان فيها هدنة بين أسكتلندا والقوات الإنجليزية التابعة للملك هارولد هارفوت، تمام؟
- انجز يا قطز عشان أنا جعان ومش شايف قدامي.
- طيب، طيب. ماكبث قرّر يخلص من القوات الإنجليزية، راح عمل نبيذ سام وشرّب منه الجنود وكان مفعوله قوي لدرجة إنهم ماكانوش قادرين يقفوا على رجليهم وماتوا.
- فين الاكتشاف في اللي إنت بتقوله؟
- الاكتشاف إنهم ما ماتوش بسبب إن ماكبث حط لهم سمّ في النبيذ، النبيذ نفسه هو السم.
- ورحمة أبويا ما فاهم حاجة.

- فاكر لما فضلت أقولك إني متأكد إني سمعت كلمة بلادونا قبل كده؟
عشان كانت موجودة في مسرحية ماكبث. دي شجرة سامة بتطرح فاكهة
بيسموها توت الشيطان عشان سامة، ماكبث بقى خد التوت وعمل منه
نيذ وأطفال الشوارع ودكتور خيري كان محطوط لهم السم في عصير
التوت. العصير ماكانش فيه سم، العصير نفسه هو السم. التوت هو المادة
السامة يعني بدل ما كنا بندور على مين اشترى سم من الصيدلية...

- هندور على مين اشترى التوت من الشجرة.

- أو مين زرع الشجرة.

- هي ممكن تتزرع في البيوت؟

- هي دي المعلومات الي ناقصاني. محتاج منك تعدي على طنط فتون
تسألها عن الشجرة دي وتعرف منها إيه شروط زراعتها ولو ينفع تتزرع
في مصر والكلام ده.

ارتديتُ حذائي بحماس: ماشي، أنا نازل دلوقتي.

ألفتُ لشبح ياسين قائلاً: معلى، أنا لازم أنزل عشان جد جديد في
القضية.

- وأنا هروح أشوف البنات.

استقبلتني السيدة فتون في منزلها بخمسة ساندويتشات من المربي
التي أعجز عن مقاومتها.

أكلتُ السانودويتشات بنهمٍ وإني لقادر على التهام أضعافهم، فقد
كانت المربي أشهى من كل مرةٍ لدرجة أنني لعقتُ أصابعي بعد أن
فرغتُ من الأكل.

ظلت فتون تشاهدني وأنا آكل بشهية مفتوحة وقد ابتسمت بحنانٍ،
وعندما انتهيتُ سألتني:

- أجب لك ثاني يا حبيبي؟

- ده أنا هاخذ البرطمان وأنا مروّح.

- أنا عاملة لك كثير، هتاكل لحد ما تشبع.

ضحكتُ ثم شربتُ الماء بينما قالت: قُلت لي بقي عايز تسأل عن
شجرةٍ إيه؟

- البلادونا.

- اسمها بالعربي ست الحسن أو توت الشيطان عشان بتطرح توت
طمعه مسكر بس سام جداً وشكله يجذب الأطفال عشان بيفتكروه
بلاك بيرى لكن لو كلوا منه خمس ولا ست حبات يموتوا في خلال
ساعتين تلاتة وأكثر جزء سام في ست الحسن هو جذروها. مات بسمها
الإمبراطور أغسطس والإمبراطور كلوديوس ولحد النهارده سم ست
الحسن بيُستخدم في جرايم القتل.

- ليه بيسموها ست الحسن؟

- عشان الستات كانوا بيستخدموا لون التوت بتاعها في التجميل،
بيعصروه بطريقة معينة ويعملوا منه روج أو أحمر خدود.

- والشجرة دي بتزرع في مصر؟

- موطنها الأصلي أوروبا، بس برضو بيزرعوها في شمال أفريقيا
وغرب آسيا وبتحتاج لشمس قوية لمدة خمس أو ست ساعات في اليوم
وتهوية ومش بتحتاج ميه كثير.

على ذكر المياه، شعرتُ بجفافٍ شديدٍ ورغبة قوية في شرب نهر النيل
كله؛ فلم أترك كوب المياه الزجاجي من يدي فقالت السيدة فتون:

- أجيب لك مياه تاني؟

- ياريت، أصل السكر بيعطّشني جدًا.

- معلش، أنا كترت السكر المرة دي في المربي عشان كنت حساها
مرة.

أحضرت لي دورقًا آخر من المياه بينما دوّنتُ كُلَّ المعلومات التي أملتتها
عليّ.

- سهل تلاقي بذور الشجرة دي؟

- ممكن تحيبتها من أي مشتل وتزرعها في الجنية أو فوق السطوح.

بدأت عيني تحرقني من شدة النعاس حتى إن إضاءة المنزل آلت
مقلتي فأغلقتُ جفوني وفركتهم، فقالت السيدة فتون بقلق:

- مالك يا حبيبي؟

- عيني وجعاني من السهر.

- تحب تطلع تنام؟

- لا لا لا.. كملي.

- بدل ما أنا بصدعك كده تعالى معايا.

- على فين؟

- عندي حاجة هتفيدك أوي.

وجدتُ نفسي في سيارة فتون البيضاء متجهين إلى المقطم وقد زادت
حرقة عيني وجفاف حلقي وصداع رأسي ورغبتني في النعاس.
ليتني لم أذهب معها واتجهتُ للفراش فأنا أكره عندما يتمكن منِّي
الإرهاق ويبدأ رأسي يؤلمني بهذه الصورة الضارية.

وصلنا إلى منطقة لم أرها بالمقطم من قبل تشبه مدينة الأشباح.

ليس وكأن بها أشباحًا بل لأنها خالية ومعظم المباني بها لم ينته إنشاؤها
بعدُ، عدا فيلتين متباعدين اقتربنا من إحدهما لا حارس عليها، ولكن
السيدة فتون أخرجت المفتاح وفتحت بوابة الفيلا الصغيرة ذات الحديقة
النضرة والعشب الأخضر فقلتُ محاولاً أن أبعد الإرهاق عن صوتي:
بيت مين ده؟

- دي الفيلا اللي عُمر كان هيتجوز فيها.

عمر ابن فتون كان أحد تلامذة أمي بالقصر العيني، ولكنه توفي قبل
زفافه بشهر.

وقفنا أمام نبتة شجرية ارتفاعها متر ونصف، لها أوراق بيضاوية كبيرة

وأزهار بنفسجية شكلها يشبه الجرس وتتدل من أغصانها الرفيعة ثمار في حجم الطماطم الكرزية ولكنها سوداء لامعة.

بدأتُ أرتجف، أفهم أنني مرهقٌ ومتعبٌ من قلة النوم والأكل ولكن ليس إلى الدرجة التي تجعل نبضات قلبي تزداد ورؤيتي تهتز وعرفي يتسبب كمن أصابته حمى.

وضعت فتون يدها على كتفي برفق قائلة:

- أنت كويس يا نوح؟

حاولت أن أتماسك قائلاً: أيوه أيوه. أشرتُ إلى الشجرة: هي دي

ست الحسن؟

قربتُ يدي نحوها ولكنها أبعدتها قائلة:

- أوعي تلمسها من غير جوائتي، سمها قوي وممكن يئذي جلدك.

بدأتُ ألهث مع ازدياد سرعة نبضات قلبي وقلتُ متشبثاً بهدوئي

الذي أخذ يتلاشى:

- طب.. مدام هي سامة أوي كده، إنتي زرعها هنا ليه؟

ضحكت وقالت بنبرة لم أعتدها منها:

- نوح حبيبي، إنت نسيت ابني مات إزاي؟

(4)

كاد قلبي أن ينفذ من صدري بينما صار حلقي كالصحراء الجرداء
وابتلت ملابسي من العرق وبدأت أحك جلدي كله وأسعل بقوة ورأسني
يترنح وتوازني يختل كمن شرب برميلاً من الخمر.

تجلت مظاهر تعبي الذي لم يعد قلة النوم والإرهاق العادي مبرراً
له وعندما لم أعد قادراً على الوقوف على ساقي، أسندتني السيدة فتون
وأدخلتني إلى الفيلا.

كانت الفيلا مفروشة بالكامل كأن هناك مَنْ يقطن بها، قالت لي
جدتي من قبل أن بعد وفاة عمر اعتادت فتون الذهاب إلى الفيلا لتنظيفها
والمكوث بين الأثاث الذي اشترته مع وحيدها.

وضعتني على الأريكة المريحة بينما جلست على الكرسي المقابل واضعة
ساق فوق الأخرى، وقالت بصوتها الحنون ولكن بنبرة مريية:

- زي النهارده من سنة، عمر كان راجع من العيادة الساعة ثلاثة
الفجر، طلع عليه اتنين من أطفال الشوارع وكانوا عايزين يسرقوه ولما
قاوم، طعنوه بمطوّة ومات.

اللعنة! أتمنى ألا يكون شكّي في محله.

- أنا اتطلقت وعُمرَ عنده اتناشر سنة، ماطلعتش من الدنيا غير بيه فلما جالي خبر إنه في المستشفى كنت هتجنن. اتصلت بجراح صديقي من أيام الطفولة، هو الدكتور الوحيد اللي بثق فيه واستنجدت بيه عشان يلحق عُمرَ بس فشل.. خذلني وما أنقذش ابني من الموت.

حاربتُ الشلل الذي بدأ يصيب أطرافي وقلتُ لها:

- خيرِي؟ الدكتور خيرِي؟

هزت رأسها باسمه: طول عمري بقول عليك ذكي عشان كده لما قررت أجيب حق ابني، لجأت لك عشان تلاقي القاتل بس زيك زي خيرِي. خذلتني وسببتُ اللي قتل ابني حر طليق.

وودتُ أن أصبح بها وأخبرها أنني أخذتُ أوصاف القاتل من شبح ابنها بعد مقتله وأني بحثتُ عن قاتله بكل مكان ولكني لم أجده؛ فأنا لا أعرف له اسمًا ولا دلالة، وأطفال الشوارع يجمون بعضهم البعض فبحثتُ مستخدمًا كل حيلي ولكني لم أجد الجاني وكأنه تبخّر وقد كنتُ "ملازم ثاني" آنذاك وصلاح هو النقيب المسئول عن القضية.. صلاح!

ليتني ركزتُ في جملته عندما كان بالمكتب راضيًا عن تسمم أطفال الشوارع وقد قال لي

"إيه، يا سي نوح. نسيت جارك اللي عيل من دول ثبته وغزه"

لم استهرتُ بكلامه ونسيتُ أن ذاك الجار هو عُمر ابن فتون؟! فتون

التي تملك محلاً للورود ومشتلاً وخيرة بالنباتات ولديها دافع الانتقام،
ومن السهل حصولها على نبتة ست الحسن.

نهضتُ من مقعدها مع ازدياد رعشتي، لم ألاحظ من قبل أنه إذا
نظرتُ للسيدة فتون من الخلف ستبدو كرجل بقامتها الطويلة وشعرها
القصير وجسدها المسطح.

لو ارتدت جلباباً أبيضً ووضعت قبعة على رأسها وأخفت عينيها
الأثويتين بنظارة شمس كبيرة وتمنعت عن الكلام حتى لا يُسمع صوتها
الناعم، سيظنها الناس رجلاً.

فتون هي من سممت أطفال الشوارع والجراح خيرى شلهوب..
وأنا!

ربع ذراعها قائلة بسخط ممزوج بالحسرة:

- ابني كان بيعالج أولاد الشوارع بالمجان في عيادته، تعرف كام مرة
المستشفيات رفضت تدخل طفل مريض من الجرابيع دول وهو أصر
يدخلهم على مسئوليته الشخصية أو حتى يدفع لهم التكاليف؟ يقوم
الكلاب دول يقتلوه في الفجر ويسيبوه ينزف في الشارع؟

حاولتُ النهوض ولكني لم أشعر بساقي وأصابني غثيانٌ شديدٌ،
ولكن فتون لم تتوقف عن الكلام.

- أنا اعتبرت خيرى زي أخويا واستنجدت بيه لكنه اتأخر وقال إيه
خرج من العمليات يقولي أنا عملت اللي عليّ -ضحكت متهكمة ثم
بدأت تصيح نحوي-: وإن كنت زي ابني، فضلت أقول عليك ذكي

وشجاع ويوم ما اعتمدت عليك طلعت زيك زي كل اللي في المجتمع
القدر ده، أغبيا ومتقاعسين وناكرين للجميل.

رنّ هاتفي فحاولت بكل ما أوتيت من قوة أن أمد يدي لآخذه ولكنها
أسرعت وأخرجته من جيبي وعندما شددتُ معصمها دفعت يدي بقوة
فسقطتُ أرضًا.

أجابت الهاتف بنبرتها الهادئة: أيوه يا إحسان.. نوح نسي موبايله عندي
في المحل.. إبقني قولي له يجي ياخده لما يخلص شغل.. سلام يا حبيبي.

حاولتُ أن أصرخ ولكنني لم أجد صوتي، حالة من الخدر المختلط
بالحمى والغثيان سيطرت على أوصالي وما زال قلبي ير كل صدري هلعًا.
الأمر واضح:

أحد أطفال الشوارع طعن عمر ثم فشل خيرني في إنقاذ حياته؛ فمات
عمر.

لجأت فتون إليّ فخذلتها كما خذها صديقها الجراح.
مُحمّلة بالكراهية وشاعرة بالظلم، ظلت عامًا كاملاً تتظاهر بكونها
الأم الراضية بقضاء الله.

لم تصرخ ولم تبك ولم تُظهر أيّ نوع من السخط أو الاعتراض على
أمر الله، بل ظلت توزع الورود والعصائر والمحبة على الجميع؛ فجعلتنا
نظن أنها تحطت أمر وفاة ابنها بينما في الواقع كانت تود أن تبعد عن نفسها
الشبهات فظلت متماسكة تحضر خطتها سرًا فللظلم والعدالة البطيئة
التأثير ذاته، خلق إنسان يكفر بالعدل ويؤمن بالثأر الفردي.

بدأت بخيري. دخلت منزله باسمه الثغر بحجة مواساته وتصبيره على فراق زوجته وأهدته زجاجة العصير. سكبته له كوباً وظلت معه ساعتين أو ثلاث حتى ظهرت عليه الأعراض فنقلته إلى فراشه ليسترخ ثم أخذت بطاقته الشخصية والمفتاح حتى لا يحاول التوجه إلى المشفى. استأجرت سيارة ببطاقة خيري الميت ثم نفذت الجزء الثاني من خطتها ووزعت عصير توت الشيطان على أطفال الشوارع بغرض الانتقام العشوائي ممن كانوا سبباً في موت ابنها. والآن أتى الجزء الثالث من خطتها وهو قتلي أنا.

اختارت شجرة ست الحسن لسهولة زراعتها وتوزيع سمها، فتوتها حلو المذاق لا رائحة له ويمكن للضحية أن تتناوله كتوت طازج أو عصير أو في حالتي أنا، مربى التوت.

حاولت أن أزحف على الأرضية الباردة صوب الباب، ولكنها أغلقت هاتفي ووضعتة بجيبها ثم وقفت تضحك ساخرة من محاولتي البائسة للفرار من الموت قائلة:

- ماتحاولش، كلها ساعة ولا اتين وتموت. ماحدث هيلحقك زي ما مالحقوش ابني.

استمر زحفي حتى منتصف الصالة وقد بدأت أشعر بتشنجات غريبة. سحبت فتون حقيبتها وأخرجت المفتاح قائلة:

- 10 حبات من توت ست الحسن قادرين على قتل إنسان بالغ.. تفتكر ساندوتشات المربي اللي كلتها فيها كام حباية؟

كنتُ أعلم أنني سأموت قبل أن يشيب شعري وتجد التجاعيد
طريقها إلى وجهي، ولكني لم أتصور يوماً أن السيدة فتون التي علمتني
في طفولتي أسماء الورود ومعانيها هي من ستقتلني .

مددتُ يدي صوب الباب ولكنها ركلتني جانباً وخرجت من الفيلا
وأوصدت البوابة.

بقيتُ مستلقياً على ظهري أرتعش وأعرق وتدرجياً، صارت الرؤية
ضبابية إلا أنني سمعتُ صوتاً: نوح، مالك؟

لم أَرَه بوضوح ولكني كنتُ متأكداً من أنه شبح ياسين الذي صاح فرعاً:

- إيه اللي حصلك؟ مين عمل فيك كده؟

خرج صوتي واهناً بالكاد يُسمع:

- سم.. كلم الإسعاف.. بموت.

وقف حائراً وأخذ يدور في المكان عاجزاً عن التقاط أي شيء فقال

مرعوباً:

- مش عارف، مش عارف أمسك حاجة.. أعمل إيه؟

هاجمتني نوبة عنيفة من التشجنات وصرتُ أرى أضواءً عجيبة
وأسمع أصواتاً متداخلة ولكن صياح ياسين الهلع كان واضحاً:

- أعمل إيه، يا نوح؟ ماتتوش، يا ابني أنا...

خفتت الأضواء واختفت الأصوات وساد السكون المظلم.

علَّها النهاية...

(5)

هل يحلم الموتى؟

لا أظن ذلك، الأشباح لا ينامون فكيف سيحلمون؟
إذا كيف أحلم الآن بالبدوية صاحبة الليمونة الصفراء واقفة في
منتصف كهف جبل الموتى، ولكنها بمفردها بلا أية أرواح أخرى.
تنظر صوبي مبتسمة وشعرها الأسود منسدلاً على كتفيها وتبتسم إليّ
بشفيتها المكتنزتين وعينيها الواسعتين وتشير إليّ أن أقرب.

ذهبتُ صوبها محلّقاً كالطيف الهائم، وقبل أن ألمس يدها وآخذ
الليمونة شعرتُ بيد على كتفي فتغيّر المشهد واختفى الكهف والبدوية
والليمونة ووجدتُ نفسي بغرفة بيضاء كثيبة ذات مصابيح نيون خافتة
وسرير حديدي رفيع ولا يقف بها غيري أنا وياسين الذي بدا مرتاح
البال وباسم الثغر قائلاً: رعبتني عليك يا أخي.

لم أجه، كنتُ مندهشاً ومضطرباً.

وددتُ أن أسأله أين نحن وماذا حل بي، ولكنني شعرتُ أن لساني
مربوطٌ بينما تكلم ياسين بطلاقة:

- أنا كنت جاي أودعك بس الست المجنونة دي سممتك. ماتخافش
كله بقى تمام لكن...

سمعنا صوت دقة ساعة قوي خرق أذني فنظرتُ حولي ولم أجد آية
ساعات ولكن ياسين قال متعجلاً: الأربعين يوم خلصوا، دي ساعتني..
أنا بعثتُك دليّة. خلي بالك منها يا نوح.

بدأ جسده يتلاشى وهالته تتبدد ثم سطع ضوءٌ قويٌّ كاد يُعْميني
فانفضتُ مستيقظاً.

الرؤية ضبابية ولكني تبينتُ ضوءاً مرتعشاً بالسقف، وبالرغم من ألم
رأسي الشديد والخدر المهيمن على أطرافي إلا أنني سمعتُ أصوات كلِّ
من حولي بوضوح.

- نوح.. نوح صحي يا طنط.

كان هذا صوت قفز يليه بكاء شديد ثم يدان متعرقتان تمسكان
بوجهي ثم تنهال عليّ بالقبلات:

- حبيبي يا ابني.. حمد الله على سلامتك.

كانت هذه أمي بصوتها العريض ويديها السميتين وشخشخة
سلاسلها الذهبية ذات الخرز الأزرق والآيات القرآنية ومن بعدها
صوت جدتي الرفيع المحمّل بدموع مكبوتة تقول بنبرة امرأة:

- ما تطبخيش على نفسه كده، سبيه يرتاح.

توالت الأصوات. جميعهم حولي: نادية وطارق وأمي وجدتي وقطر
وقد احتجتُ بضغ دقائق لتتضح الرؤية.

كانت جدتي ممسكة بالمصحف والدي تجلس بملابسها المحتشمة
وحجابها الطويل بجوارني لتحيطني بذراعيها ونادية عند طرف السرير
وطارق وقطر يقفان على يميني بطمأنينة.

بصوتٍ مرتعش لكن مسموع سألتُ قطر:

- مسكتوها؟

صاحت أمي: ده أنا كلت فتون دي بسناني، لولا قطر حاشني عنها
كنت قطعتها في القسم سحبت يدي وظلت تقبلُّها بهيسترية: سلامتك يا
حبيبي.. إن شالله أنا يا قلبي.

- بعد الشر عليك يا ماما.

قال قطر: حد يصدق إن طنط فتون الملاك دي تعمل كده؟

صاحت أمي: ملاك؟ إلهي وإنت جاهي تسخطها قرده عشان تبقى
عبرة للخلق.

سألتُ قطر: قبضتوا عليها؟

- لما لقيت الشجرة المسمومة في فيلا عمّر وبعد شوية ربط ومراجعة
للتفاصيل فهمت إن هي اللي وراها وأول ما وجَّهناها بتهمها فضلت
تزعق وتقول لازم أظهر المجتمع من المتقاعسين اللي زيكم.. نخها لسع
وغالبًا هتتحول على الخانكة.

صاحت أمي: ربنا ياخذها ويولع فيها ويشفي غليلي منها و...

قاطعتها جدتي بنبرتها المترفعة:

- وطي صوتك الهمجي ده. التفتت للباقية قائلة بعجرفة: يلا كلكم
بره عشان حفيدي يرتاح.

خرجوا جميعاً إلا قطز فاقتربت جدتي وقبّلت جبيني قائلة:

- سلامتك يا روحي.

- الله يسلمك يا تيتة.

التفتت لقطز قائلة: وإنت يا طويل الثيلة اتفضل قدامي.

همّ بالخروج ولكني استوقفته قائلاً: إستنى يا قطز عايزك.

قالت جدتي: عايزه في إيه؟ مش وقته، ارتاح.

- كلمتين بس يا تيتة وخلص.

زفرتُ معترضة ثم غادرت صافعة الباب خلفها فقال قطز:

- فاتك نُص عمرك، جدتك ومامتك اتخانقوا وكانوا هيموتوا بعض.

- وإيه الجديد! ما هم ما بيعرفوش يقعدوا خمس دقائق مع بعض،

سيبك.. أنا جيت هنا إزاي؟

- بالإسعاف.

- ما أنا فاهم يا غبي. مين اللي كلم الإسعاف؟

- آآآآآآه، نسيت أقولك قال غامزاً: مُزة، يا عم اتصلت بالإسعاف

وقالت لهم العنوان وفضلت موجودة طول الوقت وجدتك عمالة ترن

وتقولي مين دي هو نوح مرتبط من ورايا وحلفت لها مية يمين إني ما

أعرفهاش ما صدقتنيش. بتصاحب من ورايا يا واطي؟

- مُرّة مين يا قطز، إنت هتهزر؟

- أقسم بالله واحدة زي القمر بس مارضيتش تقولي هي عرفت إنك مسموم في الفيلا إزاي و...

دخلت جدتي بلا استئذان وبدت منز عجة، فجلست بجواري قائلة:

- بقيت كويس؟

- في إيه يا تيتة؟

- فيه إنك ندل، مين البننت اللي بره دي؟

قال قطز: دي البننت اللي بقولك عليها. قالت إنها هتيجي تظمن عليك النهارده تكون فُقت.

قالت جدتي منفعلة: أيوه بقى مين دي؟ ها؟ إنت بتعرف بنات يا نوح؟

- أو مال هعرف سحالي يا تيتة؟ ما تصلي على النبي.

- عليه أفضل الصلاة والسلام، بس ما أفعدش أنا أربي وتيجي واحدة تاخذك على الجاهز.

قال قطز ببرود: هدي أعصابك يا تيتة.

صاحت به: أنا بتعصب لما الواد ده يقولي، يا تيتة. أنا مش جدتك يا ناطحة السحاب إنت.

- الله يسامحك يا تيتة.

-!Quelle stupidité

- أنا متأكد إنك بتشتميني بس معلش إنتي برضو جدتي.

- أوووف. زفرت وقالت لي: إنت هتقولي مين البنت اللي لازقة لنا
من إمبرح دي ولا لأ؟

- أشوفها. أشوفها بس عشان أعرف هي مين وأرد على معاليكي.

- مش هدخلها غير لما تقولي هي مين.

قال قطر: مالكيش حق تسيبها واقفة بره يا تيتة.

اتجه قطر صوب الباب وفتحه بحماس ونادي الفتاة لتدخل.

لم أعد أفهم، أهذا حلم أم أنني مازلت تحت تأثير هلاوس السم؟

من باب غرفتي بالمشفى، دخلت البدوية التي كانت بمقابر جبل الموتى.

عينها الكحيلتان وشفاتها الحمر اوان وأنفها الدقيق وبشرتها الخمرية

ووجهها المستدير.

كانت هي بفرق أن شعرها لم يكن طويلاً حتى خصرها كما كانت

بجبل موتى بل قصيراً كالفتيان وملابسها تواكب العصر الحالي، جينز

أسود وحذاء رياضي وقميص حريري وسترة جلدية سوداء وعلى

معصمها وشمٌ لمفتاح صول الموسيقى وتضع قرطاً ذهبياً به حجر فيروز

يتماشى مع خاتمها وسلسلتها الرقيقة.

دخلت الغرفة حاملة باقة من الورود الحمراء واقتربت مني على

استحياء بينما قال لها قطر:

- اتفضلي، اتفضلي.

وكزتني جدتي قائلة: شفتها؟ مين دي بقى؟

لم أتوقف عن الحملقة بها، لقد كانت البدوية نفسها، ولكن بحلة

جديدة، لولا أن قطز وجدتي حولي ويريانها مثلما أراها لظننتها روحًا أو
لأعتبرت نفسي أهذي.

وقفتُ ذات الشعر القصير التي ترتدي الأسود من رأسها حتى
أخمصها عند طرف السرير فانعكست أشعة الشمس على وجهها البريء
وملامحها الدقيقة، وقالت بصوتها الذي سكن أذني منذ كنتُ بالثامنة من
عمري: حمد الله على سلامتكَ.

مدت يدها بباقة الورود، ولكن من فرط دهشتي لم أخذها منها، فرفع
قطز الحرج وأخذ الباقة قائلاً:

- مافيش داعي تكلفي نفسك.

ظلت جدتي ترمقها بتربص غير مُبرَّر بينما سحب قطز كرسيًّا وضعه
بجوار سريري حتى تجلس عليه ثم قال لجدتي التي تشبثتُ بذراعي
وكأنها تعلن عن ملكيتها الخاصة:

- يلا، يا تيتة عشان...

- عشان إيه؟ أنا قاعدة جنب حفيدي.

- ما إنتي بقالك عشرين سنة قاعدة جانبه، إدي له فرصة يتنفس.
بصعوبة شديدة، سحبها من يدها فخرجت وهي تهمس بصوتٍ
كالفحيح:

- مين دي؟ مين دي، يا نوح؟

خرجنا ولم يعد بالغرفة غيري أنا والضييفة غير المتوقعة.

ظلت تنظر حولها وتتأمل الأرضية في خجلٍ وهي تداعب خواتمها
حتى قالت بتردُّد:

- إنت بقى نوح؟

سألتها بلا تفكير: إنتي البدوية بتاعة جبل الموتى؟

قطبت حاجبيها بابتسامة فضولية:

- جبل الموتى؟!!

- إنتي الي إدتيني اللمونة؟

- لمونة؟! أنا مش فاهمة حاجة.

- إنتي الي كلمتي الإسعاف؟

- أيوه.. أصل هزت رأسها بتوتر: لو حكيت لك مش هتصدقني.

- أنا هصدق أي حاجة هتقولها.

بدأت تحكي بتردد وبكلمات متقطعة

- من حوالي أربعين يوم بابي مات لكن من إسبوع.. بدأت أحلم بيه

وكان.. كان بيحكي لي...

اضطربت ونظرت للأرض قائلة: بيحكي لي عنك.

- إنتي بنت ياسين الجارحي؟

اندهشت واضطربت وتطلب الأمر بضعة ثواني حتى وجدت ما

تقوله

- إنت.. إنت تعرف بابي، صح؟ أصل.. هو قالي إنك بتشوفه، بتشوفه

وهو ميت. حكى لي إنك بتشوف الأرواح وإنك معاه على طول وعلمته

إزاي يطلع لنا في الأحلام وإمبارح وأنا نايمة حلمت بيه مرتين، الأولى

قالي فيها إن النهارده آخر يوم ليه وإنك قُلت له إن روحه هتنتقل لعالم

تاني وبعدها مشي ووالي هيروح يودعك بس بعدها ظهر لي تاني وكان خايف ووالي إنك اتسممت في فيلا في المقطم وإني لازم أكلم الإسعاف فوراً عشان هو مش قادر ينقذك ووالي ”اصحي حالاً وانقذي نوح“ .. صحيت من النوم وبلغت الإسعاف من غير ما أفكر وماصدقش إنهم فعلاً لقوك، وإن كل ده حقيقي مش أحلام وجيت المستشفى عشان أتأكد لقيتك زي ما بابي كان بيوصفك بالظبط و...

لم أنزل عيني عنها وهي تتكلم مرتبكة وقد تعرقت يداها واحمرت وجتها.

أيمكن أن يكن الكون بهذه الدقة والعشوائية في آنٍ واحدٍ؟!

أرى بعمر الثامنة روح بدوية حسناء تعلمني كيفية التواصل مع عالم الأطياف، وبعدها أقابل شبح مايسترو قلقاً على ابنته فأعلمه كيفية الظهور بأحلام الأحياء فيظل يقص لابنته بمنامها عني وعن تواصلني مع عالم الأشباح وعندما أتعرض للموت يظهر بحلم ابنته ويجعلها تتصل بالإسعاف لتنقذ حياتي فتزورني بالمشفى وأكتشف أنها الفتاة نفسها التي أغرمت بها طفلاً؟!

قالت متوترة: إنت فاكرنى مجنونة، صح؟ أكيد كلامي مش منطقي بس مش كل حاجة في الدنيا منطقية وأنا.. أنا بس كنت عايزة أتأكد إني مش بهلوس عشان أنا متأكدة إن الي كنت بشوفه ده كان بابي وكنا بنتكلم بجد مش مجرد أحلام وتخاريف و...

- إنتي اسمك إيه؟

اضطربت من سؤاله الذي لا صلة له بما ترويه فقالت خجلة:

- دليّة.

عندما قال ياسين في ظهوره الأخير بحلمي قبل أن أستيقظ بالمشفى:
”أنا بعثتلك دليّة. خلي بالك منها يا نوح.“

كان يعني دليّة ابنته البكرية التي منعها ظهوره لها بالأحلام من
التزوج من خطيبها الخائن.

لو لم أحل قضية طه عبد اللطيف، لما كلفني اللواء رشوان بقضية
تسمم الأطفال ولما قابلت شبح ياسين ولو لم أعلمه الظهور بالأحلام
لما منع ابنته من الزواج.. ولو لم تسممني فتون لما قابلت دليّة ولما بقيت
على قيد الحياة.

تلك التفاصيل المتسلسلة التي نغفل عنها أو نقوم بها بلا تركيز، هي
جزءٌ من خطة كونية كبيرة دبرها الخالق دون أن ندري، كل ذرة بهذا
الكون لها تأثيرٌ لا ندرکه.

منقذتي تدعى دليّة.

ولسنوات طويلة كانت بالفعل دليّتي...

شُكر خاص لكل من تكرمَّ بوقته وعِلمه لإِثراء هذا العمل

عمر بولندي

ندی سليم

رحاب سعدي

كاري ميريل

رايات وودوارد

ويتني لاستر

شارون ميليك

رضا محمد

محمد عصمت

